

道咸同光四朝詩史

姚鵬圖字柳屏江蘇太倉人光緒辛卯舉人出京知縣

從牧翁故居得紅豆乞汪君伯琛爲之圖

夫容村前溪水香綠波照我秋衣裳清晨撥棹

見遠樹含烟蒼中有兩株挺而秀枝枝相對葉相

白榆零曉露葉如丹桂舒秋芳往者牧翁闢金屋

者深深藏

曾見河東君幅巾小影

童童寶樹大盈抱重重瓊瑤襟明

瑞故家喬木喜無恙絳雲久歎風流亡老農間言長太息

靈根已逐飛龍翔旁支側生綿歲月輪囷今又淩風霜嗟

予生年強七十三見結子不盈筐一珠爲君解衣贈重之

不異隨夜光乍驚火齊來絕域又疑舍利酬空王玉粒祇

餘嬰母啄丹砂未許麻姑量一再掀抄飽秀色詩人天與

療愁糧我黨汪子好詩畫不減當年程孟陽折枝許我寫

四朝詩史甲集卷六

九

眞相奚須火樹爭輝煌  
媵以好句紛琳瑯  
緘以猩紅古錦囊  
願祝牟尼生八百  
祇林慰我相思長

紅豆圖成更賦四律

錄三

秋色蕭條白日斜  
夫容村樹有啼鴉  
前生早種相思子  
側出還開並命花  
好祝香魂歸翠羽  
閒書影事想黃笳  
江頭淒絕桓司馬  
幾度東風易歲華

當年金谷錦成圍  
惆悵花開春已歸  
證果情天無老死  
移根淨土失皈依

前明舊本自闕移植

武陵終有桃僵恨  
淮水空悲枳

化非蕉鹿夢醒還入夢  
落英零亂釣魚磯

阿嬌生小住橫塘  
補闕文央又水鄉  
調笑談鋒無故劍

收翁

舊妾王囚以鍾馗

相讎斥居母家  
平章春事惜殘陽  
黃金竟買期頤壽  
碧

樹猶垂瓊瑤香  
若向華亭聞鶴唳  
卷施同識苦心長

言有章字審博一字潛百江蘇常熟人光緒辛卯優貢  
官至河南新河縣知縣有堅白室詩草三卷

奉酬姚慕庭先生

玉潤冰清互詠歌  
墊巾曾憶醉顏酡  
青城撰杖須眉古  
綠水依蓮獻納多  
謂范肯師先生之婿  
胸有元經濃道味  
眼無俗物只天和  
東南遺老飽憂患  
萬火光中把卷過

含王超賈更無倫  
中復遺編守後人

謂尊甫石甫先生

十事頻煩

陳大畧雙峯容易著  
閒身薜蘿自係蒼生計  
書劍思清簿海塵  
絕似廣陵彈古調  
惓惓琴德座中春

瀛洲雨露雪坡風  
果毅高門曾有崇  
府主觴遊答何遜  
耶君經術動歐公  
血山陳義遲宮邸  
釣綫成吟卜禁中  
丹桂有芳椿未老  
文章譽滿大江東



鼎鼎儒林廣國華彭城門業又瑯琊命騷信有江山助鑿  
空虛隨牛斗槎轉謝學僅九千字願聞詩派廿三家太常  
訂禮文甄粹且訪楹書拜絳紗

謂肯師夫人

呈范肯師用山谷韻

先生文采騰萬口此才豈可論石斗如秦延敵方開關席  
卷羣雄遁欲還又如亥步與夸走搖足能周天地閒湖海  
元龍樓下上到門謬荷中郎賞承蓋扶輪怡性情茫茫吾  
道重千城並時豈恨余生晚揚眉遂傲封侯榮扶翼三才  
首儒士世宙橫流賴君子文川武鄉廉讓閒茵溷隨風屏  
慍喜古樂由來索解難夔曠不作誰爲彈只有後先憂樂  
志一腔熱血相飛攀言遭東海自容與舉足欲望三神山  
肯師遺鮮荔支倒用東坡初食荔支韻賦謝

王侯將相泡幻耳一飽之外無他圖家世吳儂長燕塞空  
中狡獪思純鱸春來重作沽上客地交川陸羅華腴蘆芽  
水暖河豚上先施乳白珍逾珠何須更說江瑤美十年耳  
食心已粗坡公謂荔支高格厚味惟江瑤河豚近之卻憶童歲侍坐隅阿母分  
甘爭有無庚辰在津嘗鮮荔蓋海舶試載之始不分先生工說果紛紛遣我  
皆瓊姝一笑天公終皮膚飢可不食寒不襦要能不變色  
香味便與賢哲相馳驅方紅陳紫榮復枯楓亭系表尊崔  
盧

奉懷李嘯西丈

文章微渺郢夔斤飢溺憂思禹稷身逕許吾家猶聽子未  
妨臣壯不如人五千會見書藏副百萬何緣價買鄰絕憶  
龍門甘說士春風滿座酒生鱗

卽席贈吳辟疆

摯甫師令似

八歲能爲子固文，千秋盛業定輪君。  
論交我愧公沙穆，逕欲庭前訪異聞。

向歆同異兩扶輪，萬里丹山別緒新。  
賦罷高軒著原道，吳郎大是有心人。

### 悲歌奉季父

豈真才大難爲用，每念時艱奈若何。  
臣叔不癡臣已壯，一腔熱血兩悲歌。

### 將試吏河南留別都門親舊五首

閒雲出岫雨終虛，身世悠悠欲卜居。  
燕闕揣摩羞季子，梁園後至謝相如。  
尙餘橫海樓船夢，敢薄司空城旦書。  
玉宇高寒風正急，金臺回望渺愁予。

海水驚飛變益奇，小臣伏闕枉陳詞。  
穴中忌器難投鼠，亭外埋輪尙問狸。  
杜牧收罪言差共，諒朱游抗論竟何裨。  
高宗奮伐資良弼，十廟神靈與護持。

功名無分畫凌煙，得失雞蟲亦偶然。  
十載辦香尊許鄭，千秋采筆夢雲淵。  
南轅北轍成歧路，西抹東塗誤盛年。  
一遇知音更何恨，已丑癸巳胡告青張肖庵兩師力薦未售敬通久幸事名賢。

弦歌故事屬臣家，比牒叨隨計吏車。  
不分孫陽來朔野，周霖師恩幾同溫尉海南華。  
壬辰朝考詩幾以僻語見斥賴廖仲山師力拔之芙蓉

綠水終浮梗，星斗黃河憶使楂。  
國恥未忘良史在，問奇咫尺又天涯。  
北稍治時務書楊石漁仁山昆季獎掖尤篤

文章道義本相符，東海尋原舊指涂。  
不惜漢書供下酒，外

見子勤先生祇疑鄭圃誤還珠。  
門材濟濟丹山鳳，誦涵諸昆別夢依

依葉縣鳧出處年來思已爛毛生聊復博親娛

三十自嘲

三十鬢鬢歲月馳狂奴意態幾人知上書氣蓋陳同甫草  
札胸無劉穆之結習漸除犧斷尾壯心未已豹留皮抗塵  
從此供奔走回首津梁敢告疲

四郡眞鑄錯金厦屏障空憑依宜蘭已爲僑置縣赤嵌尙  
有海會祠橫流極天那可說補牢計晚焉能施迴旋少海  
日夜沸樓臺幻變煙雲非披圖重慨生已晚安得履綦相  
追隨我亦海濱一釣侶蒼茫南眺徒涕洟

途中哭王文敏公

庚子

忠節全家蹈令名從容絕筆鬼神驚竟無翁阮承平福雅  
有張錢翰墨名得天茶山皆以內廷翰林諡文敏誰使健兒摧朔虜似聞  
弱息付程嬰經師中絕人倫在白日昭昭涕泗橫

又哭袁重黎丈

握手乾清各慨慷遽聞東市涕浪浪百年伊洛悲戎禍一  
夕膺滂痛國殤鉤黨如斯從古少妖氛猶是極天狂忠肝  
掬取堅如石況有韓公萬丈光

左海

左海迴旋激沸湍，  
朦朧假道詎無端。  
馬訾江上東流惡，  
元菟城頭夕照殘。  
蔥鬱三陵終不改，  
會盟百載未全寒。  
先朝遺憾今須補，  
豐沛應增郡縣官。

送孫魏若京卿

寶琦

奉使德意志

龍節經年返帝城，  
又持璽詔向西行。  
濯纓重訪多門水，  
弭轡周諮伏爾鏗。  
一代君臣開霸術，  
聯邦文物冠歐瀛。  
穹閭聽徹玫瑰樂，  
歸及中朝憲政成。

送饒敬伯工部

孟任

遊學英倫

章貢此才難可數，  
幾年辛苦採玕珣。  
遠經白特求微學，  
深喜侯官有替人。

謂嚴君幾道

自控元蚪駕，  
溟渤伫看神駿出風塵。

胥黎賓塞皆支裔，  
西哲名言要溯津。

陳伯陶字子礪廣東東莞人光緒壬辰探花由編修歷  
官江甯提學使

送豫荃赴任卽題畫扇

豫荃如弟同年於羅浮之茶山洞架屋數椽爲讀書之所去歲陶信宿其間君時在京以散館改官浩然思歸適陶亦入京供職兩不相遇今年七月君謁選來京寓敝廬約其遊西山因循不果九月君選授黎城令近將赴晉臨別時出便面索畫因撰長句以敘兩年聚散蹤跡且訂歸隱之約時丙申十一月朔日

去年襍被羅浮去直到茶山最深處茶山松檜森參天中有萬丈飛來泉奔雲如馬挾飛電飄洗白練茅亭邊二樵



恒化香石死此景離合誰爲傳君時蘊落留京國山中寄  
君歸來篇歸雲入山泉自出猿嘯鶴唳悲潺湲電光一霎  
年華改忽忽萍逢燕市裏西山招手不能前何怪蓬萊渺  
雲海君今捧檄馳三晉斗大山城繫羈勒太行連雲西北  
來夸娥負出高崔嵬雪花漫天白皚皚羊腸九折車輪摧  
謝公蠟屐幾曾至葛令丹砂何有哉問君此去心何快摺  
疊扇頭要我畫我畫不能工我詩亦凡庸嗟我與君如巨  
蛩可憐勞燕分西東西山留我對晴雪太行送君衝朔風  
他時把臂羅浮路茶山雲壑同君住回首幽并衣上塵好  
借飛泉浣緇素

何藻翔字勰高廣東順德人光緒壬辰進士現官外務

部郎中有西行雜詩

七月十三夜過婆羅洲海峽贈船主

月黑天陰渡海腰婆羅洲外五更潮白頭浪蹴舵樓過風  
雨篝鐙立鐵橋

檳榔署江干晚步

五月星洲舶艤歸開春天氣雨霏霏胡椒椰葉江干路芒  
果熟黃魚正肥

芒果魚以六月芒果熟時登市其味最腴美

合是前身張黑女茜裙窄地影驚鴻珠題金紐衝涼屐  
晚浴穿衝涼屐飾以金珠口喫檳榔去食風涼之諺語

過方伯第門首

此間樂已不思蜀海外還堪種子孫金字榜門方伯第紅

毛丹熟滿山園

紅毛丹似荔枝而多刺 閩粵鉅商甲第雲連席門金字大書方伯第觀察第門前

印兵持槍鶴立家  
家有山園十餘畝

聞星坡海客言保護華僑回國事有感

少年無賴走南洋海禁森嚴詔捕亡白髮重譚嘉道事田  
廬無地感滄桑

印度河口

河流九曲滌天塹七十二沽形勢同無量恒河無量劫夕

陽遺甃故王宮

海口有廢宮英人拘囚印度王於此嘗與藏官來遊述之茲然

自大吉嶺入哲孟雄境

漠北峯巒萬馬奔

由岡底斯山山脈蜿蜒而來

西金鎖鑰控烏孫漫山

嵐湧雲成海驚瀑雷鳴石有門泰華一丸伸右臂江河兩

派入中原恒沙無量胡僧劫與廢何因問世尊

西金卽阿育王降生

地現奪顛佛敎尙衆去年英太子至印度議收回奪顛佛地事請西藏班禪爲印屬黃敎之主其謀詭矣

唐納山口望諸莫拉利雪山諸峯

唐納山高一萬六千尺諸莫拉利雪

山最高峯二萬三千尺爲地球上第二高峯

喜馬峯頭作重九四千年來得未有

使節由印度入藏者此爲第一人又登地

球第二高峯足以自豪矣

壯遊應在元奘前山賊不居靈運後咳唾落

地成江河蜿蜒五嶽皆培塿地平綫已沒西極天樞夜不

見北斗

入藏後不見北斗

凌晨雲氣排海出白晝怪風吹石走百

道飛泉出樹杪白沙銀礫聲細吼石間漩湫螺旋深古澗

斷冰鐵寸厚壤礪榛棘竄狐兔陰巖燐骨煨鷹狗中亞屋

飭天下脊北徼屏幃土囊口白頭胡賈出波斯歐亞孔道

通樞紐

英圖併後藏阿里越帕米爾阿富汗以通波斯天

灣與俄西伯利亞鐵路爭衡非徒窺川滇也

竺迦北葱嶺東宗教佛同居八九神奈山頭十字軍蒼頭

特起破械扭吁嗟乎二十世紀秘密國中原鼯睡無人守

泰西多少地學探險家足跡未到管窺牖自十六世紀歐人探藏者十一

家能至者五六人耳我來一萬六千尺雪山森峙驚奇陡巖腹雷火

燒虬松石罅人臂攬僵柳斜緣險仄不容腳下瞰巉巖敢

迴首磨驢旋轉蛇盤上東欹西倒誰援手十步九轉竹筒

吹倚樹小立憇復久下坡險似上坡難巖觸馬腹人折肘

山湖周圍六百里野鳬黃白成淵藪破驛香火狐鬼廟壘

石膜拜土木偶黃昏言投喇嘛寺人面破裂髮蓬垢甃甃

方褥繡佛龕且喫酥茶食蠻酒

曾習經字剛甫廣東揭陽人光緒壬辰進士現官度支

邵右丞

崇儆寺看花

悵望春歸十日陰落花臺殿更情深被闌碧葉如相語辭  
世青鴛不可尋物外精藍誰捨宅亂餘榛莽漸成林迷陽  
却曲饒憂患那得端居長道心

送蔣性甫侍御

式惺

在山猛虎今無用蔽日浮雲終古陰三穴未營饒兔計一  
官真擬汨羅沈虛傳賈誼酬宣室徒遣相如賦上林惆悵  
故人成獨往江湖滿地有還心

送秦曲靖

樹聲

十年虛鍊媧皇石萬里遙經黑水祠吾道聖賢輒相許夢

中歌泣復誰知還休暫動誠何意悵望蕭條併一時此去  
共傳邊郡美使君獨有髻如絲

送劉幼雲太史廷琛還九江

正愛清詩吟謝眺憶逢微雨過蘇端一年屢誤斜川約九  
折偏愁隴阪難舊業別來惟夢寐訖春歸思入風湍江湖  
滿眼今頭白何日從君把釣竿

送王撫州乃徵

遠下鸞皇閉九關更無鷹隼擊秋原匡牀諫草收殘篋歸  
路荷花感聖恩一郡江湖閒不極五更朝鼓斷相聞王尼  
虛有橫流歎又向新亭悵失羣

夏時濟字彝恂湖南衡陽人光緒壬辰進士官度支部

主事有環媛館詩

久客金陵與樊雲門方伯  
趙仲攷觀察時相唱和

### 秋感

數點浮雲蔽太清西風總是怨離聲  
蕭蕭柳葉殘蟬嘒瑟瑟蘆花旅鴈鳴  
潭水沈天留素質空山弄月墮寒晶  
霜原劫火明還滅解惜草根螻蟻情

不見佳人玉佩投每逢蕭瑟強登樓  
哀吟漸識孤居樂歡宴難消閱世憂  
空氣玲瓏明月夜靈魂窈窕故宮秋  
龍蛇進退天難問頑石無瞳也淚流

遙山合沓入新妝寂寂峯陰惻惻涼  
綴陣孤鴻憐夕照鳴皋一鶴向朝陽  
臨歧軌轍雙旌綰倚劍雲霄百寶光  
蕙芷前途正搖落長風好護辟寒香



沈沈海垢逼邱樊，慟哭遙疑笑語喧。  
優孟登場金粟影，衣冠塗炭木樨魂。  
丹楓斲盡知心赤，紅豆生時帶血痕。  
回首蓬萊雲五色，荷恩齊唱望仙門。

落花 三十首錄七

瑤臺一笑記相逢，神女聯翩玉雪容。  
偶涉靈湖看竹淚，何嫌劫海寄萍踪。  
人間粉黛空山少，天外蓬萊紫閣重。  
別樹羈雌眠不得，等閒飛上最高峯。

氤氲激戰祇須臾，一片寒蕪繞四隅。  
作陣摩空霄路迴，飛香點水海程迂。  
鶯歌送日千聲怨，蟾魄窺天尺壁孤。  
若過虞淵聽鄰笛，淒淒晷影闕黃壚。

津橋極望杜鵑啼，一霎懽娛易慘淒。  
霆怒難迴參正果，星妖漸見發新萸。  
橫拋赤燧添秋色，誤買黃蓮供艷妻。  
多謝

西鄰紅粉女空勞妙腕護娉婷

滄海何緣積劫塵自然種果自成因鳴天射鏑宮翻徵貫  
月迴樣秋復春碧落飄零紅袖侶朱樓絕倒白頭人楊花  
作絮浮萍老誰識寒松是後身

何年烏鵲向南端雲樣紛飛月樣團墮地無聲空色相生  
天有路卜支干長虹抱日藏頭角么鳳凌霄惜羽翰閱遍  
芳韶憐眼倦孤愁欲逐太虛寬

風雨鷄鳴感昔賢金刀復漢護危顛岐封舊識真龍氣華  
表難逢化鶴年紫塞埋胡成錯料白山雄鬼迭爭妍天輪  
若使真仙掌管取春同玉宇前

無端痛哭對關河一柱孤擎奈爾何桃葉迎來纖影悄海  
棠聘後夢痕多萬方兵氣沈黃海九月繁霜罨翠娥舊醲

休辭連夜飲深宵起舞爲誰歌

仲弢和落花詩依韻奉酬 三首錄二

左徒幽怨鬱忠鯁一寸貞魂萬劫哀嶽秀千尋鬪殊色湘  
靈終古起騷才

黑塞青林生別淚國風小雅逐臣心江湖未必成寥廓好  
聽蒼龍韶濩音

滇事日亟仲弢奉錫制軍電調戒行疊樽字韻致笙  
兒枕上次韻口號奉和

漫呼江月泛鳬樽終古沈酣旦又昏大陸蛟龍雷電跡巖  
寒松柏雪霜痕離心漸指飛鴻遠奇氣難銷射虎魂君到  
昆明更長嘯東山管領銷吾尊

曹廣權字東寅湖南長沙人光緒癸巳舉人現官禮部

右參議

春夜會飲放歌

時庚寅二月十四日

纖雲吐月天無塵紅欄夜霽花光勻春月如煙已流碧明  
日花朝又芳夕良辰促坐從吾曹狂奴意氣凌雲高屠門  
大嚼不稱意痛飲惟論千日醉黃郎遊俠天下無掉臂遊  
行卓女壚微金尙買娥眉笑綺筵紅袖初照耀卷簾看月  
月無垠眼前樓閣昏金銀玉人不惜釵頭鳳取映蟾輝撥  
春甕流霞變色翠盈盈皎如絳雪調瓊英就中飲者弟與  
兄酩酊面面不得頰叔度溫潤白玉瑩余亦有季同冰清  
季重惺惺自解醒六郎電閃巖下晴

座中有黃飮勤教諭  
係黃蓉瑞之弟六郎

謂蓉舟觀察亦  
係雁舟之弟

一人惜抱餘春情四座爛朗花魂驚起視

疏星轉瑤漢今夕春陰未將半  
瞥眼歡踪墮夢痕地北天南各愁散  
君不見銜蘆孤雁鳴哀哀往來只傍洲水涯微禽惜別尙如此況是華葉連根  
芟天涯此夕同仁五姪娥豈識人間苦一槩  
潞洞江上水多少離愁照將起茫茫人海氣亦腥  
世事險穢那可聽萍梗離合不須說今日歡場暫言別  
歸宿空房獨淒絕薄醉朦朧迷眼纈呼童强埽階前雪

題漸西先生富春歸隱圖

山河樹影五洲畫本胡然廣輪寫形無遁芒芒中央不逢混沌懿歟先生抱朴潛真止止虛室縣縣若神勞民之國乃有哲人披圖忘機體絕埃壘樓林雪積紫谿霞帶且喜莼鄉爰居嚴瀨先生標之達隱山岬羊裘釣澤信美吾儕

閑遊戴贊歸去陶懷遐想何爲畢志相從國步艱難王臣  
匪躬覲帝鈞天戴斗崆峒股肱喉舌有命自后九譯方來  
萬邦爲友勦力神洲爭迴地紐悠悠南北臣實馳驅回首  
江潭悽愴于湖俯仰陳迹孰云非虛何況八公廨牀立蹤  
聞仙乘蹻浮邱躡節會須黃髮言尋赤松溪山蒼蒼白石  
鑿鑿無曰招隱有如監約歸與孔詠時哉季諾

附原函云漸村先生由蘇藩入覲旋調直藩未赴任卽  
改太常寺卿仍入總理衙門行走出此圖命題因成是  
稿是時先生已倩沈君思齊惟賢爲築室富春蓋己亥

春日事也詩稿不存追憶錄之脫誤不全聊塞盛意

師鄭同年鑒 弟廣權頓首

余旣從袁太常于湖題襟集內輯得曹東寅同年春秋

宮詞凡二十首將以錄入四朝詩史適令弟梅觴提學

廣楨將之吉林赴任道出津門東寅送之假寓馮果卿

觀察汝桓齋中握手歡讌互道契闊余向案篋中吟稿

並論庚子年太常被禍始末傷今弔昔磊塊澆胸酒酣

耳熱狂浮大白東寅因追錄以止二作見示且謂庚寅

春月之作彼時梅觴將之岳州飫勤將赴桃源雁舟將

入都聚而復散感觸良深故有瞥眼歡踪隨夢痕地北

天南各愁散及微禽惜別尙如此況是華葉連根萋之

句今日津門之讌飲情形頗與當年相似而時局之艱

危老成之零落則回想已丑庚寅之歲已不啻玉堂天

上矣瞻烏誰屋客雁思羣對此茫茫能無百端交集乎

戊申九月師鄭附識

鄭沅字叔進湖南長沙人光緒甲午探花現官翰林

院侍讀南書房行走

辛丑十月二十四日夜宿華陰縣城明日偕縣令劉友石同年游玉泉院而別途中賦詩紀之

天公何年揮神斤削石爲山鏡入雲偉哉元氣何細縕我來華陰日已曛高屋當前莽無垠賢令劉君秀而文說山使我心歡欣曉光侵櫺猶未分相將火急趨朝霧玉泉舊院君更堇 羣華前月臨翳粉有泉冷然新導分有樹不復憂如焚院中有無憂樹希夷往矣今惟墳劉君招邀情良殷屢示絕頂誘我勤我行勞勞指澮汾不辭攀涉手足輒但慮投書別同羣將以梯取重煩君作詩謝君聊云云華山仙人應已聞



和琴志用荆公高齋韻

昭陽麗質魂已埋阿房之殿土空筵惟餘南山一片石長  
與明月相磨挨我居長安忽五月當暑坐念青鬼鬼開軒  
南望日心醉何況置身金碧堆二三同志亦有癖招邀車  
馬翩然來初迎谿水便清冽細路油滑何艱哉古木槎牙  
裹蝕鐵洞石嵌鑿陳天杯相連百步輒一寺漸豁遠目窮  
九垓孰云此山幽且靜赤日亭午喧風雷巖花無名自開  
落百鳥競噪相觚排褰衣不意到絕頂自謂厯輔與登台  
回看太乙尤奇絕萬馬奔赴天門開吁嗟易子不得往惟  
有春夢飛陽臺我生事事落人後此行應免爲俗哈何時  
能游與攜酒白雲天半傾長淮

劉錦藻字澂如浙江烏程人光緒甲午進士現官候補

四品京堂

題子瀟先生雙紅豆圖遺照

黃裳飮坐態翩翩一卷流傳百十年九轉丹成犀兩點姓名  
早注有情天

日暝藍田一掌平呼龍瑤島起煙耕錦幡穩護春如海莫  
更銀河風浪生

東海塵揚幾見將丹砂擲罷五銖涼天長地久靈鵲會會  
見麻姑鬢有霜

手撷明珠贈漢皋溫磨心事訴雲璈靈修漫傍滋蘭晚怕  
惹離愁又續騷

九醞香醪酌叵羅歲蕤冶思比紅多分明鐫豔茗華瑤要

化濃春十二窩

春風吾谷絳桃開豔豔香名冠玉臺記得緋英勝紅豆引

教劉阮入天台

先生鄉試房師阮昉巖會試房師劉雲房故師鄭同年述德詩有親入天台遇劉阮

前身應本住仙鄉之句

身本文昌第二星芙蓉手把叩瑤局青雲千呂扶搖壯又

見曾孫會幔亭

先生鄉會均列第二集中有注定文昌第二星之句師鄭癸巳北關甲午朝考均列

第二故云

雙聲絳樹麗情兼的厯珊瑚瀉玉匳可惜貞元老朝士不

偕記曲棗花簾

卷中自乾嘉以來名宿題詠各體俱備

陳昭常字簡始廣東新會人光緒甲午翰林散館改主

事現官吉林巡撫

挽張文達師

百熙

三首

諸公衮衮一邱貉來日茫茫赴壑蛇廣廈萬間今已矣名  
流百輩重吁嗟禁中定議無留草

立憲

詔下

海內新機

遽折芽大雅淪亡誰領袖不堪遺策續長沙

官職聲名孰與齊褒榮華袞典堪稽盛時紀阮相輝映並  
世毛張互品題萬古雲霄空悵望中興豪傑失攀躋開通  
公獨超先輩星宿探源到海西

當年史館曾相識遶道音書久未通說士似聞甘勝肉得  
官何事臭如銅九京可作期無負兩月相依愧不終便忤  
孫劉何所恨此生無夢作三公

庚戌中秋前一日同人集子明司使衙齋爲壽余以

阻雨不克赴會偶成二律奉祝兼以自寓

季子聲名日下傳一行作吏尙翩翩逍遙蒙叟人間世接  
迹何郎明月篇仙侶同舟逢此度瓊林重宴卜他年愁霖  
祇覺余難遣無限秋心屬邈縣

庾亮南樓不可尋松江萬里接重陰中流簫鼓音全歇大  
地山河影欲沈寂寞魚龍窮變化沈寥鴻雁倦登臨悠悠  
長夜成何意空結離騷一片心

自注云撫時感事不自覺其秋氣之盈楮也

送黃秘書雨之南歸

鱗角牛毛共譽君海天遙隔一相聞獨尋孔墨廻風氣大  
好江出悵暮雲湘楚功名旋黯淡貞元黨論尙紛紜定知  
海上成雙笑經卷鏤香好共熏

癭公寄贈新刻散原精舍詩疆邨詞索詩爲報賦此

寄呈

當代數文豪二妙未識面零縑與碎錦寶光時一見癭公  
江漢回東南走羣彥貽我雙琅玕入案忽璀璨卓哉散原  
詩千淬復百鍊字字雙井心篇篇小雅怨載詠疆邨詞旨  
遠非近翫七寶絢樓臺拆碎成片段憶從同光來文體亦  
屢變根柢蕩詞林俗子耳目眩譯語雜侏儻新名紛點竄  
家法挾樊籬宗派益支蔓義寧名父子辛苦守遺研侍郎  
篤師友腹痛情繾綣挑鐙百回讀心維目不倦古來工文  
章端在多憂患二公廊廟姿目睹家國難江湖戀魏闕忠  
愛託豪翰流傳此文字身世已可歎峨峨文選樓屹屹靈  
光殿裁詩報故人愧未涉涯岸

南昌電來聞故人黃梅伯死耗書此志哀

懸榻虛廊尙待君伊人何在死生分九京可作應誰與百  
世相知在定文作賦江南哀庾信寄書滙浦望劉蕡天涯  
別有傷心淚灑向松花對夕曛

中秋夜半見月示幕府諸君

憶昨沈沈風雨夕預愁玉宇芳辰寂中夜孤吟聽簷溜詰  
朝祀事登長白曉來微見日矇眊僕馬趨踰戒行役遙瞻  
嵯峨鬱佳氣萬松洗出煙鬟碧禮成緩歸日未哺新晴映  
帶郊原色令節飛牋寄元賞材雋翮聯集裙屐中天未覺  
流雲吐恨無高樓吹玉笛須臾橫空縛大帚一掃纖埃溢  
無迹居蟠顧兔休自矜三五而盈非汝力試從前夜望今  
宵人世升沈庸易測太清但令無穢滓豈懼陰精遽淪惑

闕心東海方揚塵。見驚傳主鋒。鎬松江照影。波濤深。蛤蚌珠龜盡。潛匿停觴。欲問天方醉。海宇狼烽幾時息。安得長劍倚蒼冥。指揮衆星環八極。諸君不飲奈明何。斫地悲歌唾壺擊。五陵王氣今尙存。與爾賞秋浮大白。

北山集和數菴韻

踵武陳黎二妙傳

君與令兄癭公並有文名。獨漉二樵均順德人。

試將秋實比春

妍。旌旗在眼空留影。琴瑟無心付改絃。閱世山川容坐嘯。傷人哀樂入中年。興來亦有尋歡處。木落長悲恐未然。

孝先梅訪錫臣諸公各用余壽子明元韻祝余初度

子明旋亦繼聲勉賦四律分謝四公

句繡弓衣海外傳。後先軺節記聯翩。

余與孝先出洋相隔十年。觀風應

續轡軒。錄補雅欣聞潔白。篇努力匡時迴泰運。同心憂國



盼豐年仲華車下壺觴滿治譜親承世德繇

子建才華曠代尋煎茶鎖院碧桐陰記從楚國箋天問莫

對新亭歎陸沈傷節卽今文治闢吉林未改行省以前學使不到陪都猶

望屬車臨攬余幼讀靈均賦敢忘滋蘭樹蕙心

孝穆門庭世共傳分明鳳翥與鸞翔來漢壘秦庭外解

讀山權國準篇猶有黃花驕晚節何堪錦瑟悵華年余與錫臣

同有悼亡之戚未成一事慙官職馬齒空增歲月縣

嶺西燕北舊追尋曾見甘棠蔽蔭紅樹白雲秋易渺瓊

樓玉宇夜方沈登高幸接詩人躅聽訟爭迎直指臨歲月

侵人愁短景江湖滿地負初心

呂承瀚字潤生湖北武昌人光緒甲午進士現官福建  
巡警道有海嶽樓詩存

伯牙臺覽古

鍾期聽琴伯牙老荒臺一角斜陽道千秋只此賞音人  
人去屋空賸芳草軒開四面浸綠波湖光山色堆青螺郭外  
煙雲自繚繞羌無樵子重經過山月照人星欲落孤猿嘯  
醒巢林鶴俯仰今昔年復年安排琴枕沈寒煙蔓草青青  
動客興儘有清風相持贈長歎一聲問鍾子落花無情滿  
三徑江流隔岸盪心胸江聲激處排魚龍留得此屋竟千  
古當年聚散雙萍蹤我懷其人顏如玉爲有高山流水曲  
閒攄胸臆抱琴來眼底莓苔長新綠

寒夜

四朝詩史甲集卷六

三

昨夜寒雲飛院落今宵積霰尙階前朔風無力半窗靜皓  
月當空一鏡圓容有松枝支鶴睡却憐燈影伴人眠含情  
羞向梅花訴兀坐長安雪後天

除夕

明星連綴天圍碧海宇喁喁共今夕長安宮舍何寂寥中  
有楚江未歸客楚江遙隔三千里欲歸不歸怨春水連宵  
好夢空還家人在天涯心尺咫我常自歎不如鳥如鳥反  
哺親心娛我歎人生不如燕秋燕辭巢春社見此身誤入  
名利中飄泊萍踪西復東噫吁嘻寸心無盡歲易盡待我  
陶然一醉舞東風

延生

蕙

因事告歸賦贈一首

吾儒自有千秋業世事乘除總逝波三尺劍芒奇氣滿一

殷書味古人多常將白日明肝膽莫怨青山誓薜蘿師友  
傳燈詩卷重杜陵心迹又東坡

西郊晚眺五疊前韻

踏遍寒雲吾不樂此情脈脈古城頭花沈東閣香難覓雪  
壓西山陳欲流碁杵敲殘紅日影關河盼斷碧天秋蒼茫  
四顧橫江水千里晴波有宿鷗

晨起對鏡

天道不可識我生徒增傷喬松千歲壽琥珀蓄其光流水  
下寒瀨江河清且長人事有終極感此雙鬢蒼少年鬱劍  
氣梧桐升朝陽壯夫悲末路華髮飛秋霜冠珮愴然失尊  
酒置高堂舉杯三歎息七尺何昂藏晚節須自愛努力持  
天綱

官學同人餞於西華門外酒樓

銀鐙高掛夜傳杯無限情懷暮雨催清閣橫開春夢了茗  
香初縱月華來靈山聚衲有今夕酒國塵兵盡霸才我醉  
獨生離別感壺觴何日許重陪

出都門

一鞭擁翠出長安驛路風光曉色殘煙鎖薊門千樹暗雨  
餘昨夜十分寒對人羞理黃金橐據馬私憐白玉鞍卻立  
征途更回首帝城雲物鏡中看

杜康臺

宜城斜枕襄水濱有人緩唱宜城春宜城春色不知數風  
月成鄰楊柳路此中舊是杜康臺破甕生涯無朝暮當年  
醞釀春風天阿誰醉倒春風前日高三丈斜照戶一杯又

送明月圓可笑劉伶不解事直到酒家謀一醉又笑長安  
李謫仙誰家酒市貪晝眠此地此臺閱千載醉翁之醉何  
年代兒曹訪古爲流連荒草斜陽感興廢兩兒從詩邇來好  
事幾狂徒酒罇一一城東隅秋風颯颯動客思欲往從之  
提百壺百壺可以澆我腸醉時大叫蒼天蒼眼中有酒無  
杜康

郊行同宗室厚庵

崇寬

熊文淦

紹周

周蘭泉

濂聲

終日閉關不出門卷曲蛺蝶常鴟蹲宗卿知我苦鬱煩爲  
我倒傾紅榴樽酒酣攜手遊芳原斜飛鴉背高負暄帝城  
遠近氣吐吞上有交龍百尺幡下有流水聲潺湲碧流盡  
處接雲根坐看白鳬雙翎翻幾家碌碌垂楊村打麥聲起  
黃雀喧老農粗俗前致言今年香餌足饗殮怪底催科吏

太煩 聖主有恩官無恩吁嗟顚蒙遠 至尊吾儕素餐  
何足論言罷日落天黃昏白雲紫燒西山痕飛鳥上下遊  
子魂望鄉不到望崑崙歸途悄悄返寄園星斗在天手欲  
捫

景 媛字佩珂滿洲廂藍旗人光緒甲午翰林散館改

刑部主事現官翰林院侍讀學士有北征草

青岱阻雨 三首

風雨共颼颼驚心夜不休紅搖燈似豆紫泛水成溝補漏  
人聲沸停驂使節留四圍山抱處疑與岱宗侔

倦影息穹廬今朝又卜居限高門似寶甃覆木如梳苦雨  
離愁裏腥風戰血餘欲行行不得枕畔讀新書

昨夜雨風俱征輶駐虎符川疑經敕勒臺欲上單于近鄙

分邊界遺風問上都

察哈爾內八旗至第八台止  
過此蒙古多元太祖後裔

酒懷詩

膽壯何事費踟躕

路經滑角山

月光曙色雨濛濛喚起行人睡夢中石隙花開紅爛漫

滑角



山石隙花開甚紅  
雨餘草長綠龍蔥  
失羣孤雁橫空過  
得食蒼鷹掠地雄  
馬上馳驅巾幘健  
果然不亞木蘭風

山頭隱隱射朝曦  
曉發烏蘭哈達時  
到眼岡巒流水過  
驚心車馬落星馳  
千年蘚古黏枯石  
數點花新上老枝  
百廿里程俄頃至  
寄言僮僕莫猜疑

暮抵吉斯洪果爾

屈指行程出玉門  
輪蹄何日到烏孫  
紅黃山作珊瑚色  
黑白雲堆玳瑁痕  
芳草平原雙鶴立  
蒼厓絕頂一鷹蹲  
元家大業今安在  
煙靄濛濛枉斷魂

早赴烏蘭哈達

漢室功名衛霍尊  
燕支山上草成墩  
至今石盡爲紅色  
疑是當年戰血痕

張其淦字豫荃廣東東莞人光緒甲午翰林散館改知

縣現官安徽候補道署安徽提學使

挽鄧壯節公

世昌四首

少年投筆去意氣似班超異域星霜變重溟瘴霧消投壺  
閒把酒倚劍欲干霄南海波濤闊深秋別思遙

隱隱檣帆列煙迷鴨綠江合圍誰陷陣飛礮激驚瀧雲合  
鳥偏散羣孤雁不雙隻輪飛去似鼓力怒相撞

閩江與粵海相較意如何未慰同舟願愁聽棄甲歌蒼茫  
誅馬謖惆悵失廉頗落日愁雲起瀾翻怨老鼉

遐想度遼策眞留海上名中流憑砥柱他日憶干城鷁首

歸何處鴻毛死笑輕鬚眉洵不愧遺貌識眞卿

公有遺像洋人爭購

都門秋思

六首錄四

聞道遼東未止戈，秋深時節雨風多。  
西山爽氣凝青黛，南浦離心漲綠波。  
連日送友回鄉萬里絮飛知客去，一聲花落奈君何。  
朝臣誰似宗留守，日落蒼茫喚渡河。

年來世事海茫茫，淝水難求古戰場。  
誰築黃金延郭相，虛

傳赤壁美周郎。

報紙屢傳中國勝倭

蘆溝楊柳添愁緒，瓊島芙蓉著

曉霜。莫向觀星臺上望，元菟明月蔽雲黃。

瓊樓玉宇鳳城中，萬里關山月色同。  
孰是驪黃多熱血，可憐鴨綠起涼風。  
年年憤事遼東豕，渺渺愁心塞北鴻。  
漫賞陶然亭上雨，滿天秋色老梧桐。

花泛天津有斷橋，杜鵑聲裏酒旗招。  
龍蛇山澤人難測，猿鶴沙蟲恨未消。  
驚起夢魂燕市筑，湧來心血浙江潮。  
登壇此日無韓信，空拜將軍號度遼。

挽常熟翁協揆師

直爲蒼生哭不休，騎箕傳說自千秋。百身可贖歌黃鳥，五載閒居狎白鷗。極目依然星北望，傷心曾見海西流。祇今

宋玉招魂處，鄧尉梅花土一邱。

夫子罷歸會居鄧尉

羊公有鶴愧氍毹，知己平生感不窮。褒鄂精神期報國，杜房相業在和衷。有人朝服歸東市，

謂趙舒翹英年二尙書

羈客棠梨

對殯宮

謂剛中堂毅

迴首秦關無限恨，算來福澤尙輸公。

祇有丹心翊巨桴，掛冠神武去無情。辨姦幾輩知盧杞，愛士當年薦禰衡。故國風塵驚歲晚，他時月旦聽公評。少陵獨抱安危志，欲著麻鞋淚暗傾。

海上仙龕跨翠鸞，歌聞薤露路漫漫。未頒周顗黃金印，已下王喬白玉棺。五鳳樓高詩草麗，九龍山迴墓松寒。牙琴

從此徽絃歇不遇知音不復彈

甲午三月京師誌怪詩

右安城門當晝晴野畦淺水蘆葦平忽有怪物如牛鳴路  
人千萬皆聞聲喧傳遠近草木腥街衢入夜無人行或圖  
其狀如蛟鯨似虎搖尾龍轉睛巨鱗修鬣腹彭亨魍魎罔  
象莫識名日午健兒敲銅鉦戈矛森立車衢輶擊以巨礮  
雷霆訇如臨大敵心怦怦登刀踏火道侶迎敕召六甲與  
六丁呼星喚鬼與怪爭怪殊不懼反自矜若鳴得意聲無  
停健兒咋舌雙目瞠拖泥帶水如履冰道人執劍走野亭  
護身符呪嗟無靈我亦隨衆來郊垌鳳城景物爭春榮麥  
芒漸綠柳眼青輕風轉蕙晚照明鶯歌燕語調鳳笙萬人  
如海身伶仃枳籬薤隴側耳聽鳴蛙噪蚓集衆蠅心知其

誕笑語傾嗟哉危坐高官形柳陰歧路支涼棚藉資彈壓

列眾兵更欲紛調神機營

步軍統領福相國身臨

舉國若

狂誰使令解人難索繫我情石言蛇門傳所稱妖不自作

山人興見怪不怪真典型諸公袞袞來槐廳紛披宮錦帶  
雀翎口蜜腹劍利交征誤人家國傾人城此真怪物是咎  
徵災祥在德天所憑反德爲亂妖災生嘻嘻出出聞於庭  
我欲射之弓陰弮檣机饕餮服上刑天爲一笑河爲清人  
妖旣除邦乃寧物妖有象禹鼎呈何至妖異喧神京

乙巳遼東感事詩

錄五

于今南牧已駸駸夢入遼東感不禁天地無情仍戰伐江  
山如夢怕登臨錯疑赤伏將符獻豈信紅燈兆陸沈若問  
柳條關外路敵人久蓄虎狼心

忽唱扶桑出塞詩  
楚王投袂意堪疑  
東隣不惜餘光照  
北伐誰能六出奇  
子產有才供鄭賦  
包胥無淚乞秦師  
可憐同室終朝鬥  
披髮纓冠袖手時

萬里長城入戰場  
三辰誰實寄封疆  
遼沙帶血流波赤  
鐵嶺傳烽燒草黃  
竟有大羊環卧榻  
算來戎馬易滄桑  
黑龍江上龍旗影  
留與波臣話短長

入手楸枰局局新  
蒼茫呵壁問無因  
銜冤精衛難填海  
痛飲黃龍大有人  
兵弄潢池朝脫甲

指奉天馬賊

風生黑水暮揚

塵將軍獨有平夷策  
桃李新年望好春

玉碗金輿出帝庭  
五雲宮殿鼓雷霆  
一坏土向長陵盜  
萬井煙迷戰地腥  
白骨不分蕃漢種  
青山莫問短長亭  
令威化鶴歸來語  
烏咽遼河不忍聽

周紹昌字霖叔廣西靈州人光緒甲午翰林散館改刑  
部主事現官大理院推丞有霖叔詩文稿

庚子都門紀事 一百首錄十五首

鐵錯平空鑄六州妖星夜半落旄頭縱橫城社驕狐鼠奔  
走風塵類馬牛露布交馳虛報捷宵衣勤御苦持籌諸公  
袞袞稱馮翼可惜人謀誤鬼謀

長安風定月輪高萬戶人聲駭怒號兵火飛揚生輦轂香  
煙馥烈繞弓刀譚天有口窮三耳斫地填膺感二毛引虎  
深山還自衛只愁牧馬問臨洮

紅燈照夜燭天閭翠羽金枝銜異光神女山中空有夢飛  
仙海外本無鄉幻成蜃市凌虛影貌到鸞車絕世妝讀罷  
小戎翻一笑行雲端合想衣裳



四朝詩史甲集卷六

七

唐鑑卷之一

礮車百道下奔雷  
滄海魚龍噩夢回  
忽地甲兵環虎穴  
連宵烽火照鸞臺  
藁街徒召蠻夷衅  
謀國空勞將相才  
咄咄書空眞怪事  
一條軟繡陣雲開

天府神倉堯北門  
盤雕落日下平原  
三軍持憲廉頗老  
八部聯盟頡利尊  
熾火焚旗秋黯黯  
壞雲壓壘晝昏昏  
頻修矛戟忘同澤  
孤負中朝買鬪恩

月黑重圍鼓角涼  
排空赤雁掠青霜  
從官飛檄無枚叔  
別將衝鋒少定方  
驚鶴亂行臣罪重  
龍蛇在陸國憂長  
封疆已蹙惟須死  
被髮依稀下大荒

杼柚頻空大小東  
籌邊籌國兩無功  
綢繆桑土天多雨  
荒落蕪城日貫虹  
扞網權輕中執法  
點金術拙大司農  
曉來聽漏麒麟殿  
玉女牕扉半倚弓

衰宏碧血痛龍闈東市爭迎家令衣自是小臣辜薦牘敢  
云上帝閉深扉劇憐獨活紅顏少欲詠同歸白首非虎豹  
當關羊在牧騎箕怒挾萬燐飛

文成奇獄具王鉄驀見霜飛六月呼左道未干持斧怒沈  
寃翻作竊鉤誅鈔連瓜蔓輕螻蟻傳遞烽煙恣貌猶白日  
昭昭圖圖上覆盆誰爲雪無辜

疇咨岳牧重疆臣弓矢專征九命遵豔說麒麟圖紫閣幾  
會鴈隼擘黃塵歛獻嶺表誰陶侃飛輓關中少寇恂坐視  
天驕張戰幟腰金照地爾何人

咫尺河西路阻深傳來消息半浮沈關山千里頻蒿目風  
雪三秋警草心石齒簾穿危睥睨峰頭木落怯登臨鴛絃  
彈徧知音少漫把微波託素琴

驂鵁翔虬上下招屈平忠愛寓離騷祇今夏沼猶銷暑自  
古秋江未解潮之子不來鴻雁遠可人無奈鳳鸞飄一編  
竟夕挑燈讀掩抑荃蓀狀鬱陶

倚劍崆峒事已非健兒久戍倦思歸爭隨馬足揮銅槩笑  
掠蛾眉伴鐵衣道遠不愁輿轎少城空翻喜橐囊肥達官  
徒步猶趨直餘燼難收烈焰飛

平蕪氈帳插千層雉堞荒涼未可憑衰草粘天纏白骨長  
楊踈地走朱膺選聲別館豪盤馬肄武高臺說瞭鷹記得  
上元簫鼓夜踏歌綺陌走春燈

疾風勁草挺盤根千古綱常繫一尊含笑九原同父子酬  
恩三世及公孫珥彤待紀忠貞里綽楔應旌孝義門天柱  
地維賴撐拄長留正氣滿乾坤

汪述祖字子賢號著林安嶽休甯人光緒甲午進士現

官吏部員外郎有著林詩集

瞿園同年以東遊草見示卽次其題余雙藤寄廬圖

原韻奉題一首

袁子詩才今坡谷更譜新詞壓竹屋海外文章益雄奇我  
今日誦萬徧熟憶自與君同曹司衙齋幾見古藤綠公餘  
論文興尤高別後相思手仍握昨年君作東瀛行直欲乘  
槎犯斗宿已從滄海駕六鼇還向扶桑濯雙足佳句一一  
錦囊收揮毫幾令中書禿舟過神戶哀王仁驂停熊野弔  
徐福馬關二章尤愴絕懷古蒼茫淚盈掬彼都人士爭倡  
訓前于後唱聯珠玉要知中邦有人文自古及今信郁郁  
讀君一卷東游詩如聽胡笳十八曲一詩傳鈔手爲紙不

如雕刻付棗木遠追中郎近隨園箸述定可千秋祝祝君  
更早樹功勳毋僅悲歌杜陵續

### 城門高

都門夜夜嘯城狐城門失火走羣烏  
諄諄出出城上呼虬柱虹梁一炬餘  
翠華西幸復還都城闕重新煥規模工  
師采木海國隅展轉萬里飛舳艫大者橈棟小構櫨施以  
刻鏤塗以朱帝念民力無征輸羣臣獻功爭奔趨或出  
金貲佐國儲慷慨輸將卜大夫樓成行賞寵遇殊達  
官顯秩紛拜除金印煌煌佩玉魚紆青拖紫及臺輿吁嗟  
乎修城紀功功不虛守城受賞賞何如

### 嫋嫋曲

有美人兮來嫋嫋翠眉黃額唇凝丹舞衣長袖縫齊紈腰

閨玉佩青琅玕紅牙拍板鏤沈檀清歌嘖喉氣若蘭瓊柱  
金絲取次彈蓮漏丁東宵未闌滿堂珠履坐團欒酒進蒲  
萄綠不乾蠟淚凝紅堆燭盤鬢蟬釵燕幾挂冠翩然青鳥  
來探看殷勤上訴翔雲端美人愕貽顏不懽去如驚鴻避  
金丸絳河清淺起居難寄鶴一書勸加餐

楊華曲

青春三月楊柳花隨風飄入五侯家侯家簾幙重重護絮  
亂絲繁天亦遮綠柳枝上鶯無數宛轉嬌啼天爲曙叵耐  
東風上下狂卷簾仍放絮飛去莫言飛絮易飄零未肯江  
邊化作萍年少王孫親折取章臺柳色倍青青王孫走馬  
章臺曲道上行人目相屬夫婿封侯未可期陌頭楊柳年  
年綠楊柳陰陰鎖翠樓一番驩喜一番愁春來柳絮迎風

舞春去楊華逐水流

陳列所謠

傑閣凌霄漢經營費萬千何人師卜式慷慨納金錢

富商吳燃

鼎報效工程五萬金商部人告得獎京卿

百丈鵬黃錦下金狐白裘明珠光燦爛更列最高樓

制器師前代猶傳景泰名蔚藍天一色仿造徧東瀛

京師王藝

以景泰藍爲最日本人亦學製

采綠多休暇同占五日期遊觀不辭遠日暮莫忘歸

星期第

日縱婦女遊玩

張鳴岐字堅白山東海豐人光緒甲午舉人現官兩廣

總督

九日登高放歌

此詩爲制軍歸業南學時所作由友人輾轉抄示師鄭記

巨靈夜擘華陰掌芙蓉拔地三千丈西風吹我最高峯一  
筇去叩天門上九關漠漠不可開蒼茫今古生奇哀酒船  
百斛銷不得莽莽塵界飛黃埃長安宮闕浮煙霧君門不  
見空回顧飛甍接棟鬱嵯峨云是當年徙戎處憶昔初通  
東海波十洲琛寶紛星羅不因幪布開叩焚偶思蒟醬來  
牂牁是時中國方全盛治隆粲晏洲澄鏡虎頭都護任班  
超票騎邊功羞去病樞臣漸失叟維策防秋烽燧愁砂磧  
黃龍清酒事如何梨樹金柳難再得海波蹙紫天風高長  
鯨跋浪驅靈鼉但許仇鸞拜平虜太阿有枋甘人摻牢儘



亡羊問誰補銅駝陌上寒秋雨書生不合死沙場上書空  
憤陳同甫我欲因之叫天闕猛犬狺狺煙霧沒寶刀斫斷  
佞臣頭一腔熱灑朱雲血我欲因之達天閭蒼頭十萬吞  
封狼功成復訪赤松子秋風叢桂飄新香如何瑣瑣爭牛  
後北場南館紛奔走扶搖莫化北溟鵬折節空屠燕市狗  
興酣落日西風來層雲萬里生陰霾人生只有一杯酒螟  
蛉蜾蠃安能猜

冒廣生字鶴亭江蘇如皋人光緒甲午舉人現官農工

商部郎中在任候補四品京堂有小三吾亭詩文集

汪郎亭師 鳴鑾 招飲卽席賦呈 六首錄三

時局艱危換奕棋思量爛熟要官時南山種豆天無罪東  
海成桑事已遲碧血祇憐新鬼哭白頭仍荷 聖人慈黃  
門北寺紛紛是不信君看黨禁碑

百年三萬六千場莫上胥臺更望鄉 帝里鶯花常寂寞  
故人雞黍暫徜徉樂天洛下耆英集宏景山中日月長結  
箇茅庵佳處住白雲蒼狗祇尋常

北海琴尊敞畫屏疏慵到我眼猶青夢回錯過慈恩塔老  
去休題野史亭一代斗山成著述千秋風雨走精靈莫愁  
孝肅終無後耿耿霜河嘒小星

贈孫仲容刑部

論讓

許鄭無文章任沈寘經術千古滕薛爭一言齊魯失觥觥  
孫仲子淵博罕有匹往籍多淪亡後生誤帖曄窮年仰屋  
梁一一爲梳櫛著有周禮正誼墨子問詁餘事工文詞藻采復秀出左  
升儀鄭堂右入平津室始知根柢宏枝葉自茂密如水有  
本源其流日汨汨咄哉一孔儒晦名不晞實

我聞永嘉學所重在事功止齋與水心議論尤閎崇方今  
苦風塵豈復堪宋虜猛虎伺我西毒龍瞰我東豈伊陽九  
厄將毋百六窮君獨爲其難宜鬯儒宗風發言旣偏宕舉  
世誰余從時議爲興儒會茫茫神聖業役役衣冠中仰視白雲浮  
青天何夢夢

孫子瀟先生詩冊爲師鄭題

江山詞賦太平年里社雞豚事偶然想見乾嘉風氣好烏紗容易肯歸田

隨耆壽民間學齡赴東陵途中雜贈八首

少年慕聲氣四海通縞帶自從官京師頗頗別蕭艾未裁次公狂已學伯夷隘擇交近十年屈指得耆大相知在一言世多目余爲狂惟壽民獨知余狷相期各千載長安萬悠悠往來盡冠蓋誰能畧勢分推送到吾輩折節君可風忘形余亦太乃知芝與蘭一氣成沆瀣

君家有高樓樓開見西山樓上萬琳琅樓下千琅玕從君借一鳴薄暮奚童還行間與字裏一一施朱丹近來時世變束書恆不觀君獨胡爲者窮年心力殫不鄙敬禮文磨石將雕刊三年負夙諾日夕慚心顏轉因交情深言淺非

所安終當償息壤嘔出長吉肝

壽民嘗要余爲見山樓藏書記

國家都幽燕形勢天下雄居庸峙其北馬蘭障其東與君

十日來脚底如轉蓬曾指蚩尤城緬想黃帝功揭來瞻馬

首復訪松亭松

時與壽民均從張家口歸

生長江南鄉氣候多冲融一

從來北地塵沙凋顏容不嗟行路難所嗟吾道窮方今九

州內瀛海相交通天險化爲夷有谷無泥封斧柯不在手

憂國徒忡忡怪來聲變徵不中黃鐘宮

初夏游盤山奇特得未有作詩歸眎君沈吟不去手繪圖

當卧游我詩殿其後詩或不足傳此畫固不朽有約持雙

螯登高作重九誰令咫尺間坐使風月負迷陽一傷足幾

等柳生肘

壽民約余此行再游盤山以在張家口雲泉寺失足受傷不果

回首謝山靈百

罰不辭酒

邦均地名有唐槐矗立前朝寺

謂天齊廟

自慚兩度來採訪未一

試僕夫向我陳搖手戒勿至庚年遭兵火瓦礫餘滿地誰  
知樹婆娑固未盡生意雨餘穠自重歲久癭成贅因憶慈  
仁松共云凋晚歲南皮老尙書好古至流涕我時約陳衍  
姑作萬一計失喜入門來蒼翠列鱗次

此癸卯年事陳人石遺有詩紀之

言未可聽神物豈終闕寄聲眼前人慎勿失交臂

一宿同燕郊再宿同薊州夜長不成寐共數平生游我言  
山塘路最好當涼秋傾城集士女簫鼓紛船頭目成許亦  
可眉語防難周脂光與粉色水面香浮浮當時不自覺此  
樂難追求君言秀州道記得停行舟人家盡臨水籬落殊  
清幽其時雪方霽一樹梅花稠下有浣衣人紅妝照碧流  
至今七八年好景心眼留閒官苦束縛舉動不自由何當

逐鷗夷一解卒歲憂

曉行桃花山山色媚朝陽他山淨若鏡此獨施嚴妝離宮

眩金碧老柏森清蒼記從薊州城並馬同徜徉謂春間與

三舒民同游昔來桃未花今來葉已黃秋風淒以厲瑟瑟

鳴長楊感此景物殊坐惜馳流光此時念信三謂舒民好夢

方繩牀

信二謂懷民時爲君中表儒雅敦詩書去年來京邑與我

得相於損書久不報所恃惟區區本來情性合不在形迹

疏頗聞鈴閣下時時苦念余別來歲已更問我詩有無豈

知江郎筆未老花先枯仕宦久不進才亦與之俱煩君致

一辭爲我承興居漢時昭君冢秋草青何如

有寄

側身天地吾猶賤垂老江湖爾未閒空有誓詞留篋笥又  
將歸夢落關山嘸中明鏡枯春影愁裏征塵損玉顏悽絕  
西河沿畔月照人匹馬夜孤還

梁節庵以病乞休聞其有廬山之游作此訊之

合眼便憂顏色改癡心猶望諫書來萬方多難生何賴中

歲歸田事可哀迢遞白雲山名親墓在飛騰蒼狗壯懷灰聞

君早晚尋匡俗夢繞匡廬日百回

得陳其年洗桐圖於厥肆輒賦四絕句圖作於康熙庚申

五十功名事已遲洗桐圖卷繼填詞紫雲老去楊枝逝畫

裏思量又是誰圖中畫兩童子洗桐

湖海平生膽氣粗中年落魄小三吾烏絲其年詞集名射雉年

詩集名搜尋徧祇恨題襟一字無余見國朝人手翰最



癡想詞科繼大賢  
參軍蠻語悔爭傳  
柯亭劉井都無著  
合眼興衰有百年

過江誰問舊池臺  
寥落荒庵剩古梅  
十載并州魂魄戀  
當他遼鶴一歸來

喜裴伯謙入關

過嶺詩成又出關  
頭顱萬里竟生還  
重談憂患心猶痛  
飽歷星霜鬢儻斑  
河漢東流終到海  
崑崙西去更無山  
諸君試上祁連冢  
多少孤臣未賜環

八十高堂白髮親  
喜心和淚說歸人  
艱難子弟都成立  
喪亂圖書半苦辛  
到日好編行戍稿  
餘生猶作太平民  
淒涼

二范

肯堂仲林

都黃土不及從君墊角巾

廉泉字惠卿號岫雲江蘇無錫人光緒甲午舉人現

官度支部郎中有岫雲山人詩稿

### 移居小萬柳堂四首

多病登臨倚夕曛帆幘歷歷鏡中分

凡蘇舫往來可於山衣鏡中辨其帆影

人不管人間事只占清谿與白雲

隔岸誰家住水濱槿籬茆屋自爲鄰休嫌不及東家老一

曲江灣好避秦

對岸爲吳氏九果園河流至此一曲與吾堂各據其勝

曲曲闌干短短籬黃金不惜買花貲西山猿鶴今無恙未

許寒盟賴有詩

往年養病於京西潭柘山中自號岫雲山往來時仍訂後游有西山猿鶴未寒盟

之句今出小萬柳堂至萬航渡一路松篁陰翳彷彿入潭柘也

沿壁幽花無數開朱藤繞屋蔭蒼苔虛窗夢醒月初墜一

片櫓聲帶雨來

紫英以無米見告詩以答之

九州何處可樵漁爲愛清溪且結廬繞樹看花吾亦得牽  
蘿補屋爾何如驚人詩句飢難煮老去豪華氣漸鋤日暮  
空庭喧燕雀稻梁謀拙已無餘

漫把牢愁問大圓風波暫憩亦翛然閒拈楓葉開吟社飽  
食桃花不種田客至自沽村店酒家貧惟有惠山泉流亡  
滿地無人管聞道一筵擲萬錢

大萬之句

伯希祭酒前題小萬柳堂圖有奴才恣揮霍一筵金

胡思敬字瘦唐江西上饒人光緒乙未翰林散館改吏

部主事現官掌廣東道監察御史

庚子紀事詩

錄七首

四字紅旛夜集梟春燈謎語雜歌謠可憐一炬成焦土使  
相登樓拜火妖

捷書一夕達甘泉六貴同朝拜賀箋欲倚淮東平寇難高  
駢但解媚神仙

灤洲燈影幻妖烽牀上癡猪欲化龍十族牽連同日死大  
將軍是酒家傭

十萬纏腰上玉河沙棠載使盪秋波嗷嗷野哭多新鬼薤  
露聲中發豔歌

宗伯辭官早積疑當年各在黨人碑荒陵暮雨昌平道一

四庫全書  
卷之二  
三  
騎從亡哭路歧

朱家結客散黃金酒後論交一片心末路慘遭文字禍空  
餘一劍作龍吟

擊筑悲歌酒未銷尊前涕淚聽童謠百年文物消沈盡相  
宅淒涼賣賜貂

一俞鍾鑾字金門江蘇常熟人光緒丁酉舉人

松禪舅氏舊藏明楊忠愍公獄中與子書真迹出示

命賦

此書與傳刻者迥異

高皇廷杖創刑酷鎮撫甚於北寺獄肝腦塗地亦君恩天  
鑒傷心不敢哭椒山有膽精鐵生五奸十罪霹靂聲青詞  
黃籙醉司命鈴山死氣獄結成樞牀手寫血滿紙割肉斷  
筋枯十指備陳撈掠詞不刊揮斥蜚蛇好男子滿城春風  
柳鎖香忠愍洋洋就義如平常家書流傳五百載動人忠  
孝淚滿裳諫草堂高天尺五楊左獄沈冤更苦一網打盡  
誠快哉從此金甌闕誰補吁嗟乎忠臣亡國脈傷忠臣絕  
國乃滅

忠愍書係紙本高盈尺長丈餘字大於錢行書作爭坐

位體微脫數字爲翁松禪相國師所藏俞君金門爲翁  
師之甥師自戊戌還山後與金門時時唱和辛丑冬間  
出此藏帖示之并令臨寫一本且加題詠焉卷中有湯  
倭二文端題語今附錄於左以資後人攷鏡孫雄識  
此楊忠愍公獄中與子書也忠義勁直之氣溢於楮墨  
觀兩眼觀心意不敢亂及椒山自有膽數言知所得於  
養心養氣者深矣咸豐甲寅夏至前三日蕭山後學湯  
金釗謹識

楊忠愍公劾嚴嵩剛正之氣充積於中固已置身度外  
故雖備極慘毒而不能傷其生者其天定也非具此一  
副貞心鐵骨不足當造物玉成後學倭仁謹識

汪榮寶字袞父江蘇元和人光緒丁酉拔貢現官民政

部左參議

有感

戊戌八月  
十首錄七

蘭陵祭酒口談賢結客名都半少年劉向校經攻百兩  
半長著錄過三千連雞雅擅縱橫策乘馬還分甲乙篇  
從此燕齊迂怪士始知海外有神仙

莽莽神州漸陸沈蕭蕭漆室有哀吟竹林逸簡標師說  
桑落淒辰見霸心多難豈應吾道細上書祇恐帝閭深  
論符幾輩休騰誚十里蛄聲未得瘖

旁行書到達官愁儘有綈繒未足酬霸越奇才思范蠡  
變周經術託何休升車慷慨傾三輔倒屣逢迎徧五侯  
聞說孔公修薦表雲霄一鶚好橫秋



風送朝珂近玉除承明謁 帝此權輿初聞賈誼叨前席  
別詔劉安進外書反袂傷麟無復爾持刀厭虎竟何如孤  
芳祇恐經秋歇多種江蘼與揭車

早倦離宮聽八琅鑪香扇影不會忘金根歸駕秋傳訊玉  
檢靈書夜吐芒重起甘龍修廢典卻勞扁鵲製神方水衡  
新奏雲斤技未許寒鴉度苑牆

觚稜回首日西曛哀痛天書不忍聞自是桐宮甘罪已何  
嘗丹穴苦熏君銀瑤夜醉開東閣玉卮朝飛試北軍欲叩  
九關訴眞宰迢迢河漢有浮雲

斬關空復破盧囂早佩靈符咒辟兵聞得珠襦臨武帳公  
然玉貌去危城甘泉豹尾縈魂夢滄海鷗夷變姓名縹馬  
闕風應返顧高邱無女淚縱橫

夏仁虎字蔚如江蘇上元人光緒丁酉拔貢現官農工

商部主事

宿棲眞禪院

沈沈深院亂花局負手長廊酒力醒小閣籠燈迴淺絳碧  
天如水點疏星庭空步月初中影簷靜無風自語鈴清露  
滿襟渾未覺簫聲猶隔短牆聽

宿海淀直廬

林風響蕭蕭夜坐疑雨至攬衣步前除明月正在地鄰溪  
水夜漲羣蛙開鼓吹牆陰光出沒螢火燭深翠余懷茲以  
適獨立久忘寐翹首望太虛碧空淨無翳

四箴詩

緩行篇

齷齪市上兒紛紛誇疾走長脰能跨竈捷足夷峻陡努力  
爭揚前自謂得雞口所恨天無階甯嫌出自牖嗟嗟世途  
脩巖險靡不有百里半九十九屢覆一簣一朝過蹉跌動  
乃得愆咎涉遠輒里閭登高自培塿防仆愼其趨利行貞  
以久勿爭長者先請從大夫後行道致有福視彼扶杖叟

遠覽篇

昔有離婁子明能察秋毫窮精在方寸不見泰山高舍遠  
圖其近視官徒爲勞矧哉局咫見盲聽誇其曹遊目向九  
洲流觀良足豪安知九洲外復有人如毛糞壤悅蜚螭苦  
李飽蟻螬甯能語蘇合那復知蘭膏局促復局促得失信  
所遭掉頭腐鼠嚇遠覽愼翔翺

愼言篇

防舌如防川發言如川決川決猶可禦言存久難滅慎哉  
金人銘緘口警前哲樞機慎其微陰重期不泄盛德自愔  
愔嗇夫徒喋喋維口乃興戎矧今世途艱折彼鸚鵡翼獵  
此猩猩血曾無抹禍患空自誇幡捷淵默誰測深利口不  
如啞願言師古人發語期中節

審處篇

良禽不擇木困羽罹樊籠脩鱗不擇淵涸轍悲途窮名士  
不擇處往往不有躬先機一以昧退遂鮮所容昔者灌將  
軍五陵振英風傾心結武安栢酒血濺紅墜淵與加膝乃  
在喜怒中趙孟能貴賤呼蹴衆所從峨峨冰山高或有朝  
陽烘悠悠惡木陰振落霜飆雄唯倚者故仆攸往有終凶  
吾欲懷芳馨獨立蓬萊峰

樂師曲

瑤池昨夜停歌舞一尺紅綸掩塵土子晉平拋鳳翅笙雙  
成罷擊鱗皮鼓白髮紅顏老樂師當年供奉霓裳部投梟  
一笑賺東王法曲三千獻西母尋常獨見天顏喜亂擲纏  
頭錦如雨此時聲價重班頭減字偷聲出機杼多少散仙  
思學曲振笛爭摹羽衣譜因緣方朔竊餘音憑藉飛瓊求  
妙緒聞道曉來奏樂還門前鶴蓋紛難數忽然一夜雪花  
飛鸞馭西行返煙霧寂寂瑤臺掩落花沈沈青瑣迷芳杜  
叫徹天闔天不聞靈脩浩蕩愁雲阻平明牽犬出東門直  
視黃塵黯無睹舊時子弟總飄零霧散煙馳更何許淒絕  
龜年已白頭抱琴獨共斜陽語

李稷勲字堯琴四川秀山人光緒戊戌傳臚由編脩歷  
官郵傳部左參議有李伯子詩稿

秋興

明滅旌旗海外山秋光淡沲有無間寒生馬色黃成霧冷  
逼潮聲綠到關壯士驚心銷白日美人遲暮怨朱顏橫飛  
寶劍空凝雪梁稻羞隨雁鶩班

采蓮纔過若溪頭疊雪羅衣忽撫秋明月蘆花孤夢醒白  
門楊柳一時愁空山望遠驚聞鵝商氣愁人不到鷗獨有  
斷腸韋刺史霜鐘蟹火憶蘇州

雁聲

木葉下如雨關山雁叫霜夕陽亂砧杵清夢落瀟湘笳吹  
五更斷邊聲八月涼近來機弋巧見汝已高翔

都門竹枝詞

紅襦錦袂五陵子白馬金羈四姓侯  
擣取流塵爲麝粉一生香頓不知愁

城上草根青覆牆城下蘆葉晚飛霜  
野火燒蘆任灰滅北風吹草難禁當

祝張潛齋尙書師六秩 賜壽

黃星下燭九城陌軒蓋峨峨尙書宅  
閭闔深冥瑤沼春皇穹白日精誠格  
宮中聖人坐蓬萊三殿傳呼敕使來  
東掖煙花動仙樂南極星辰映上台  
司徒皤皤今國老金門射策聲華早  
萬言累陳政事書四海爭傳經進稿  
興朝人物盛湘中清時名德四國崇  
關西夫子楊伯起江左夷吾王茂宏  
一朝瀕洞風塵惡夢醒輒拔轉蕭索橫流

大地起龍蛇故苑西風冷鵲鵲

公久直南齋庚子之變方視學廣東開警輒拜

表解職奔赴行在

杜甫麻幘武功追陸贄痛寫興元詔忍見漂搖

四百州中原北望但悲嘯乾樞坤軸自轉旋六龍迴轡

散烽煙攀天望蹕千官在復旦重睹義唐年公時先驅

砥皇路霓旌翠輿杏煙樹河山風景尙依然城郭人民

已非故吾皇神武覽八荒堯門受訓開明堂遙通九

譯交地絡大張四維恢天網元宇沈沈天尙夢詔起微

學罷鄉貢公作新程下校官驚雷發蟄萬萌動黃髮丹

誠抒遠猷閎攬百家搜九流中散清狂步兵哭紛紛口語

成訾尤南箕皎皎揚赤古國狗狺狺吠城闕孤忠獨荷

聖主知讜謀常令遠人懾四國起居諷司馬祥星正見長

沙野

兩宮問年班上珍前有壽州後廣雅

今年二月壽州師相八十



四胡詩史甲集卷六

望 卷之六

四月公六十六月南皮師帥七十先後賜壽如長安四

禮三公皆負海內重名故一時相傳以爲佳話

月花正繁漫街車馬如雲屯入門平揖諸侯貴接坐方知

上相尊賓筵歌動梁塵雪璫瑜舞蹋猩紅褶酒光潏灩玻

璃盆燭影如龍綠煙熱繡華旖旎傾朝市清歌旨酒皆

君賜玉壺常懷一片清金鑑自有千秋事畫錦堂畔花成

茵屏風佳句字字新衛公耄學宜歌雅洛社耆賢自主賓

百牢嘉饗千觥醉願公多福爲國瑞諸天花雨春正長

美意聲聞無量歲時兩宮賜物並有無量壽佛金像一尊吾師博典宏受萬善平等大年之符

此其第一勝

因故以爲頌

王式通字志齋號書衡浙江山陰人寄籍山西汾陽光

緒戊戌進士現官大理院民科推丞

韻宋樓藏書源流考題詞 十二首錄十

意輕疏雨陋芳椒賓客文章下筆驕割取書城歸舶載蘋  
風悽絕駱駝橋

儀顧堂前子弟佳一家志趣尙難諧清風輝映吳興郡晉  
石庵承廵進齋

丁董羅陳嗜好偏書亡同損一宵眠重思獻縣違心語泡  
影山河祇偶然

翁潘大雅今銷歇江費風流並寂寥坐使靜嘉騰寶氣人  
生快事讓君驕

調停頭白范純仁俯仰千秋獨愴神有客爲書曾乞命湘

濱宿草已三春

巴陵方與歸安陸一樣書林厄運過雁影齋空題跋在流傳精蘖已無多

歐化東行漢籍推書生有志力能回竹添餘論篁村教家學師承造此才

未窺舊籍談新理不讀西書恃譯編亞槩歐鉛同一映千元百宋更懵然

三島於今有西山海濤東去付西還愁聞白髮談天寶望贖文姬返漢關

如海王城大隱深遺經獨抱殘沈吟白雲蒼狗看無定難遣牆東避世心

傅增湘字沅叔四川江安人光緒戊戌翰林現官直隸  
提學使有廬山遊草灤陽小草

遊獅子園園官張千總談舊事有感

憶昔文皇狩北邊山林望幸敝芳筵曾充騶卒趨朱邸  
親奉賢王執錦韉縣上龍蛇羞得路淮南雞犬詫升仙園  
官八品垂垂老飽啖雲泉五十年

避暑山莊歌

有序

庚戌秋仲子役灤陽請於都護得入瞻覽窮勝二  
日始得泰半西南林壑咸未涉及迴棹灤河蓬窗  
低陋蜷伏盡日追爲此篇匪云紀勝聊以賦哀云  
爾

山山環翠拱灤陽御苑天開避暑莊別館離宮二十六題

名處處是

仁皇

三十六景所定皆有題詠

聖祖

仁皇御宇持恭儉

六十年中世清宴周巡塞北復江南清涼更啟披風殿參

差殿閣連雲起迤邐宮牆十餘里荷花世界柳絲鄉宛然

一曲明湖水西北雲山倒景多蒼松石逕轉坡陀琳宮梵

宇清鈴鐸

園內永佑寺水月菴旃檀林等八廟

月館風廊老薜蘿湖山秀麗

天然足宸游到此開清淑欲以茅茨守古風不教雕繢爭

華俗曾讀山莊御製篇靜觀妙契託林泉時巡車駕秋行

獮展覲王公夜啟筵累洽重熙忻鼎盛懿哉純廟真神

聖年年長作木蘭行詠蕩天門開麗正因緣天語悟前辛

山莊成於康熙辛酉年時高宗適誕生乾隆辛酉又始

為巡狩之舉

高宗御製後序有此中因緣不可思議之

語

水榭嚴齋次第新亭館補題三字額

乾隆十九年高宗於聖祖御題

三十六景之外再題三字

峰巒渲染十分春

高宗續建各處多在西北山

後卷阿勝境長供養

高宗歸政後三至山莊駐蹕卷阿勝境

睿聖規模亦

英壯廿四年間十七巡仙居福地震懷暢從來盛極伏衰

徵再世南州盛甲兵不省輸金歸將作微聞罷幸出公卿

宣宗幸裁修繕費數鉅萬

甘泉昨夜傳燐燐匆匆又見鸞輿至寢

殿親題樂壽堂

成廟所題僅見此額

堯癯誰解宵衣瘁捷書盼斷

羽書馳惻惻宮車晚出時玉砌苔生金殿閉至今煙樹尙

含悽小臣問俗初經此瞻拜靈區歎觀止林壑休爭蜀越

奇亭臺占盡東南美高閣文津駕石渠名樓煙雨似鴛湖

此兩處乃重建者

當時宮館多難識勝跡虛披舊畫圖三朝寶翰

留題遍仙府瑯環世爭羨誰和先皇雪獵詩吳淞留向圖

中見

永佑寺拜觀雪獵圖二幅有和珅董誥等恭和御製詩

仁廟大獵圖一幅純廟

風物清佳

信足留偶然懷舊轉悲憂悠悠旌旆思千里莽莽風煙變

九秋昨者行經萬樹園當年列幕會羣藩埭上草柔誰試

馬祇今馴鹿擾宮垣萬樹園平列數百畝當時宴藩部王公百官於此列帳數十陣百戲放煙

火有試馬埭在其中地做草柔今顏垣敗礎空蕭瑟列校

則馬空而馴鹿數百游畜其中

分屯尙千百白首秋風淚暗彈夢中猶望鸞旗色園中防兵數百

人月餉得九錢餘八將軍雅意愛園林營繕分頒少府金

九品武官月俸三兩

歲修四千五百金工作啟鑰常來重譯客時有外國客持

不輟視前日差完整

防秋誰識聖人心君不見昆明池水西山綠翠華去後無

消息圓明一炬化如煙盡日寒泉漱珠玉閒話先朝淚滿

襟邊雲淨歛海雲陰聊將塞上悲秋意坐對宮花取次吟

趙椿年字春木號劍秋光緒戊戌進士現官江西候補

知府

甌北先生之曾孫 光緒丁未山農工商部奏調在參議上行走

題張瓊隱舍人長毋相忘室填詞圖

五夜誰歌起夜來鼠翻蝙蝠拂總驚猜決無長別能如死

義山

詩遠別長於死

總有相思也作灰崇讓宅中塵簾在德官坊裏壤

絃哀銷凝賀鑄新詞筆腸斷江南舊玉臺

去日長繩繫不牢新愁膏火鎮相熬三生同命迦陵鳥九

地招魂屈子騷任取因緣歸電幻好將消息問華初瑤池

若再逢紅頰爲道千年有碧桃

題王幼霞侍御所藏陳沅小像

花草吳宮黯不春麻姑慣見海成塵難爲劫火昆明外尙有華鬢自在身



秋老峩肩月一寮滄桑情味太無聊軍前未得降徐海輪  
與臨淄馬翠翹

祭酒篇章錦不如專城猶是益州居滇池殘夢他年事恨  
少詩人史筆書

鄉親已自憐蘇小

宛爲吾郡金牛里人

圖畫猶防妬尹妃

府中稱沉爲邢夫人

誰識江村紅相樹舊枝曾有鳳皇飛

### 送汪鰓亭師南旋

描畫歐陽滿九衢又看笠屐別成圖天教遭際符姚宋

事見

姚元

之傳人仰杭吳有白蘇官比嘗龍原略似

師嘗舉先祖既北公好官滋味

畧嘗龍之句

田如謀鶴未全無解溪自具閒邱壑不向臨

江問木奴

時望文星接斗魁豈知憂國鬱奇核艱虞力挽千鈞髮宏

獎勤求一世才填海精誠期有效籌邊懷抱總難開只餘  
隅坐階前士曾見頻年髣髴來

扁舟欲去尙遲遲忽漫秋風及此期金闕觚棱增眷戀

師作

乙未雜詩有鎮日鄉心如轉轂觚棱瞻望輒低徊之句

玉堂鈴索惜分離

翁司農師贈行詩有

玉堂蕭條閱鈴索君相從款段優游地一笑車帷閉置時

只恐蒼生要霖雨五湖未許老鴟夷

相依嘗覺負恩私況復相違感路歧一物公皆教得所十  
年我獨荷殊知南行未獲從丹漆西笑空憐溷素緇惟幸  
東山前事在重來原自不多時

戊戌五月虞山師相被

命南旋瀕行以先甌北公

珠江驪唱詩冊見貽謹用冊中原韻賦詩申謝

四首

五色何曾賦日華累公藻鑑眼疑花詩書麴蘖同千載師

友淵源屬一家

先伯祖明甫公王子椿年己丑攻中書爲公錄

廷試文端公讀卷今冊中和詩

又首覃溪先生

唱和郢中皆白雪風標天半總朱霞惟慙舊武難

繩繼學海沿洄未有涯

苦憶當年吏隱堂長官風雅絕班行公廷禮數寬韉帙客  
座琴尊抵瑟簧別酒惜催乘傳馬天厨曾飽大官羊開元  
全盛今誰見賸展遺緜向夕陽

帝師繼世卅年間垂老江湖許暫還文集會昌成一品清  
名司馬在諸巖關心先澤蒙留賜翹首公門得重攀差喜  
南行瞻謁近不須歸夢感王灣

十載西清傍日邊可堪獨去謝羣賢玉堂天上人終遠銅  
螯秋衾夢最先入世心情嗟李涉傳家孝友勉張遷師恩  
祖德俱宜念況復相貽在別筵

王守恂字仁安直隸天津人光緒戊辰建士現官民政

部警法司郎中

宣統元年授  
河南巡警道

問值增張範孫太史

此是誰家賦節聲背鏡小立卻關情發盡深懷空澤戰問  
舍求田誤一主性耐孤寒無點福詩多壯拓得清名知君  
夙有經綸具願老青直望太平

書空

霜林落後秋無迹又聽蕭蕭送北風過去年華隨世改生  
來志趣與誰同縱橫才調消磨後多少知交困頓中小步  
庭階看夕照長吟未罷且書空

贈言寶博

曉曉風雲過眼休殘陽依戀樹東頭才華漸老羞新進好

歲盡逢新歲，愁關塞。離情杯有酒，江河生計，釣無劍壯年。容易悲雙鬢，墮海迴瀾，竟目流。

贈言百藥

伯仲論文久曾聞季子才相思勞夢想投贈喜詩來馬駿  
心原壯雕盤眼自開試從高處立俯視指蓬萊

哭塞傳

何處來凶耗傳聞儻未真遺詩仍在篋老友淚霑巾契合  
文章雅交期骨肉親君年猶少我先自脫勞塵  
亂後承一面從今永別離頻年嗟薄宦傳世只新詩太息  
徵君誄誰鐫有道碑且申泉下約願得見君時

回頭

年歲如流水回頭念念非灰心逢末路隱忠味先機淡白雲無迹高寒月有暉可憐孤燕子難訪舊烏衣

吟詩

春光慘淡不成歡借得吟詩且自寬取徑深幽行跡少發聲微妙賞音難酒痕空在衣邊認花影全從鏡裏看此後好懷能有幾夕陽容易上欄杆

感春

聞道春光海上歸一時得氣花成陣無端刮地飛塵沙或入青雲或落溷書生何事來帝京徒抱不平向誰問避人破帽日闌珊吐語無聲氣難振似欲獻賦大明宮伸紙又嫌筆鋒鈍不如挂冠早歸田自閉柴門卜肥遯如何棧豆

久流連霜華雪色壓雙鬢人得雲程已萬千我移步履無  
分寸今年有客來田間云說旱荒涸桃汎長星彗孛屯甘  
霖夜夜風狂月作暈家無田畝無屋椽勸汝姑留待時運  
作苦得錢養妻孥但免饑寒莫愁悶夕陽放鴿鈴有聲鈴  
聲入耳發清韻才人老去慣逃禪談經且學南能頓

連日讀古今人詩戲作

吟詩休說古人多古人雖多奈我何古人往矣不可作天  
復生我能吟哦我生自然有真我誰能阻我爲詠歌不知  
有人況今古縱橫上下同包羅無風吹水水不動風水相  
遇生微波涓滴甘泉只一勺奔放千里成江河行文有訣  
亦如此工巧能奪天女梭幽居避喧得詩喜已忘兩鬢將  
皤皤好春一去不復再惜花如癖終受瘥年華逝水去如

激老來難望朱顏醅素琴孤張有餘響敝帚自享常摩挲  
門無隙地駐車馬不許俗客輕相過眼底寥寥少知我自  
好所好誰云阿我詩雖醜可自信自動機軸非由他萬疊  
晴雲綠滿郭液池得雨開新荷久住帝城萬人海我心淡  
似居煙蘿

題先師范伯子詩集

我心有詩寫不出往來奇氣蟠胸中偶然涉筆作吟詠一  
鱗一爪非全龍當代有人善鏤錯亦或出水塞芙蓉惟我  
先師范伯子鯨魚掣海天能通晚有弟子苦詩小辜負座  
上披春風人間尙有淩虛管發聲天漢俗耳聾過眼滄桑  
十六載少年今日成老翁

結處川本集第九卷見和詩意

言懷



連朝案牘添塵累稍得寬閒便有詩酷熱漸過炎夏日新涼已到早秋時樹當長晝留清蔭花更多情戀故枝我欲言懷言不得何妨莊語作支離

次韻答耆壽民

未能長揖謝時流袍笏登場本類優強欲吟詩尋范陸敢將談理笑楊游羨君竟作市朝隱計候新逢天地秋傳子一經原貴早著書豈待雪盈頭

次壽民邊字韻七律

竟從苦惱結因緣噩夢無端到枕邊香草不芳除舊種秋花含淚泣餘妍珠沈碧海寒生月玉暖藍田冷化煙獨自淒涼題錦瑟漫將心事說樊川

袁嘉穀字樹五雲南石屏人光緒癸卯翰林現官浙江

提學使君於癸卯得館選後即應經濟特科廷試列第一遂授職編脩袁祖光云君詩筆

渾所編少作分爲幼學九龍池公車三集斷句如

鳴聘古木瘦馬怯前村帆留滇海月春斷錦江潮

近唐人音節  
聞人道安南事

太息交州鬼怒號烽煙衝破瘴雲高射潮今日無强弩藥

矢何人助大刀旌旆諒山雄露布輔車滇水駭風濤要盟

竭盡蒼生力爲報 君恩敢告勞

含沙如蜮日披猖西貢開邊引盜航貽憾和戎師魏絳苦

心矯詔歎陳湯策輸狡兎營三窟軍散寒鴉泣數行累代

藩封一朝撤可憐殺氣莽蒼蒼

航海

二更月黑海天空燈火兩三遙處紅旅順何辜投有北瀛  
洲無力障之東要盟難保鴻溝信侵食終憂馬市同魏絳  
九京猶可作幾曾棄地詎和戎

地遙天近混乾坤鍼指南行出海門黑水澄波誰潑墨黃  
河涓滴不成渾冷風低壓煤煙重暑日高蒸霧氣昏獨有  
白鷗驚浪起送船叫客怨難論

高毓彤字潛子直隸靜海人光緒癸卯翰林官編修有

潛子詩鈔

章梈云君推究中外之故抉擇文史之精

旨微遠非與雅故莫可蹤跡黃雲見云潛子年少多難恒寄於詩古體上企曹劉近體多肖梅村阮亭思君行二首哀胡夢薌太史

皓皓復皓皓思君令人老

古詩句

所思一何遠別離一何早

昔君同遊仙同遊扶桑島扶桑東海隅山水清且好今來  
承明廬從君事搜討君在方須與君去益茫渺晨風驚北  
林朝露晞幽草有恨問太空太空光皎皎有淚漬西江西  
江波浩浩中庭月如霜粲粲天將曉坐起一長歎愁焉心  
如攜

歲月忽馳驟思君令人瘦

杜詩句

四海皆交遊所重在邂逅

浮雲蔽白日巖石穿泉溜生離猶可期死別安能復同在

四庫全書  
輕塵間豈有金石壽  
北山生燕支南山生荳蔻  
荳蔻不久香燕支色易舊  
君在咫尺間生死不相救  
君去各異天相思甯能究  
魂歸何處來陰陽錯昏晝  
中夜不能寐聲聲數殘漏  
我躬方在疚涕淚盈衣袖

客中初度二首

青衫憔悴尙塵寰  
下土幽栖晝閉關  
悔任春華拋宦海  
愁聽落葉下空山  
不爭名世千秋業  
難得浮生一日閒  
三十二年辛苦盡  
何時許共白雲還

洛陽冠蓋競聲華  
並轡黃塵計總差  
大道相逢多鬼蜮  
中原何地蟄龍蛇  
絲絲情網都成劫  
浩浩生緣未有涯  
莫訴十年商婦怨  
更無司馬解琵琶

聞韓事有感四首

夕陽天半送殘霞無限秋聲入暮笳天闕九關藏虎豹地  
窮三島豢龍蛇淒涼蝸角難爲國冷落烏頭未有家木柿  
蔽江王氣盡藩籬已盡棄珠崖

高天孽雁總驚弓氣索強奴片語中爭向鑊湯求避熱漫  
憑槃血講和戎小朝寂寞千年辱內禪從容五技窮四十  
萬金酬下駟可憐赤芾誤曹公

颺風霽雨苦侵尋赤日沈天永晝陰填海冤禽空碧血滿  
山荒草總紅心悲歌易水彈鉛筑涕淚雍門碎玉琴獨立  
高峰觀蟻戰已教愁比怒潮深

茫茫前事劇堪師蓄艾三年計未遲從此鼾眠鄰卧榻更  
無勝算理殘碁弱韓不信秦謀狡帝魏應知漢祚危六夢  
不延薇蕨盡彫零殷孽更何之

同鄉諸君招飲於日比谷公園松本樓寫真賦此

霜風淒淒天始肅攜手同遊日比谷高秋草木生蒼茫落  
葉飄蕭滿山麓最難異國多同人酒邊橫劍談時局自我  
東行三月餘荆棘參差日盈目東隣半壁併豪家行見殷  
民化異俗長蛇封豕心何厭忍過屠門供魚肉巢燕安知  
大廈傾營營名利紛蠻觸元黃爭戰血盈野吉網羅鉗興  
黨獄停盃四顧心搖搖擊碎唾壺不敢哭磨牙當道飽豺  
狼浮游水上來虺蜥懸弧生抱壯遊志奮翮翼癡願未足  
江山如此我何心眼中野馬相追逐諸君素負名世才太  
息何人與推轂難上九閭叩天帝忍見神州竟沈陸登樓  
一望海雲垂燈昏雨冷穹廬覆今朝莫作等閒看雅集圖  
成題一曲請君爲我且高歌和君吾家漸離筑

蔡寶善字師愚原名震浙江德清人光緒癸卯薦舉經  
濟特科官陝西候補知縣有籀經堂詩

薄病偶述

不堪身世尙蹉跎錦樣光陰擲逝波病後閒情消似水尊  
前客淚瀉成河從知久別難爲計但覺微名累我多便擬  
買山歸學佛一龕燈火誦伽佗

述感東江西諸友

白袷初裁又及春江山題徧墨痕新因看芳草懷公子等  
折疏麻報故人古道關河愁似海潮橋更鼓月如銀客中  
容易生離思明鏡朝來已點塵

春思

零星往事散如雲鳳泊鸞飄萬緒紛惱我風懷春似夢中



人蘭息酒微醺豪情消盡青萍劍好句題殘白練裙莫向  
東風閒指點落花容易送斜暉

如幄桑陰滿碧潭遶隄楊柳更毵毵泥香古社迎新燕風  
暖田家祀早蠶三月鶯花懷院北上春羅綺豔江南東船  
西舫愁無際惆悵清溪水蔚藍

惻惻輕寒壓絳綃吳興此日最魂消樓頭飛絮愁蛾損陌  
上香塵驄馬驕是處清歌傳白紵等閑玉簡授青腰孤吟  
薄醉都無賴腸斷當筵紫玉簫

沈沈蕭寺掩重門心事寒缸細較論殘月曉風緘別淚生  
煙疏雨畫愁痕聞歌大有中年感倚劍徒慙舊日恩此際  
天西應憶我海紅簾底正黃昏

夢游仙詩

飛夢何因到大羅碧城十二悔經過蒼龍尾重剛風緊清  
淺蓬瀛凍不波

萬朶瑤花下玉堦青鸞仙帚舞風開神光照見天人影霞  
帔星冠紫府回

雜詩

中宵不成寐起坐理瑤瑟天風吹海濤奇響裂金石成連  
不可尋古調忽中絕一彈再三歎淚下霑胸臆何如淫蠅  
聲靡縵蕩魂魄

不寐

耿耿星河病乍停屋梁斜月思冥冥摧絃無限人琴感風  
簫西鄰不可聽

近得李君綠  
寶計故云

上海

漫從槎客說瀛洲  
破浪來看海上秋  
天遣島夷歸禹服  
此邦形勝振狂流  
衣冠萬國圖王會  
花月千門記壯游  
我欲乘風探八極  
煙波浩蕩使人愁

羅綺成圍錦作堆  
車聲五劇殷輕雷  
風狂意氣胭脂海  
天老英雄魏蘂媒  
似水繁華春不夜  
如煙好夢去堪哀  
懷人無限桑田感  
作賦當年有異才

蔣先生劍人賦上海詩有句云一城脂夜盪花妖

### 贈吳康伯

相看奇氣尙縱橫  
莫聽尊前變徵聲  
薄海幾人知季子  
平居有客似長卿  
可能姓字出山重  
豈有文章入世輕  
寄語閒雲須鄭重  
好求霖雨慰蒼生

黃兆枚字芥滄湖南長沙人光緒癸卯進士現官吏部

主事

長沙一松歌

淵亂牽挂紳耆冤抑特甚世途險詖傾軋相師是詩爲王孔二公作也

長沙城邊松兩株堅根插土十丈餘一松淵邃壑谷靜一松夭矯枝葉麤蓬萊仙人種向此厥貌質古神清疏體侔材合施亦稱靜者寓動麤者舒老懷難下俱崛強定力所致何曾拘山川悠悠造物戲雕縷變怪翻空殊春華笑語同一躍風日蒨麗紛紜鋪當秋執令有嚴典殺氣一動分存除天公於松似無意不使霜雪生空虛窪塘曲水多葭蒲亦有垂楊當路隅低頭折腰各善下天骨卓立汝不如修藤歧出當斬死乃竊露雨翻然蘇蒺藜如刀薶如炙種惡見愛無人鋤我疑造化厭寂寞物物以氣爲之噓懸鑪

大鑄散端朕復淪精液相灌輸苟如人性從習改安用詆  
及胎元初不然是松亦受氣何以獨得含扶輿橫遮赤日  
挾飛雨坐吸石髓收雲腴虬鬚吹陰散野色磽土藉蔭能  
生枯風濤一夕自天下警若暮鼓長槌桴名材異產有呵  
護何物貿貿操斧鉞雙龍垂甲作大棟傾倚斷折猶須扶  
突然摧根又挫節推倒奮若風霆驅蒼茫天意胡爲乎高  
高聽卑有耳無昔巢此樹有一鶴驚起大唳聲爲痛急飛  
上天訴天帝帝曰爾鶴嗟何愚葭蒲垂楊爾弗止蒺藜蒺  
艸人所譽世人好此自嫉彼松也岸異非無辜陰陽疑戰  
必倒置我亦不得司其符爾歸莫學鳳皇鳥絕去凡下棲  
高梧高梧當焚鳳皇鍛妒松者衆爾自孤試求枳棘姑苟  
活翯翯白羽何妨汗委蛇眞訣帝語盡鶴立泣然垂淚珠

陳士芑字翼謀湖南湘鄉人光緒甲辰進士現官郵傳

部主事有憐蛸室詩錄

次韻平等閣感事四絕句

縷縷秋愁欲上簷長門草冷碧雲深拚將舊恨消新恨未  
必君心似妾心

花菱鵲啼夢已陳淒紅慘綠泣殘春遼陽盼斷無消息落  
日黃雲思殺人

枉費渠儂十日思干卿甚事自猜疑碧桃落盡春將老香  
夢闌珊百不知

凋闌倚偏月移陰青鳥難還信又沈試向瑤池禮西母拈  
花微悟去來今

題入境廬遺詩後

沈沈魔界三千丈寂寂詞壇七百年  
佞杜媚韓迷故步反平聲騷變雅得新筌  
奇裝競附黎邱鬼食字猶憐脈望仙  
空有詩名傳海外西江嗚咽恨難填

張文達公輓詩  
丁未

愛國身先殞憂時淚獨多天留新日月魂戀舊山河  
弱昧憐刀俎艱難痛斧柯頗聞諸將相觴詠尙婆娑

運豈丁陽九神應託尾箕公忠明主鑒國粹小臣悲劫  
定猿蟲老梁傾燕雀嬉英雄滿襟淚孤意獨誰知

莽蕩山河古盧牟未易任九州疑鑄鐵衆謗欲銷金  
文軌鴻圖拓梯航外侮侵平成孤素志誰念禹功深

半生知己涕揮灑向誰多幽思通芳若靈芬襲女蘿  
交情呼小友文字證維摩渺矣風流歆梁園不忍過

送趙芷蓀侍御南歸卽次其留別詩韻

槐柳蕭蕭咽晚蟬客情撩亂落花前  
飲蘭餐菊且歸去碧海青天一惘然  
過眼雞蟲徒爾汝故山猿鶴喜便旋  
湘衡勁氣今寥落努力修名式後賢

緇塵黯淡點朝簪側帽愁看白日陰  
世變已驚如電幻行歌翻羨入山深  
直言自是關元氣公論猶能動帝心  
愛國孤懷期共證薜蘿香處一披襟

于晦若侍郎奉 命使德意志攷查憲政李堯琴參  
議招集朝士設祖陶然亭會者三十五人賦詩送  
別余成三律

英簃新函奉 璽書靈槎萬里壯游初  
失官求野今猶信

舍己耘人計豈疏月照烏山

烏拉大山爲亞  
歐兩洲分界處

聞漢雁潮生



紅海舞神魚萊因河畔花如錦應譜春詞付象胥

長安冠蓋盛追從禪悅偏尋物外蹤清望一時屬司馬張

文達薨後京朝士夫數文章宗匠必首推公高樓百尺臥元龍公奉命後即移居城南龍爪

槐避署習靜條然自適隱囊紗帽吟疏雨蠟屐貂裘趁曉鐘此去西

遊參寶主琅書親受紫泥封

海西遺跡訪張騫異國重游亦偶然公會隨李文忠使節至柏林譯道

揚言求宛馬新亭流涕話桑田鄒枚炙輠多能賦郭李同

舟望若仙祖帳東門歌進酒秋笳吹動柳如煙

偶成

功名鉛槧兩蹉跎獨立飛樓踏踏歌月落星寒宮樹靜萬

鴉無語看天河

雜詩廿四首

錄十一

痛哭陳書累萬言  
蘭呻蕙歎訴煩冤  
君王愛老臣年少合  
託湘流弔屈原

璇機玉杼日紛紛  
爭向天孫乞錦雯  
新絡水絲千萬縷可  
能持贈沈休文

衛霍聯翩擁節旄  
烏衣門巷漸蕭騷  
清貞頗笑王懷祖得  
隸中兵已自豪

下葯無靈劇可憐  
長生難得上池泉  
東游掇得扶桑甚白  
日飛昇作上仙

異國櫻紅聽鷓鴣  
無端神海嘯天吳  
八千子弟齊回首一  
髮千鈞挽得無

指丙午日本留學生事學生至日本無不  
祝髮者事起倉卒發憤相率歸國至上海

爭飾假髮  
髮貴一時

茂材異等試新科  
浮海齊揮逐日戈  
去國悲吟歸國笑春

風紅杏少年多

奇服脩容入世難陸離長欽切雲冠芬芳獨抱貞臣節莫  
作清流岸幘看

浩蕩靈修莫予

上聲

要誰將芳佞判蘭椒遠游自爲悲時俗

九逝精魂未易招

禹鼎荒唐未足奇鴟龜雄虺正譖譖眼前怪事何曾見付

與齊諧續楚辭

以上三首釋騷

華冠縱履豈逃名一笑麤官抵葉輕君看樓臺平地起幾  
人坐嘯到公卿

黃金能解相如渴白眼翻遭亭尉呵獻賦封侯兩無分雙  
丸相逐去如梭

章 榎字一山浙江臨海人光緒甲辰翰林現官檢討

郵傳部參議上行走有一山詩文集

定東陵行禮歸途感賦川戚南塘盤山絕頂詩韵

寒年鶴語有餘哀

時爲孝欽顯皇后二周年之期

白口堂堂霧未開

闕殿香沈飛鳳田宗藩俊畢獵禽來山川龍虎騰王氣魚

水君臣屬霸才莫箸茂陵封禪草漢家有詔下輪臺

題盤山

我本天台人素懷在山澤驅車出薊門來作盤山客盤山  
何物奇所奇松與石松故幹老蒼石尤撐空碧想自皇古  
初補天留遺迹不受秦政鞭不齒謝安屐磊落而嶽嶽橫  
空摩峭壁田盤昔潛蹤田疇繼分席遂成隱者名佛亦置  
香積此石氣縱橫負高累千百舉世尙脂韋獨居岸巾幘

舉世好附趨獨寐懷孤僻是以當路人望之驚魂魄或以  
怪相嗤或以頑致惜洪維我聖祖三顧來徵辟亦越我  
高宗玉步臨山脊翦茅建行宮與之共晨夕經營八表  
餘天章輝珠壁因地量其才靈巖供刻畫登封泰岱巔  
未足踰絢赫爾石被殊榮非以詭隨獲受寵仍不驚所報  
無奇策願爲崇朝雲霖雨及蠻貊願障橫海流磐安奠中  
宅世變日支離所恃寸心赤敢告盤山靈吾言當不易  
題雲罩寺舍利塔

出入東華近十年相忘身住大羅天偶來絕頂臨風立四  
面嵐光落眼前

椽筆留題萬象環浮雲忽起障邊關

塔院西壁天津徐相國師題萬象在旁西

大字光緒癸巳十月時方官編修也名臣志業安排早我亦從容到此間

陳毅字詒重湖南湘鄉人光緒甲辰進士現管郵傳

部候補參議

君爲劉幼雲同年廷琛分校所補生學行力追古人師弟之間契洽無倫

贈君楹帖以通儒名德相期詩詞不多作所

邊馬吟

凡響挽張文達及邊馬吟西山諸作尤爲沈聲

邊馬出雄關英姿動鳴咤天風吹番旗落日照大野豈知

章臺旁驕驄繫芳牙天生毛骨奇馳騁詎相假但願成人

功安能老都社土苴視豐芻蹴雪汗流赭神駿迴絕倫胸

中有區夏黃沙漫空來顧視自閒雅振鬣偶長嘶方臯世

豈寡勁弓依壯兒寶劍酌良治此馬能報君將軍孰健者

小孤山

寒濤千頃赴吳門鎖鑰重關砥柱存山影中流圻荆域江

聲北走挾雷源雲霄一鷺摩峯頂風雨老龍吟洞根故里

彭郎今寂寞陰旗猶簇舊乾坤

登岳陽樓

北峽南湘此建樓危欄橫瀉洞庭秋魚龍寂寞生朝冷蛇  
象荒唐見古愁六鎮旌旗晴嶽色蔽江舳舻老成謀彭陽  
水  
此軍於楚材淘盡湖千古坐看風雲起上游

登黃鶴樓

多難登臨意更孤滔滔祇見濁流汙百年江漢思靈傑萬  
里舟車雜晉胡武夏地居天下紐廟堂誰定宅中圖憑欄  
試向長安望一夜西風淚眼枯

寂寂

寂寂生遙夜浮生寄託微更繁風乍定燈暗月多輝佳日  
看看盡頻年事事非如何北渡雁嘹唳向東飛

嚴復字幾道號幼陵福建侯官人宣統元年特賞

文科進士現官直隸候補道學部承祭上行走

辛丑三月北行和熊季廉作

十九世紀初告終搏搏員地趨大同神機捭闔初變化爭  
存物競誰爲雄至人先天不滯物高下體合同張弓心知  
斯民致仁壽何徒食苦師蓼蟲大哉培根氏告我觀物見  
道冥纖洪三王五帝各垂法當其時可皆爲功蚩蚩之氓  
俾自主如適州渚浮艤艫及其時過仍墨守無益徒使百  
弊叢矧茲天意在混一異類殊俗終棣通是時閉拒議自  
守何異毛毳當爐烘履而後艱常智耳旣懲勿省庸非惜  
四萬萬人皆貴種遂使奴隸神將恫所以百千億志士欲  
持建鼓搥頑聾賢愚度量幾相越聽者一一如耳充膠膠



擾擾何時已新舊二黨方相攻去年北方致大釁至今  
萬乘猶塵蒙亦知天心未悔禍南奔避地甘長終豈意逃  
空得罄欬知心幸遇四五公就中愛我最親摯僕指先屈  
南昌熊心期渾欲忘彼己圭角細與加磨礱人生行止不  
自詭扁舟忽欲隨南風瀕行握手無所贈惟有空氣如長  
虹橫流他日儻相遇所願身道雙加豐

戊申五月白題已卯小影

鏡裏分明隔世身相看三十過來春風燈骨肉今餘幾土  
梗形神定孰親已有人歸留鶴語更無松老長龍鱗君聽  
石子岡頭曲休說虞翻骨相屯

上海劉氏園見白蓮孤開歸而成詠

五首錄三

三伏炎蒸晝轉雷羣倫炊甑向塵埃一株娟靜標高格此

是靈山會上來

露筋祠外月初上仙掌峯前風正清  
欲采盈盈太孤絕胸中長此玉崢嶸

南薰無地嫁娉婷手築盆池養夕馨  
身怯九天風露冷樓臺倒影浸秋星

題蘇戡八股舊稿

讀書志祿仕道已成禽犢彼哉東方生  
文史三冬足魏晉用九品隋唐取書牘  
詞賦資求才猶網張一目美意制十  
科迂論司馬諫已而程經義作計非不熟  
爾來九百年奚翅億管禿得者矜文儒  
旅進猶鳬鰭鰭假令長閉闕千世用一律  
豈知天運改因應紛萬族瞠目倚虛橋  
舊學等無術往者經世談泊今令人惡  
廻思趙幽州半部語真毒迺今

又一變龍蛇起新陸  
論語供燒薪六經任生醯  
渡海求羊皮歸爲五  
穀醫挾瑟吹笙竽所志皆食肉  
侈侈輸文明盡成果  
羸祝始知變法令真無與清濁  
夫惟大雅姿於法靡所宿當爲  
穀中遊已褰方外躅斟酌新舊  
間緣此爲經督讀君制菽文同  
時須膺服

贈陳弢老三首

夢想南陽八百桑  
風雲事業入祠堂  
公今二紀親田畝  
猶有觚稜不忍忘

鄉里攀翻近卅年  
樽前相對各華顛  
不妨磨洗裝風景  
六十流光下水船

世事從伊海變田  
我曹諧笑盡前緣  
相逢吉語無多慰  
但說詩功勝舊年

羅愔融字揆東廣東順德人優貢生現官郵傳部郎中

挽長沙張文達師三首

凌晨促府趨行李廣路塞入門問諸孤灑涕氣彌結執其  
少者手泣對腸欲裂傷哉十齡童類父入豪髮持喪若成  
人賓僚嗟秀出贈言勉孝友勤讀光先烈聆語信知感亢  
宗理可必婢僕淚恨襟不忍棄斯宅風淒靈輦舉目慘眾  
哀激觥觥尙書府龍門高百尺萬流爭趨壑存問及鞮譯  
去年壽觴舉冠蓋傾一國今年素車來杳不盈什一生死  
交情見喧寂世態出飛旄出郭門萬古音塵絕燕雲莽淒  
黯湘波定嗚咽他時西州門車過盈痛惻

憶昔辛壬間籌學集眾謗憂危耿不寐委曲跂一當積誠

恃信主卓絕賴冥勗于

晦

若

黃

仲

文章宗吳

肇

甫嚴

又

天下望

陵

一

一

一

汪頌王

書號博物張圖小

元亦

實宗匠五百識聚賢時流孰

堪抗闕新驚羣聾露刃森相向屹立鎮駭流百川此東障  
僦僦生徒會天門開詆蕩羣材待陶甄皇風日敷鬯志未  
竟百一孤懷冀誰諒萬方悲一槩山頽吾安仰廉頑範來  
詰跂瞻鑄蠡像

斯文日殂喪大道嗟久裂朝貴謝宏獎風流愈衰歇公實  
秉至誠求士若飢渴獎誘到薄技苞苴絕宵謁汪汪千頃  
波日月互吐納公存士氣伸公歿正氣滅王路塞清夷履  
蹈莽荆棘長官務氣使賤士善容悅唯訶等奴厮濡慙甘  
婢妾文采致爲災直節終自賊嗟哉受恩人渺若非素識  
悠悠天地間念此神魂折吾生絕知己誰更念薄劣還當  
慰公靈益勵歲寒節

孫寶琦字慕韓浙江錢塘人蔭生現官山東巡撫

甲辰孟夏于役西班牙京都贈日本赤羽公使

雅聞才望重扶桑槃敦叨陪共一方樽酒風流知逸興歌

行慷慨見真腸機謀可畏嗤歐美君謂白人機智可畏餘不足取種族須

嚴辨白黃雲水蒼茫東海指捷書惟盼報遼陽

露西絕似虎狼秦東掠西侵進取頻營路築成謀並拙秦

長城俄營西伯里鐵路皆自謂萬世之業不旋踵皆敗銷兵弭戰計翻新秦銷天下兵器俄創

和平會於荷璧歸趙土終無關指東三省鼎重周京莫問津唇

齒相依有同志報言仗義賴東鄰

疊前韵呈諸和者四首

憂時撫事感滄桑國信縱橫使四方詩詠脂韋慚媚骨言

多圭角露剛腸漢廷原自重鸞武朝右微聞尙老黃 聖

母會逢開壽域昇平祇合賦朝陽

昔日論文笑過秦環球得失較量頻人才豈必分歐亞朋

黨何煩辨舊新忠讜卽今空獻策名言自古賴傳津

胡馨吾云

奉西名言多與吾古聖賢合

轉軒近接多豪俊海外論交幸結鄰

莫笑浮屠戒宿桑欲除煩惱覓良方每承朋輩加青眼敢

謂生平具熱腸義取正名窮道白

荀子正名篇說不行則白道而冥窮不論參

齊物任雌黃放懷天地原如寄坐看浮雲送夕陽

何處桃源可避秦山深林密夢中頻長留宗國衣冠舊厭

聽中原戰伐新蘇武但聞能仗節宣尼底事諷知津羈棲

海外渾無賴且向江邊訪釣鄰

郊居近河多釣艇以二首次韻詠懷

耆齡字壽民滿洲正紅旗人官內閣學士有蠖齋集

蔣貞女詞

羅綺不如布鉛華不如素繁霜委百草乃見女貞樹解一雲

黧黑兮賊兵來望天涯兮女心摧有父遠宦燕南陲母老

妹弱將依誰解二賊叩門阿母無色鄰里奔賊入屋小妹牽

衣雞犬伏傾箱倒篋女不瞋得全骨肉焉辭貧解三賊無端

賊屢顧身可殺豈可侮把刀勢面紅闌干呼母罵賊賊膽

寒兒貌雖毀兒身完解四勸母勿悲勸妹勿哭賊去還來有

鳩已蓄地下可同歸銜杯血漉漉風淒淒兮月照幃母攜

手兮妹肩隨父何在兮宮門楣魂有知兮應淚垂

客甯波遇俞恪士出示新詩卽題卷尾時辛丑正月

慘澹烽煙黯兩京春風也自到江城眼中誰有匡時略笛



裏愁聽入破聲憔悴徒傷同越鳥飄零何意遇蘭成干戈  
滿地驚華髮一讀新詩百感生

雜詩錄三首

嶓嶓雲中寶月樓珠簾高卷記宸遊花藏鳳管清歌細柳  
拂爐煙綵仗浮銀漢影移頻望幸白蘋風急忽驚秋宮車  
虜騎同經過回首寒泉日夕流

請纓慷慨辭金闕臥鼓倉皇走路歧灞上平添新壁壘眼  
中非復舊旌旗空悲日冷荒三殿爭說時巡向九疑台省  
久無憂國淚可能青瑱哭朝儀

殷地雷鳴動鼓鼙秦關百二望全迷傾城想像遮雕輦極  
漢雲山隔碧雞痛哭何人能復楚聯衡無計可全齊舊時  
豐沛今衰歇振臂猶聞有駃騠

偕客遊西山香界寺登絕頂歸途成詠

西山日在眼冥想接雲岫看山不到山毋乃爲世詎先喜  
獲同心招邀踐巖竇離郊未十里已覺嵐影湊快然展良  
覲蒼煙落衫袖筍輿山脚迎厯險等飛猱一徑入松樾虧  
蔽變晴晝下有寒泉鳴萬古瀉石霤沿緣被礪草側耳迷  
裔冑微風拂鼻觀疑有林花秀不辨是何香逕欲掬水嗅  
仰看香界寺傾葢成邂逅升階作小憩淪茗清可漱樹杪  
羅川原開襟見錯繡商量更造顛此意吾已畜置身上壑  
中正恐爲境囿不辭腰脚疲方知所得富奇情四面來一  
覽無遺漏東南指王城煌煌列層構西北俛桑乾浩浩轉  
奔溜卻望清山尖劬迥出羣峰右斜陽半沒趾濃翠露堅  
瘦十載困黃塵自笑眸如豆平時結夢寐今始發其覆徘徊

徬不忍去呼僮屢視候暮色起遙空下方鐘鼓奏勝游期  
再舉僧房容暫儻會待月明時攜酒一相就

二牖泛舟

雲際山峩峩城灣水瀾瀾升高固足豪臨流亦可喜憶昨  
陟翠微豈料今在此世事波上萍安能問行止人生貴適  
志吾乃偶然耳不見隄上柳婀娜隨風靡煙容作意青日  
照可憐紫晦明咫尺間百變復何理從誰叩兩端爲我究  
原委船舷一俛仰林轉境又徙幽深易平曠卻顧未移晷  
遠碧草連天低空霞散綺維舟就曲岸或可遇蘅芷喧喧  
鬧鵝鴨發發集魴鯉物性本難齊所樂不須訾當其噪唼  
時焉知有泥滓吹息溷世塵瑣屑同糠粃素月漸窺人清  
歌迴樵起西望認遙岑已入蒼茫裏

三 多字六橋蒙古鑲紅旗人現官庫倫辦事大臣

歸綏得冬雪次尖父韻

白鳳羣飛墜羽纖大青山上朔風嚴精明積玉欺和璧皎

潔堆池奪塞鹽

蒙鹽產於池

沙亥

蒙言鞋

無塵卽珠履板申

蒙言房屋

明史作板升

不夜况華襜鐵衣冷著猶東望極目觚稜第幾尖

無垠一白莫塗鴉大放光明蔑戾車

佛經言邊地也

難得遐荒皆

縞素不分榆柳盡梨花瓊樓玉宇三千界磊幕穹廬十萬

家預兆春耕同頴瑞陳平宰社餉烏父

滿蒙以少牢祀神饋餉其膺日烏父

邊塞苦寒蒔花不易偶購盆梅數株紅者尤佳適讀

樊山先生紅梅詩和而賞之

八首錄四

誰憶春寒賜錦袍夜光杯酒醉蒲萄千頭奴婢呼丹橘一

品夫人認絳桃雪北暗香和鶴守江南芳訊託魚勞太陽

不是偏相照的的先開直幹高

冬心剛冷得春暉一笑渾如畫錦歸林下美人除粉素山中宰相盡衣緋豔於桃李何曾俗烘到雲霞也不肥玉照堂前三百本幾時移入綺羅幃

迢迢東閣報開花出塞姬嬌憶漢家曲度雙聲賡絳樹功成九轉鍊丹砂聰明未必輸冰雪濃豔無妨效曉霞鄉事向君應問訊芳風可透綺窗紗

一枝濃抹上猩屏不向林家鬪尹邢丹的點題增斌媚絳紗封臂惜娉婷長庚酒沁吟詩筆後主羅圍奏曲亭每到黃昏搖燭照仙標越瘦越瓏玲

登歸化城北樓書感

長風萬里詎能乘聞道黃河昨夜冰地接大荒聊縱眺天

垂圓蓋讓飛昇悅無情話疎親戚畏不懷歸豈友朋鈴閣  
無人來獨嘯雲中鸞鳳一齊膺

移節庫倫信懷民軍帥索題冒鈍宦京卿詩卷子因

感舊遊惜別懷人不覺一時交集也

長安多貴人輕肥事裘馬十載少年場總覺吾黨寡信侯

人中龍風流亦儒雅自紆萬戶尊強仕歸茅舍

立民通侯有竹籬茅

舍季方更不凡公卿長揖謝人道二難并我謂二疏亞西

湖與之拋前年來日下日下二三子一笑臂同把春風桃

李園秉燭遊良夜丹鳳復飛來頓促東山駕任尙佐班超

邊騎慚共跨論功不自居讓美增吾價疊拜九重恩傳

遽將別也袖出冒君詩索我墨花瀉焚香展卷吟清妙勝

於麝如入水繪圖如聽聯牀話見山語所見

耆壽民總戎

今之

成容若鈍宦筆不鈍今之張仲治明日去朝 天重結香  
山社只愁無車公欲去又難捨安得飛將軍奉 詔從天  
下

述懷

興公欲賦遂初還竭盡微才莫濟艱敢戀肘懸金斗印祇  
思身入玉門關集桑集柳憐黃鳥開鎖開籠羨白鵬願乞  
長風起天末蒼生十萬換青山

畜眾安民詎有權毳廬獨坐似鍼氈願看他日花長好待  
到層霄月正圓手續千言驚白種心經一卷懺紅禪釣鰲  
我欲浮東海何必龍城萬里專

中秋夕與家人登汗阿林樓觀月

全家行萬里今夕忽三年月影人同滿秋聲雁獨先故鄉

方啖餅此處已添絲莫道高寒去明朝是日邊

和幕中諸友庫倫中秋詩

今夜人間徧舉頭防秋使者獨悲秋佛家無盡燈多少只照歡娛不照愁

邊庭

冠劍年華已過丁飄飄形影尙邊庭厓環瀚海東西白嶺界胡天內外青豺虎負嵎風助嘯蛟龍縱壑水騰腥萬人師長權安在空掩穹廬讀武經

九月初四日曉起見雪戲作此歌

昨夜天上逃詩囚紛紛搥碎白玉樓鐵衣都護方防秋聞此一躍撐雙眸但見白徧青山頭零珠片玉無人收大笑郊島豈敢偷高呼李杜相爲謀一杯酒換千金裘百首詩



四朝詩史甲集卷六

三

卑萬戶侯人間富貴如雲浮何必老死擁八騶吾其赤手  
擒銀虬冰天雪地騎之遊玉皇知我憂先憂不許斗北將  
身抽恍言三島和十洲雲斤月斧需重修汝亦桑土應網  
繆遲三千載再歸休

立馬

立馬天山最上頭萬方多難尙登樓懷歸豈僅朋堪畏止  
謗何妨自更修若士胸中容海宇褚裒皮裏貯春秋邊夷  
駭政須情恕遙減 宵衣旰食憂

李葆恂字文石奉天義州人官江蘇候補道有無益有

益齋論畫詩二卷

王閻運云文石以名公子多見通人少無臣情而篤嗜書畫通博精

鑒如數家珍

繆荃風師云君幼時即愛書畫升文

耕雲有髻年畫董狐之譽而畫詩專注唐宋名蹟推

究得失考訂同異與葉鞠裳

藏書紀事詩同為菽林寶筏

論畫詩百首

錄廿一首

虎頭妙筆絕今古點染陳思作賦材神似武梁祠畫壁老

蓮藍本此中來

展畫居然世尙存晉陽圖並鼎彝尊書名試檢陵川集莫

漫詩題賀六渾

摩詰雪溪曾過眼蕭齋舒卷幾春風清暉摹本妙毫髮也

付紅羊小劫中

江千雪霽右丞筆千載流傳色斬新可惜竟遭屠伯手王

嬌絕代落胡塵

張萱鼓瑟圖無恙殺粉調鉛古意殫省識飛卿詩句好額黃無限夕陽山

牡丹大幅刁光肩粉漬金鉤妙寫生署款卻防傷畫格石棱樹罅認題名

夜宴圖中妙寫生美髯小面足風情不因尺幅流傳在誰識開元羯鼓形

漠漠溪山粉墨輕江干初雪試閒行合教一段荒寒景付與南唐畫學生

江南半幅曾經眼元氣淋漓此幅俱魏府收藏標第一軸端元宰擘窠書

大點濃皴筆勢奇森森萬木攖蛟螭相從驅舫窗前挂驚

倒小長蘆釣師

襄陽著論未全誣尺幅流傳是也無蕭寺寒林今在否白頭方見讀碑圖

堂堂五老重睢陽北宋元明遞弄藏相對摩挲曾幾日半塘宿草意園荒

畫裏鬚眉盡老蒼合教洛社配睢陽焚香百拜才舒卷爲有溫公字數行

文畫蘇題一卷收後來學者只丹邱脩脩數筆如鸞尾合貯梁髯棲鳳樓

積雪羣峯寶范寬鴈池題字記文安科頭散髮卧其下凜凜高堂六月寒

中立秋山紈扇本黨家傳玩到吾儕孟津細楷妙題品筆

法渾如積鐵崖

妙絕河陽秋霽卷幾年流落在江潭市中張賣無人識神物終歸寶華盃

元吉猿圖羅塞朋 仁皇題句賜臣昇攀籐飲澗紛多態如此王孫那可憎

舜臣畫卷送元明折柳裁詩無限情何似雪江歸棹記欸題親署太師京

樓臺隱隱暮雲遮柳外宮牆一道斜躍馬中原太麓俗祇騎欸段看桃花

眼底更無吳道子別開畫境屬襄陽雲山得意筆扛鼎莫誤元暉作阿章

鄭文焯字叔問一字小坡直隸承德人有小坡詩詞叢

稿

著述甚富倚聲尤冠絕一時品學均抗希古人爲卓爾不羣之士

楊柳枝詞

五首

數行煙樹薊門春離袂經年惹麴塵莫爲西風搖落早霸陵猶有未歸人

拂堤晴縷萬絲柔祇掃芳塵不掃愁羌笛數聲鄉淚盡夕陽紅濕水西樓

曉含斜月晚含煙翠縷如雲挂玉泉香輦不廻秋又暮棲烏頭白近霜天

平居誰分解傷春爭睹長楸走馬身黯黯空城飛絮盡哀筓吹起六街塵

雨洗風梳碧可憐秋涼猶咽五更蟬誰家殘月滄波苑夜

夜漁燈網碎鈿

吳俊卿字倉石浙江安吉人官江蘇候補知縣有缶廬

詩集

君工鐵筆得漢印章法吳彥復謂可與  
鄧完白趙搗叔並傳詩畫均超妙自然

坐雨和鐵老

窗外雨如鏃驟涼生葛衣滿庭蕉葉大入坐草蟲飛興賴

殘書遣秋遲一雁稀虛舟何處著江海願同歸

自注云曾為鐵老題

虛舟縱  
浪圖

渡江

江風吹日薄江氣饒林昏杳杳迷京口荒荒接海門平潮

吞野岸一鴈點秋痕空負澄清志憑誰擊楫論

溧陽訪孟東野遺蹟

爲弔孟東野孤城倚溧陽苦吟山獨抱多哭淚誰償知己

縱寥寂平生何感傷世無韓吏部下拜亦尋常



太湖曉發

野店投荒三四間  
渡頭齊放打魚船  
數聲鵝雁雨初歇  
七十二峰青自然

題倪雲朧冰天躍馬圖

揮鞭似打天山圍  
漢家大將今數誰  
堅冰在須雪沒脛  
得意更揭裴岑碑

對酒

燈昏未昏晨鐘撞  
月落不落橫紙窗  
我歌寂寞少人聽  
擬抱銅琶彈過江

飲桃葉渡

桃葉渡頭煙雨繁  
飲酒快滌胸中煩  
一斗亦醉一石醉  
眼看江水人踏翻

趙上達字仲韜湖南衡山人廩生現官安嶽院南道

和蘭安落花詩三十首之大卽用其韻

麗華驕貴不須臾夢裡殘鐙照坐隅  
澆恨根愁三摘盡種因期惜十年  
迂甘嘗蓼食蟲心屢冷抱芳茵蝶命孤  
莫爲姬姜棄顚顚白頭記否舊當壚

乞將靈液灌頑骸無賴靈修信屢垂  
礪面有時和淚洗掬肝無地把憂埋  
山河影碎空中鏡兒女愁分夢裏鞦  
不信東鄰窺宋人隔牆又見一枝佳

伯勞通籍鳳凰巢西燕分啼柳禿梢  
香界不容鷄首翦粉痕已錯犬牙交  
血埋碧玉三年化淚鑄黃金一笑拋  
太息荃蘅芳已盡責言只合問包茅

嫁後黃姑隔絳河聘錢不抵別愁多  
江山難贖嬋媛命神

四朝詩史甲集卷六

美趙仲經

鬼猶哀窈窕歌弓影每疑遺挂在釵盟可奈墜權何廣寒  
倘拓藏嬌地莫縱吳郎斧素娥

鳥使銜來密意香肥甘分割册蜂王黃昏夜轉雷塘曲白  
戰天開雪苑觴坐徹蘇裘嗤母嬖忍牽蘭袖哭耶孃臣饑  
欲死侏儒笑人面都非舊六郎

彩虹吐作英雄氣誤認淫氛誚玉蟾絳蠟愁煙香欲凍銅  
壺恨漏水疑添網羅翠羽封塵匣刻畫螺鬟媚鏡匣索笑  
莫辭探險隊有人飛度雪山尖

和繭交落花詩成并題絕句於後

彩筆權爲花請命窮簷如聽鳥銜哀蘭成蕭瑟徐陵豔一  
樣江山兩樣才

江瀚字叔海福建長汀人現官河南開歸陳許鄭道

有東遊草北遊草

趙堯生侍御熙序其東遊草云江

臣以君薦天子承詔上京乃蕭然遊西山而返返浙  
江入粵禮重諸侯甚矣又蕭然去勞勞日本之程凡  
所爲皆迂闊不適事情者詩曰我瞻四方蹙蹙靡騁  
鳴呼知詩者通其故矣

塘沽

卸罷雲帆正落潮館人延客語喧囂倚門度曲紅裙陋入  
市橫刀碧眼驕遠道火車聲隱約近村土屋景蕭條長安  
咫尺翻情怯躑躅重來鬢已凋

至京師作

灰尋劫後淚猶潛斗覺承平氣象還無復金臺延郭隗那  
堪柴市弔文山依依蹤迹十年外落落交遊四海間明日  
陶然亭上去一尊聊爲破愁顏

贈喬一茂軒

伊昔遊京華年少志方銳事業期千秋意氣陵一世稽古

推杜馬論交喜莊惠

乙酉定交於伏魔寺

在遠德日敦積久心彌契

士衡再入洛去華重下第既嗟文

道費

出復痛程翰劉

鎬逝聚散果誰期巴山還把袂我橫博士經君考遺人制

余主講東川之五年悟彭溫拯活鱗籍嘉招枉羔幣

是冬

苦饑君自成都來籌荒政

溫拯活鱗籍

嘉招枉羔幣

余有

湘水校經

共舉嶽麓雲

君因北上紆道長

更鼓吳江柁

復

吳門鉤黨方屏營郎曹且留滯達官煽禍亂干戈歛相繼

妄信郭景術翻助天驕勢

翠華遂播遷

玉殿亦扃閉

崎嶇難幸平萬方益凋敝剪燭話滄桑生逢猶攬涕茗茗

江海空寂寂天下計良時惜蹉跎虛名媿經濟相期五畝

營灌田娛晚歲

憶劉幼丹兵備

牙節新移到贛州家山近接貢江流祇應入境臺前月分  
照天涯一段愁

寄沈幼嵐兵備二首

沈在日本觀博覽會未歸新除  
成縣龍茂道

繁華海外豔東瀛豪舉爭誇賽會行惟有使君應不負考  
工原只爲蒼生

三遷獨荷主恩優廉鎮依然錦水頭聞說西川諸父老  
久勞延頸盼歸舟

贈王晉卿卽送其之官甘肅

一別九年懷抱惡詎知邂逅在京洛入門握手一大笑容  
顏非昔情猶昨艱難苦憶罷官時爲言交態長嗟咨耳餘  
賢者尙如此世上悠悠甯足嗤且喜中衛循聲遠鑿渠利

四朝詩史甲集卷六

三

過青神堰此日謁 帝明光宮墨綬宣來繡衣返况復著  
書盈篋中一篇出手光熊熊戰爭廣采歐洲事摹寫頗有  
廬陵風舊遊終自愛西蜀深悔當年宅未卜薛井還期重  
煮茶杜祠尙記同看竹暫時聚首長安城青眼高歌空復  
情自古枋鳩笑鸞鳳從來燕石勝瑤瓊黃金臺下一杯酒  
起舞離筵動星斗人生會面須盡歡莫待它日空回首君  
家倚劍崆峒山余亦吹簫吳市還韓孟雲龍有時遇臨歧  
何用涕洟瀾

余 棗字節高安徽望江人現官山西候補道

續秋漁雜唱四十首 錄十一

久卧滄江意若何悲秋重理舊時歌  
滔滔今古無窮感一例都教付網羅

枉教蓑笠易衣冠來日依然事大難  
新稅催如流水急直將搜索到枯竿

舉目江湖盡笏簪有人齊物感難勝  
天池只未隨鯢化苦向人間俎豆登

蕭蕭晚景半江紅飛鳥參差返照中  
興盡收筒歸去好莫因帆勢趁長風

江湖珍重散人衙淡盡名心對錦帆  
頽岸草深行不到春風易起未容芟



四朝詩史甲集卷六

堯 余節高

水底蛟龍愁失水雲中鷹隼勢吞雲危磯袖手旁觀穩滿  
志躊躇對夕曛

蒼茫日落弔長沙滿地停燒不算家幽怨靈均蘭芷託豈  
關錦瑟怨年華

寒燈遠浦兩三星身世輕如水上萍月黑舟移潮信急苦  
呼隣叟不曾醒

久病清癯黃菊似積年心事白鷗知何時學泛鷗夷艇湖  
上煙波幾夢思

侯門長鍊未容彈遙夜灘頭念挽瀾長嘯一聲天地曉滄  
溟湧出水晶盤

玉簫金管醉瓊卮鱸膾葵味入時任彼雞蟲爭得失錦  
衾休自負金龜

陳鳳翔字菱潭廣東澄海人有東阜老人遺稿

同方筱圃赴龍王廟勘隄歸途有作

出郭廿里近紆迴隄路長自來稱澤國今又變滄桑野蟻  
人家少時艱井里荒一鉤新月上燈火見城廂  
故道驚全失河流與岸爭茅簷栖斷陌盛漲逼層城瀨淺  
飛湍急隄高積潦平招攜同一騎歸路暮煙橫

寄懷陳伯嚴吏部

三立

出處關天運憂時感變遷乾坤半羈旅江海任風煙邈世  
原無悶逃名定爲禪艱虞思共濟心跡託當年

答盛季瑩觀察

景璿

二律

天留文物在幽居大德名門世莫如一代風騷餘故宅百  
年華屋贖遺書雲龍際會題襟好塵海蒼茫罷酒初勝蹟

流傳今有屬笑他狐兔計原疏

不圖溽暑返林居商韻傳來落拓如載酒竟虛泉上酌捫  
碑重覩壁間書深沈鼓角涼秋後迢遞星河夜露初劍氣  
迸花憐我在白頭無夢愧余疏

題盛季瑩觀察柳隄驪唱圖

四首錄二

長將書劍傲王侯楚尾吳頭繫客舟暫息塵勞悲白髮大  
難風雨在黃樓騷壇文字空馳騁鴻爪因緣任去留自是  
便君能好客雍容裘帶事清游

文采風流畫戟開梁園詞賦媿鄒枚揮毫已奪參軍席調

鼎同欽上相才

謂香帥

客思漫隨隄上柳歸途更折嶺頭梅

送行詩句應千首領袖騷壇世所推

洪述祖字引之江蘇陽湖人諸生現官直隸候補道有如水齋詩

北江先生之元孫

雪後肯堂以詩見示和敬如韻

廿年不入山陰道雪後看山興仍好  
竭來久作江海人四十男兒未云老  
憶昔十五二十時孔楊視作大小兒  
等閑負此好身手迺與樽酒歡相持  
趙后昔問三無恙世以年豐占宰相  
病夫亦復蒼生憂故人幾輩青雲上  
滄溟靜日翻紫欄空山歸臥知猶難  
諸公白戰鬪鱗甲玉女一笑空中看  
新詩各有高寒境變化飛騰在俄頃  
海外方爲蠕蚌持宵深始覺魚龍靜  
眼前大地無纖埃求仙何必尋蓬萊  
紅爐綠醅萬事足無問西北浮雲來

秦淮感舊雜句

五首

細雨斜風暮復朝  
秣陵春事轉蕭條  
賸餘新漲秦淮水  
綠過當年舊板橋

畫船銜尾拍橋東  
欲託微波路未通  
不是昆明工教戰  
也裝艇子作艨艟

恩怨何須抵死分  
九原驃勇可知聞  
一篇鸚鵡筵前賦  
猶作河廳感逝文

劉壯肅勇號驃勇咸同中興以來一人而已

學士風流近若何  
似聞風雨閉門多  
遙知聽水山樓客  
一樣嗟成春夢婆

願爲比翼總生天  
絕代湘蘭可並肩  
千載墜樓人膾炙  
綠珠今有馬雲仙

汪雲仙本馬氏宦裔女流落秦淮所歡以療亡雲仙從容仰藥殉

通州弔劉葆真太史

宿草論時已再春  
招魂無地倍酸辛  
嘔心文字爭多士  
灑

血塵沙換美人劫火故城空寂寂路河秋水尙粼粼元戎  
壁壘精嚴甚試問如何馬服君

重過螺江呈弢庵閣學

女螺江上載揚舲江水依然照眼青萬里壯遊嗤往事八  
年舊約負山靈刺船已誤仙人島扣戶休疑處士星百尺  
高樓今再臥試談滄海與君聽

陳弢菴閣學見示和易實甫詩次韻奉答

別夢方山已十霜好憑南雁寄愁腸風潮瀛海猶傳箭晴  
雪園林自暗香饋歲懷人思酒琰盟心歸櫂誓滄浪峭寒  
幾日無新訊但覺春來晝又長

劉侶臣詩來賀出獄卽酬二首用東坡烏臺獄中韻  
幽谷頻經五度春坐忘久置定中身豈期請室彈琴客復

作炎天渡海人萬事乘除皆往復百年憂患見精神祇餘  
文字爲投契並世梁汾竟有因

平生本有滄洲願每遇青山首欲低此日雲中歸白鶴往  
年天上見金雞漫期趙尉資行橐且覓黎澗伴小妻拚作  
釣徒酬 盛世煙波深處太湖西

出獄口占

五年眼不見青山今日看山眼倍饒人以鬚眉疑面目天  
教閒散作頭銜早拚歸路尋黃鶴空有浮名滿赤嶸從此  
不愁猿鶴笑具區西畔好收帆

繆鍾渭字邵生江蘇常熟人官候補通判有百不能齎

吟草

君精於醫學客居津門活人無算詩筆敏妙積稿頗富安曉峯侍御維峻爲作序推獎甚至謂

其長於古風取法漢魏故能骨力蒼堅意味深厚卽近體亦不失爲唐音

梅花嶺謁史忠正公墓

不盡滄桑感握衣拜墓門老梅護祠屋落日弔忠魂驍將  
驕能制屏王志易昏江淮本殘局成敗不須論

報國孤忠盡誰堪伯仲間鞠躬漢諸葛正氣米文山事歎  
權奸誤心傷國步艱千秋遺表在披讀淚潛潛

擬淵明飲酒四首 錄二

閒時但飲酒興至卽賦詩此中有眞樂餘事非所知讀書  
偶有得欣然竟忘疲會心不在遠吾道固在斯寓形天地  
閒升沈任所之貧賤詎足厭富貴不可期卽令慕富貴焉



能便相隨借問道旁人汲汲亦奚爲

藜藿足充饑何必饜梁肉短褐堪掩形何必被繡服無凍  
復無餒在我已爲福無爲更多求名利受羈束緬尋苦縣  
言知足乃不辱持此一觴酒謝彼千鍾祿

懷閩生仲兄延安用五弟懷大姊韻

思君飛夢到延州莽莽煙塵接塞秋萬里寒風吹畫角五  
更殘月隱邊樓雁聲遠自霜天落客淚多隨江水流兄弟  
團圓定何日關山迢隔亂雲愁

書憤二律

一木何堪大厦支邊隅日夜羽書馳已嗟待兔功難建且  
補亡羊事未遲江夏方移陶侃節睢陽空盼賀蘭師貔貅  
坐擁稱無敵未肯同心報 主知

倚劍高歌感百端，側身南望海天寬。  
風鳴笳鼓軍聲壯，月照旌旂殺氣寒。  
單騎無人走回紇，長纓何日繫樓蘭。  
伏波矍鑠今猶昔，銅柱勳名見豈難。

初春獨游城南人家寥落古剎荒涼得詩三首

步履城南去，尋幽信獨行。  
層樓團塋色，古寺蕩鐘聲。  
岸跨石橋窄，柳搖溪水清。  
青山初破睡，螺髻露江城。

地僻人家少，崎嶇徑未諳。  
夕陽明壞塔，流水繞荒庵。  
草淺緣難藉，梅遲香已含。  
奚囊聊覓句，勝境足幽探。

竹徑煙常鎖，松扉雲自緘。  
地偏近郊塋，境曠隔塵凡。  
老佛藏荒殿，昏鷄聚古杉。  
行行還復止，不覺日西銜。

津門秋日抒感二首

秋色蒼涼上郡城，蕭蕭落葉作邊聲。  
視師淮蔡無裴度，持

節匈奴愧子卿風湧波濤吹海立陣喧笳鼓挾雷鳴銀河  
天上誰能挽一爲寰區洗甲兵

三韓遙望陣雲高風鶴驚傳神鬼號競說邊疆屯虎豹未  
聞滄海掣鯨鰲臨淮壁壘終難恃李勣長城枉自豪借問  
東征諸將帥策勛孰慰聖躬勞

紀大東溝戰事弔鄧總兵世昌

陰雲黯慘海氣黑王濬樓船誓殺賊兩軍鏖戰洪濤中雷  
霆鏖鎗天異色高密後裔眞英雄氣貫白日懷精忠礮石  
攻擊亂如雨血肉激射波濤紅敵艦紛紛多擊毀我舟力  
盡亦沉水不分猿鶴與沙蟲全軍盡葬魚腹裏將軍麻陰  
得生出當留此身待異日志存滅虜圖再舉疇謂將軍節  
遽失將軍大呼曰不然甯爲玉碎毋瓦全誓與士卒共生

死人死我生何顧顏嗚呼人生孰不死死亦要貴得其所  
重如泰山輕鴻羽流芳遺臭俱千古將軍視死甘如飴凜  
凜大節青史垂嗟彼軍前身伏法畏敵如虎亦奚爲

仲秋下潞至張家口

大漠秋風匹馬行高原極目壯心驚道旁黃葉紛辭樹塞  
外青山半壓城有客天涯悲遠謫謂安侍御邊關終古事長征  
前朝戰蹟何須問荒戍斜陽故壘平

奉贈安曉峯侍御

慷慨陳書動紫宸男兒夙負膽輪囷朱雲折檻忠忱矢  
鄒浩投荒直節伸天下爭傳眞御史邊隅欣遇謫仙人包  
容自荷君恩厚雨露能回塞上春

上谷秋興六首 錄五

橐筆燕山北兩年三度秋  
陸機會入洛王粲尙依劉  
客思愁聽雨鄉心倦倚樓  
囊中詩一卷聊以慰羈遊

關柳疏仍綠庭花晚尙紅  
暮雲低作雨涼月暈生風  
身每逢秋健心猶出塞雄  
人生貴安命底用問窮通

關塞眞天險山川拱帝京  
當年資重鎮此地集精兵  
懷古心猶壯悲秋氣漸平  
滔滔東逝水尙作鼓鼙聲

不盡古今感臨風發浩歌  
塞穿流水急天壓亂峯多  
心事彈長鈇生涯辦短簑  
書成何處寄一雁度雲羅

萬里西風起邊塵改舊顏  
吟秋來遠塞訪古度重關  
倦鳥紛投樹晴雲總戀山  
半生常碌碌媿爾各安閒

繆鍾瀉字潼生江蘇常熟人有迂齋詩草

邵生之弟  
力學早世

秋夜病肺

秋窗落木雨瀟瀟排悶裁詩破寂寥已是愁腸成百結那  
堪病肺又連朝小樓風入燈逾暗短榻寒生夢轉遙歸去  
尙湖待何日青山紅樹路迢迢

宣州途次遇也文姑丈南來

去年淮上一爲別一別經年鬢已斑恰喜異方逢至戚頓  
忘故里隔重山半生飄泊風塵際幾日逍遙水石間等是  
皖南舟畔客挑鐙相對話鄉關

舟過金焦二山

朝過京江古渡頭金焦對峙不曾遊鐘聲敲到層巖寺霜  
信催歸萬里舟雲樹成陰藏梵宇山樓倒影入寒流回看

夾岸人家近一是瓜舟一潤州

雲陽書事

時留滯雲陽已旬日矣

江客久留滯思歸無限情朔風欺斷雁暮靄失孤城伊闕書難到新豐酒更傾前程望鄉處遠水接雲平

薄暮山行

夕陽明遠林展步經山麓深徑不逢人芳草滋新綠古松響清梵禪房隱修竹臨風聽飛泉憩石蔭喬木落霞散天際野鳥相徵逐凌雲久眺望綠澗聊躑躅向夕聞鐘聲幽懷滿空谷

秋夜對月

燈燼夜逾靜詩成人未眠樹凋星在戶漏轉月當天鶴警寒零露鴻飛遠入煙誰家吹玉簫聲遞小樓邊

塞雁

寒色催征雁。遙程極塞西。秋風妝閣夢。殘月戍樓聲。天闊數聲遠。雲陰孤影迷。頻年煩寄語。盼斷是深閨。

蘇臺弔古

館娃宮外數峰堆。欲訪遺踪。蹋碧苔。庭草無人埋。曲徑江天有月照。荒臺采菱歌歇。春何在。響屧廊空。玉已頽。吳越霸圖都一瞬。種種蠡。枉自騁雄才。

塞下曲 二首

數向三邊戍。威聲振一軍。有心破胡虜。無夢返鄉枌。甲冑隨關月。旌旗捲陣雲。但憑腰下劍。長爲建奇勲。

朔風吹大漠。萬里雪紛紛。壁壘黯難見。鼓鼙寒不聞。飛沙凋白草。行雁沒黃雲。不憚邊城苦。惟思答聖君。



四朝詩史甲集卷六

全 繆潼生之二

七月十七日大雨雷電詩以紀之

吳中秋後猶煥熱驕陽連日無清風庭宇溽暑苦難避竹  
榻冰簟難爲功今晨陰雲蔽白日四野慘淡煙濛濛電光  
萬道金蛇掣雨勢飛瀑將毋同恍如帆檣棄風鼓大浪還  
疑軍馬突陣趨長空驚濤雪飛懸絕壑霹靂怒激天爲紅  
山岳崩摧江海瀉大木盡拔路不通倏然雨止晴曦出商  
飈振樹吹簾櫳居人歡暢農父喜田疇浸潤秋禾豐安得  
明日再雨洗妖烽邊隅從此無兵戎朝野晏然四海靖亘  
天萬丈垂晴虹黃昏舉酒上高閣皓皓涼月升於東

蔣智由字觀雲浙江諸暨人有居東集

均客日本時所作

先考忌日哭賦

哀哀蓼莪詩古人不能讀鮮民亦有親每時追懷哭憶昔  
倚閭門望我奮羽翮風號木不甯高秋見永訣依依想容  
德故山同嶽岨常恐不肖身零落先草木浩蕩天地恩尺  
寸無報答

南北東西人余亦久行役故鄉日以遠音書每寥闕常恐  
蠟頭草牛羊或放逐不知松與楸同否前時綠秋風萬里  
來霜露亦已肅顧念遊子身踐履常惻惕何時一拜倒鳴  
咽墓前石

吾親仗義人行善性所樂每欲推此心拯濟及民物慘淡  
志不成悲痛徹心骨夙角何昂藏慰親無憂戚豈知溲落

身窮老轉迂拙途窮日以暮驚駭不可策撫茲藐藐躬永在不肖列

讀史記管晏列傳

戴我者高天履我者厚地生我者父母信我者知己父母同天地知己與之比深情發愷論奇言含至理相齊者管仲薦仲者鮑氏未矜管仲功先高鮑氏義龍門之史筆千古誰敢擬何世無管仲何人似鮑子獨令管鮑名垂輝映萬禩厥後有晏嬰高風亦相似史遷下蠶室營救眾默止越石遇夷維一旦脫縲繫故云嬰尙在執鞭亦欣喜豈獨史公言吾亦欲云爾嗚呼在高位進賢固其職一士或失所子陽豈知恥列子說符篇列子窮容貌有飢色客言之而窮君無乃爲不好士乎鄭子陽曰列禦寇有道之士也居君之國鄭子陽卽令官遺之粟臧氏未薦賢竊位孔所詆斷斷

古大臣風度見秦誓彥聖實能容心好口無管有技欣賞  
之與己若無二媚嫉之小人厥心乃反是何以保我邦又  
豈子孫利昌黎有奇語呼空欲薦士爲子言天扉芳菲出  
肺腑吾聞生才難用才亦不易溯自三季來世道日交棄  
秀稟生民人過半沈泥滓秋月吟薜蘿春風採蘭芷登高  
望大雲不雨空逶迤京房易飛候曰視四方常有大雲五色具而不雨其下賢人隱矣但  
見少微星照耀江海裏巖穴藏明珠廊廟失杞梓喔咿與  
嚅唼煌煌被朱紫以茗爲梁棟塗之以丹堊風雨一朝至  
傷哉終傾圯尙賢本太公墨家猶此旨親親尊尊與尊賢尙功爲中國政俗  
之二大分派周公太公各主其一說其影響遂見於齊魯  
的政治之間後世學者惟墨子主尙賢說○按上世爲種族的  
國家故多用親親說今世爲地域之國上與夷維昔爲太  
公履泱泱之雄風海邦猶未墜鮑晏生其間克踵前人軌

吁嗟今則亡風流長已矣徒令懷古人高談鮑晏事

鳴蟬讀離騷絕句

西風一葉下亭皋明鏡今朝見二毛  
賸有中原歌哭意鳴蟬滿樹讀離騷

浩浩太平洋二首

篋中藏元和汪君衮甫榮寶浩浩太平洋一律乃  
近人詩中之秀者因步其韻

浩浩太平洋神州一髮蒼風濤來四極爭戰莽千場  
歲旅春潮急瓊臺暮雨涼安瀾吾有策奇氣日撐腸

浩浩太平洋蓬萊鬱莽蒼神仙此高會花雨尚靈場  
水入櫻雲暖峯沈雪影涼林濤窅冥處仙樂斷人腸

伯牙至蓬萊聞海水

相沒山林窅冥羣鳥悲號成水仙操一闕見琴苑要錄

陳詩字子言安徽廬江人布衣有尊瓠室詩

聞宋芝棟侍御出獄喜而有作

不見醴泉今兩載模糊消息使人疑

近有訛傳侍御將出獄而病卒者

漢

家已赦甘陵部坡老曾書元祐碑放鶴且嬉閒歲月看花  
重理舊樽罍荒岡擁膝還如昨梁父吟成寄與誰

重過文芸閣學士舊居感賦

憔悴江潭舊逐臣清游曾此掩柴荆送窮韓子偏無術善  
賦荀卿自有名待輯新詞成別錄劇憐良會似前生可堪  
踏月元亭路籬豆花開蟋蟀鳴

酒樓醉歌呈吳北山先生

蕩蕩無由得廣場醉來天地一低昂嗣宗廣武空餘歎華  
子中年已健忘笳鼓似聞喧大漠圖書終欲證扶桑吳絲

清角誰堪聽不是逢秋也斷腸

贈桂伯華

邂逅句吳域澄觀喜道存長齋肖摩詰清嘯得蘇門世宙  
蛟螭閔風湍日夜奔斯人獨高蹈甘露沃靈根

送李拔可司馬還金陵

相見復相別輕舸問水濱苦耽方朔傳長念霍家親愴惻  
求遺草清狂駭路人悠悠秣陵渡梅蕊動芳春

呈海藏先生

三年零雨輯幽詩一櫂清霜撫柳枝綽約鷗羣還可識沈  
酣鱸膾竟誰知洛中言論歸高密吳下文章嘅總持采采  
秋英堪薄醉記曾騎馬習家池

陳 曾字可毅湖南湘潭人

留學東瀛究心吟詠積稿甚富余於己酉八月至東

京致查文科大學事宜君屢見訪余歸後寄五律二首相送其次章云斯人無可語逢子訴時艱古學論江戴人才慨馬班微塵滄海裏奇遇剎那間風雨蓬萊島有懷孫泰山

讀史四首錄一

末世王佐才蘇綽王景略學術本申商懷抱比管樂能運  
子房幄能入郗生幕願盼何清高矯矯人中鶚苻堅宇文  
泰帝王度恢廓草茅得奇士如魚不復涸舉國一以聽浹  
旬至臺閣百政丕改革大與下民約秦勢日以張周地日  
以拓信哉政治才可爲救時藥或乃譏事胡出處節有忤  
豈知豪傑士不肯甘淪落或爲許魯齋或爲荀文若上以  
行其道下以拯民瘼倘遇國士知夷夏皆可託況夫大一  
統原不分胡索春秋嚴華夷後儒所穿鑿強挑種界隙主



權乃削弱二十世紀中民族同黃鶴盧梭瑪志尼其說久  
糟粕軍國的國家主義乃浩博矧自炎黃戰久無真狄貉  
同是五帝孫同居長城郭喃喃辨族姓早爲識者薄我讀  
船山論惜其次斟酌安敢駁王猛安敢罵蘇綽

讀近人詩三十首錄九

閩海詞壇鄭與嚴老陳風骨更翩翩詩人到底能忠愛晚  
歲哀詞哭九天

陳弢庵

子思昔祇搜黔稿今日詩聲亦政聲一樣儒臣作開府胸  
襟却勝庾蘭成

陳籛石

辭章治世一而已爲政爲詩兩未開六代以還誰大雅風

華典瞻一樊山

樊雲門

廿年著述富虞卿湖海昭文識姓名我讀風人三百首解

詩惟有鄭康成

孫師鄭

倘知西學原東學應悟詞家卽哲家希臘詩歌傾世界煩

公輸入到中華

嚴又陵

來往金陵又幾時久聞人說李梅癡過江名士知多少爭

誦臨川古體詩

李梅庵

諫能耿直方爲貴詩到沖虛乃算高自是楚人善言語二

千年見屈平騷

趙芝蓀

舊憾茫茫那可填江山歌哭自年年天津橋畔難爲別楊

柳東風一杜鵑

夏穗卿

爲儒爲佛兩相宜世外詩心闕一奇如此才華銷受得宣

尼不學學牟尼

僧寄禪

東京九段靖國神社公園散步用黃公度東京不忍

池晚遊韻十五首錄四

楊柳輕輕鬥細腰隨夫過市太招搖相將並轡櫻花鳥來

看東瀛武士刀

西人每夫婦相攜過此

湘淮暮氣漢宮蟬一戰臺澎大海煙逃將旌旗游就館供

人戲侮自年年

公園有游就館貯所得之戰利品有吾國劉魏葉諸帥旗在焉

謝屐遊山歲幾經白雲深處履丁丁薰風汝肯吹儂去飛

到南天聚德星

遼東前事憾如何圭玷千年不可磨一自國無黃叔度更

誰人作出軍歌

謂公度京卿

周學淵字立之安徽建德人現官山東候補道有東海

頭陀詩稿

戊申除夕檢閱癸卯歲暮所步曾文正乙未歲暮感

懷詩均十首益增滄桑身世之感又步前均爲後

十首 錄六

千載羲農去不還庭前雙鶴自閑閑眼中杯酒慚新進鏡  
裡風霜戀故山瓦釜文章同一映江湖魚鳥自相關安危  
身世終堪計望斷瓊樓夕照間

舊種杉松已十圍平安書札到庭闌沈沈鐘漏鄉思轉嫋  
嫋華堂旅燕歸萬古衣裳顛倒想九天雨雪夢魂飛何堪  
裘馬傾城客猶憶江東一布衣

浮雲黯黯阻長征朽索難驅四海鯨糟粕六經猶迹相衣

冠百體愧神行明堂枉自誇儒術前席何人奏治平負房  
應同陽九厄睢麟官禮服重瀛

敢將冰雪傲蹉跎懊惱乾坤足嘯歌愛日何愁三釜少擎  
天終負一官多須眉已燭寒潭靜肺腑當從慧劍磨猶恨  
元龍豪氣在一竿東海掣蛟鼉

曾言治國戒烹魚瑣尾流離歎不如變法武靈猶可責和  
戎魏絳豈云疏尊王當重春秋學報國寧持長短書東馬  
嚴徐齊應詔可憐夏屋詠渠渠

茅齋安穩却風雷一枕黃梁夢覺纔佛國津梁雙祖合詩  
壇壁壘六丁開龍飛甲子餘今夕駿業重光啟後來偃蹇  
心情推賈島明璫何意托良媒

丁傳靖字秀夫江蘇丹徒人貢生

庚戌來京應舉貢廷試被放陳設庵閣學

延充禮學館總校時以吟稿見示感時憂世情見乎詞 著有江鄉漁話滄桑豔傳奇行世

都門雜興

庚戌

居庸形勝舊山河一代風雲冉冉過玉宇繁霜邊鴈警金臺斜照亂鴉多哀時誰鼓漁洋摻變徵愁聞易水歌獨立蒼茫無限意西風吹淚對銅駝

漢家十世遇屯遭朝局元黃黨禍延風雨一天談紹述江河萬事逐推遷侍中痛哭原非醉宰相調停已自賢輸與慈仁老松枯長安及見太平年

麟趾高華內殿班絲綸能掌甲能擐門高江左東西錄花發淮南大小山夜月簪裾盈邸第秋風旌旆照瀛寰親親自有先朝法不在凌煙畫像間

曾見曹司羨玉堂祇今清秘乞爲郎  
桓寬鹽鐵膏腴地漢武舟車利市場  
柳拂章臺春試馬花濃杜曲夜飛觴  
一勾倘得希文筆省却頭箕幾許忙

輿蓋喧闐塞九門承平無此錦乾坤  
匡扶人物羊頭爛謁候勛勞馬足煩人滿  
漸愁都邑小官多轉覺布衣尊  
簪帷一片腥紅染莫是哀鴻淚血痕

羣議紛紜集似麻諸天法會敢無遮  
雲霄迅厲三秋隼鼓吹官私兩部蛙  
國事可如翻掌易奇才幾見脫巾譁  
福先禍始憑誰問起看中天北斗斜

人物乾嘉最盛年承平觴詠望如仙  
遺書斷爛歸荒肆故宅淒迷冷夕煙  
一代風流空輦下百年古淚落樽前  
片鱗殘爪猶須惜異日追思信惘然

落落京華一布衣自攜詩卷看斜暉山川寥泚秋將盡風  
雨漂搖客未歸身計已嗟牛後拙鄉書苦說蟹螯肥黃花  
也似江南好開向愁中百事非

柳如是妝鏡歌爲曹君直作

絳雲樓閣煙飛夕墮下瑤臺秋月魄老樹飄殘豆莢紅香  
塵蝕盡菱花碧儂家生小住金閨搗得唐宮片影涼春入  
猩簾迎笑靨夢回犀枕照曉妝星眸相遍東林士此心早  
爲虞山死尙書髮白妾顏紅雙照盈盈入秋水拂水莊前  
月正圓我聞室裏望如仙脂痕春賦琴川漲鬢影秋涼笠  
澤船好夢方濃明社屋金甌殘破銅駝哭照見刀繩手握  
來郎意遲迴妾顏惡斜日西風白下潮江山金粉又南朝  
珠冠星燦蛾眉笑

阮大鍼以珠冠贈柳夫人見明季南略

玉轡風馳雉尾飄



柳如是戴維尾冠與牧翁  
並轡出游見五藩總錄

巾帽都非春不管年年鏡面黃

塵滿詔獄風波問吉凶青銅一片懷中煖天許生還感不  
禁玉臺差不負初心春風冉冉朱顏老暮雨瀟瀟白首吟  
月到中天圓復缺分香賣履聲嗚咽廿載恩深一死輕鏡  
簸灑遍啼鵲血泪漬塵封二百年背銘未泐土花鮮閱殘  
泡影都如寄照遍悲歡總可憐查田寫入金陵景此鏡題  
詠始於  
初白金  
雙雜詠後人一見都稱幸蒲桃天馬亦尋常愛他會照藤  
燕影勝國滄桑豔蹟多殘脂賸粉照山河玉京琴韻橫波  
畫一種蒼涼可奈何

王國維字靜安浙江海甯人諸生現官學部主事有靜

庵詩文集

天寒

天寒木落凍雲鋪萬點城頭未定烏只分楊朱嘆歧路不  
應阮籍哭窮途窮途迴駕元非失歧路亡羊信可吁駕得  
靈槎三十丈空攜片石訪成都

欲覓

欲覓吾心已自難更從何處把心安詩緣病輟彌無賴憂  
與生來詎有端起看月中霜萬瓦臥聞風裏竹千竿滄浪  
亭北君過樹何限棲鴉噪暮寒

留園玉蘭花

庭中新種玉蘭樹枝長幹短花無數燦如幼女冠六珈躑

躡牆陰不能步今朝送客城西隅留園名花天下無拔地  
扶疏三四丈倚天綽約百餘株我上東樓頻目極樓西花  
海花西月海上銀濤突兀來日邊瑤闕參差出南園辛夷  
亦已花雪山缺處露朝霞閒憑危檻久徙倚眼底層層生  
絳紗窈窕吳娘自矜許卻來花底羞無語直令椒麝黯無  
香坐使紅顏色消沮將歸小住更凝眸暝色催人不可留  
歸來經臥添愁悵萬花倒插藻井上

將理歸裝得馬湘蘭畫幅喜而賦此

舊苑風流獨擅場土苴當日晚侯王書生歸舸眞奇絕載  
得金陵馬四孃

小石叢蘭別樣清朱絲細字亦精神君家宰相成何事羞

殺千秋馮玉英

馬士英善繪事其遺墨流傳人間者世人醜之往往改其名爲馮玉英云

金 石字夔伯浙江會稽人有舅自寬齋詩文集

皓月

皓月出海嶠列星粲以繁淨無纖雲翳清如明鏡寒阿閣  
不長照西風吹紫蘭冥冥河漢闊浩浩霜露溥百丈銅仙  
掌鉛淚瀉金盤

讀讖

桓譚不讀讖諤諤誠儒宗非聖者無法光武難優容邳邴  
說新莽躬犯履虎凶不卽膏斧鉞固亦讖之功咄哉此兩  
君維秘緯是崇雖則殊廢興其惑將毋同

鼓瑟曲

秋河曉耿耿寒星澹無色仙掌瀉沆瀣清淚入胸臆渺渺  
楚水波朝霧和煙織香芭拋浮塵釵梁磨舊刻鯉魚誰餐

尾黃鶴不比翼彈徧五十絃絃絃自秋唧

贈顧石公

石公居在益山麓閉戶著書甘隱沈訪君幽徑想濠濮投  
我新篇如谷音詩界漫從禪理證霜華早向鬢絲侵槁梧  
坐據足消日任爾成虧昭氏琴

爲顧石公寫松花江開雪尋詩圖長卷并題

益山詩骨特巋截勁若鷲羽斗上振昂墮列峙利觜距君  
笑睨眎猶蠓蠓衒星劍川鳴天東鉅颺擁巖鵬盤空酒酣  
燒燭疾草檄十手磨墨聲隆隆松花江上夜雪壓曉看微  
茫數峯插曾冰鋪絮澤腹堅照浪乃受寒威指鞭馬躍出  
西關道粉堞旌竿凍痕深負囊踰足雨胡奴願隱於臍齋  
肩胛老松倔強氣不下植隊蒼旃整以暇飛鳥絕影天沈

寥狂歌脫口風爲嘖流光客裏驚歲除故園梅訊今何如  
龍蟠埜色浩無極結想碎玉鏘籜簌襜褕被歸來閱年九索  
圖寄我雙鯉魚多君豪吟忘筆罌寫成陡覺百感集絕徼  
風塵又一時撲筆蒼茫起獨立

壬寅中秋夕

冰輪穆穆漾金波可許纖塵點碧羅詩界華嚴彈指變酒  
人肝膽得秋多未應銀漢橫流急却悵瑤樓好夢過搔首  
山河明影裏西風無限樹婆娑

林社

清風合並巢居閣秋菊寒泉戢薦之繞屋梅花先手植隔  
湖山色舊心期公補梅百本數登放鶴亭兀坐看山卽今落日祠雲黯緬想  
憂時鬢雪垂去鶴寥天空結悵蒼茫萬感更無涯

送袁爽秋太常葬

瀕洞塵飛醜類橫封章痛哭有清卿芳蘭益見焚餘烈恨  
海難從劫後平津柳迴潮秋尙舞湖風吹淚骨猶生似聞  
追訟關西事惆悵潼亭大鳥鳴

秋日小園雜興

俎肉山河水逝東狙公事業馬牛風穿藜恰合蘭成賦餐  
菊甘儕屈子窮自笑形骸同土木嬾看得失競雞蟲擁門  
黃葉清如許卻喜衰顏被酒紅

話體操事

或作鳥伸或熊虎旨哉五禽養生主筋枯骨骸老顏侵會  
撮指天困痾僂至今體學傳歐西超距寧徒武節宜支離  
來觀一歎息惡勞之悔何可追

閔爾昌字葆之又字公礪江蘇甘泉人諸生官分省補

用知縣

柳

風吹陌上塵白日送青春去年新種樹高高已似人

安慶秋感

大隄楊柳不禁攀又送秋風下玉關一夜鄉心聞白雁十年明鏡照朱顏誰爲日下荀鳴鶴苦憶江南庾子山零雨飛蓬各天末不將詩句慰淒孱

和吳董卿二月十五夜有憶

玉宇淨於秋天河水不流盈盈一衣帶織女望牽牛碧海年年月金閨夜夜愁何當跨雙鳳飛向鳳臺游

又見春楊柳依依大道邊不辭攀折苦經歲復經年游女



明珠佩王孫軟玉鞭江南好金粉愁絕麴塵天

贈李瘦生

天涯不見吳歌雪

謂董卿

酒面頻邀李過江落木空山秋瑟

瑟疏鐙老屋雨淙淙孟韓交好憐同調曹檜風微陋小邦  
與子論文期盡醉春膠浮玉快開缸

南鳴寂寂黯離憂西日茫茫下急流十載論交惟數子寸  
心相許各千秋風花不盡飄蕭意寶劍空爲汗漫游對此  
莫須談世事海天東望陣雲愁

歲暮送李美叔還揚州

瘦生之弟

故人有弟同爲客傷往嗟來倍黯然愛我自將兄事敬備  
書頗仗主人賢二年舊夢歸秋雨一別滄江臥晚煙太息  
荒原今宿草知君愁詠鵲鵲篇

金支

五萬春花照酒卮金支翠羽墮迷離遙知官閣香殘夜正  
是歌簾月上時

莫雨

怒潮東海走鯨鯢十載河山往事非颯颯靈旗吹莫雨邦  
人還賽李侯祠

簡陳孝起京師

兩年飽喫東華塵夾策何曾干貴人貂纓車騎競馳騫予  
然人海藏一身悲歌那足解羈寂喜從鄉里來陳遵與子  
納交在童稚文書講肄連宵晨浮蹤忽忽感飄泊往事歷  
歷談酸辛城南命酒強排遣櫻桃三月斜街春清吟妍唱  
雜諧噉醉中肝膽森嶙峋久居不樂更他適別子見子意

氣真提攜襍被向陳衛霜淒月皎隨征輪中州文獻一憑

弔古來賢哲俱湮淪高名大節竟何有但留殘碣搜荒榛

黃流灝灝落天上太行黛色濃於皴詩翁到此無一字

此友

人見戲之言

山靈失笑河伯噀故人忽貽洛陽紙篇什一一輝

寶珍

君頃印近十年所爲詩日戊丁詩存郵贈數冊

上攀伯玉自高雋近躡元孝

逾清醕瀕行卻憶送我作辭義溫厚宜書紳交親相與貞

白首要儷雪柏儕霜筠神山風引不得到歧路奔走徒踈

踈跨鞍餐麥縱已慣俊味那便忘吳莼老我浪游亦云倦

今子薄宦甯非貧向長焉用畢昏嫁羊仲便可求居鄰五

湖三畝倘終隱去去煙波垂釣緡

張朝墉字白翔四川奉節人廩生有伯翔詩鈔

程雪樓中丞

德全

乞病還山送之以詩

殘春大地風兼雨塵沙蔽天滯行旅十萬生靈拜馬前是  
時帥節剛解組天生豪傑世所欽出山一片無心雲黃塵  
車馬五更夢黑水冰霜十載心庚子一變天地震六飛  
蒙塵繞秦晉遠東更丁癸卯厄他人人室飛白刃邊城流  
血殷松江彈花刀雨如風狂中丞忠義雲霄薄黃羊浩劫  
悲紅羊輕身一擲見回紇立馬軍前氣飛越出死入生百  
萬家奪隘斬關三寸舌大吏草疏騰天閭醞恩詔許同  
平章漢家渥承將軍令二百年來破天荒天子圍場初  
弛禁羆荒先佩司農印徵兵儲餉靖萑苻畫井實邊建州  
郡明農勸學柔遠人中朝近事在維新愛國苦心出奇略

憂時熱淚霑裳巾維 帝曰俞汝良弼三稔積勞已致疾  
連番乞病荷 溫綸打疊還山今有日憶昔並轡馳名場  
萬里青天飛海航疲驢悲秋雁鍛羽脫巾沾酒醉重陽黑  
頭卿相歸田早蹉跎吾益嗟吾老一盃綠酒灑行旌啼鳥  
聲聲歸去好

昭陵影片恭賦

百尺高陵壯彩霞當年曾駐五雲車龍城十二神仙窟螭  
陛三千帝子家王氣鬱盤山近遠秋光駘蕩雁橫斜 皇  
朝仁孝先天下小鳥時鳴盼 翠華

鄧 實字秋枚廣東順德人

題黃石齋畫松石圖 有引

雪廬贈余黃公松石圖蒼潤矯特雖在春景夷猶  
中已想見公歲寒之節讀公自記壬午暮春舟次  
維揚則公作此圖之時其去甲申國變中間僅一  
年耳去揚州之陷史公殉國僅二年耳當公蓬窗  
啜茗坐觀景物豈意轉眼卽爲冷煙蔓草之場耶  
城郭已非風景猶是覽圖神往爲題二絕

松石天成趣亦奇坐觀此景有誰知蒼容豈必無顏色不  
獨凌寒歲暮時

不堪十日思前事幾見蓬萊清淺流今日憶公圖畫裏青  
松白石過揚州

題徐侯齋畫山水

故山如在有無中，堪歎遺民落筆工。  
賣畫驢歸人獨坐，數株松翠晚搖風。

漳上松楸澗上堂，兩賢遺跡渺滄桑。  
依稀一片殘山水，罨畫人間幾夕陽。

桑園

少日卽爲客，逢亂今始歸。中園幸投迹，暫與時事違。  
寒食桑枝<sup>枝一作條</sup>青，微雨霑春泥。讀書坐牆陰，初陽上我衣。  
遠矚芳原色，綠與<sup>一作青</sup>風<sup>一作春</sup>簫齊。春暖欲眠蠶，<sup>一作午</sup>常鳴雞。稚子有眞性，野老亦忘機。  
昔聞隆中人，淡泊豈云非。樂此守素業，無營掩荆扉。

六榕寺厲齋喜任二來訪

微雨寺齋寒偶此適無事秋苔沒行徑日暮故人至虞琴  
試共彈魯酒不辭醉閒步出東軒欲打塔銘字

晚步溪口值月上有懷黃晦聞

晚步入孤村斜陽隱雨脚餘霞映水青殘煙暮花薄蒼然  
雲樹昏暝色闊無着微見冥際火疏林帶叢落須臾新月  
黃遠銜峯一角倒照碧潭深高掛翠屏削地白人影小波  
冷魚聲躍獨立修松陰高下橫畫格清光爲故人相對成  
寂寞離居抱端憂心期誰與託遙知樓居寒疏星照危閣  
懸燈夢煙江江空響秋柝

秋夜檢亡弟秋門遺詩

白日忽已暮西風吹我廬幾口不出門庭葉落已無大野  
空蒼蒼甯爲載愁區來日適大難去者不可呼海水日夜



東暫留難斯須嗟哉我弟兄壯歲多崎嶇南北萬里別坐  
哭天一隅天寒各歸家慘慘顏色枯生無一命寄死無一  
日娛汝歌動我懷汝吟憎煩吁汝病我鋤藥泥足荒邱塗  
暮歸坐床頭寒燈照人孤一朝辭我去埋骨青山墟月明  
荒草碧萬古長歎歎我悲汝不知辛苦獨愁予愁予亦已  
矣生死竟何如寒風吹做帷秋堂夜空虛黯黯青楓林魂  
來若糝糊展篋欲吞聲終宵自躊躇俯仰千載名人事恐  
見疏感此不能寐起行步前除草蟲鳴我旁微霜沾人裾

鄧 方字秋門廣東順德人有小雅樓詩文集

崖山行 六首

王氣煙銷憶武林兩崖雲雨晝陰陰胡塵幸免青衣辱仙  
馭猶聞玉璽沈燕市啼鵑君已去吳峰立馬虜初臨顏垣  
冷落慈元廟回首中原淚滿襟

當日偷安痛式微銷鍋半壁浙江圻王孫稱姪仇何在宰  
相臨戎事已非漢水上游南牧伺錢塘宵漲北軍飛淒涼  
葛嶺殘燈火曾送金輿夜出圍

秀山途從去蒼黃四廣三閩識語傷島寺行宮餘二帝泉  
州血刃惜諸王授經尙講舟中學設鎮誰籌海外防滿地  
白翎行不得鷓鴣聲急望家鄉

扁舟殘卒擁黃袍行殿飄搖濁浪高忠勇迎降元組練零

丁失利宋旌旄金牛山下秋啼鳥朱雀旗南夜落濤此去  
碭州軍似墨五更風雨避征舫

餘生求地問占城片渙烽傳敵騎橫顧命空憐賢太后遷  
都難復小朝廷紅羊刼換三分國白雁聲來四道兵太息  
膠州沈落處琴彈破寺水聲聲

絕嶠開邊第一關國亡無計欸金鰲橐弓大將旗颿白杖  
節孤臣袖血斑牛角山河悲出狩龍髯滄海夢生還年年  
嗚咽三霄浪王母靈風想像間

潘飛聲字蘭史廣東番禺人

題師鄭先生詩史閣圖

天真長眞君家閣駕山筆力乾坤支神仙眷屬住天上揮  
灑咳唾皆珠璣君爲詩孫實仙裔玉堂步武鸞鶴姿縹緲  
錦暉十萬卷玉尺金管四朝詩古先聲詩後圖史國風可  
補史之遺太白清平寓諷刺杜陵行在傷亂離李杜文章  
唐史乘劉刻山水非所思詩仙詩聖宗李杜日月君以一  
手持沈王張符選席散淫哇俚曲詩教衰龜山斧柯大削  
伐耿耿天日蟠蛟螭道咸同光擬中晚漢魏唐宋多毛皮  
誰山眞意造奇境倘存面目吾能知秀野草堂距咫尺千  
年上下惟君期

袁瞿園吏部招飲重晤師鄭先生賦詩呈正

四庫詩史甲集卷六

重刊

文史論心我輩纔  
況逢仙侶樂追陪  
江湖耆舊憑詩卷  
風雪長安共酒杯  
歌倚王郎休劍斫  
船同徐福載書回  
先生自海外宣南掌故從頭問取次春光到看梅  
約開春遊西山歸吏部有綠天香雪簪詩話先生有肩前樓詩話均傳誦一時故第二韻及之

師鄭先生出示呂詹生女士遼東小草讀竟卽用小

草中書素蘭集韵奉題

鯨綃撐出蛟龍舞  
女媧補天裂風雨  
獨憐風雨送殘秋  
我昨遊山弔黃土  
去歲遊杭弔石華女士  
中華才媛多嬌弱  
海外羅蘭今再睹  
舌木香含五月花  
手絲怨入瀟湘浦  
閨中愛國大英雄  
名譽雲霄見一羽  
西王弱水迴雲車  
側眼蓬萊自今古  
此詩投向大遼河  
光迸睡驪驚水府

蔣士超字萬里江蘇無錫人有振素盒詩鈔澤州郭象

負才尙氣肝膽槎枒於人世名利夷然不屑早棄經生業治歐語甚精久遊燕冀詩益雄奇健蹕

輓潘烈士宗瑞

縱橫六國東西帝誰識當年蹈海心世界明星微一點可  
堪震旦夜沈沈

黃龍戍外朔風寒鴨綠江頭激怒湍驅作水濤猶有恨中  
原屏障失三韓

五百童男意氣雄八千子弟海天東太平洋水旋渦急拍  
拍潮流颯颯風

遊十刹海弔李西涯

澈澱明湖一鑑開漫遊誰弔相公來廟堂一代文章伯樂  
府千秋著作才舊墅平泉虛竹石故園喬木委蒿萊如今

胡馬時南下草綠單于萬里臺

宋韻翻用  
茶陵詩意

雜感

逼窄乾坤夢易驚神州欲暮晚雲平江湖草澤英雄志風  
雨河山哭泣聲大地魚龍方曼衍當塗豺虎竟縱橫八公  
山在今何似依舊當年草木兵

雲氣飛揚帝子家陰風獵獵走胡沙羣空翼北千金驥腸  
斷江南五月花地缺金甌紛問鼎波澄銀漢漫乘槎蓬萊  
海上多歧路吹下迴風引已差

角樓摧落倚宮牆金碧觚稜淡夕陽滄海橫流猶浩浩中  
原歲月去堂堂西山爽氣侵平野北斗京華掇太行霖雨  
蒼生杯水在未容清濁擬滄浪

東南初日陰晴異西北高樓間闕開瓠子秋風猶似昨燕

城春色最堪哀  
神山驚動全球震  
子夜烏飛紐約災  
既倒狂瀾嗟莫挽  
驚聞地下有鳴雷  
郭云大力運掉如金翅剪海古人惟少懷有之耳  
彼美西方孰景從  
英獅俄驚鼎湖龍  
五洲厄運丁陽九  
咫尺雲山莽萬重  
大好湖山悲去國  
合流江漢盡朝宗  
當年復社人才盡  
莫聽東林寺裡鐘

臨洛曉發

太行山不斷  
一脈瞰臨洛  
昨日京華路  
今朝盜口陁  
關城初日紫隴樹  
曉煙青莫上  
邯鄲道黃梁夢已醒

題固關立馬圖爲程伯嘉觀簪作

立馬圖頭第一峰  
太行遙扼固關雄  
千年城闕唐虞際  
百戰河山表裡中  
神州幾扁鵲  
平定州鵲山上有扁鵲廟  
側身天地盡沙蟲  
淮陰終古留遺恨  
冷水涓涓流向東



秋雨遣悶

萬里秋陰鬱未開  
四山風雨逼人來  
水黏鹵氣天真漏  
佛閣潮音地不雷  
滄海橫流誰砥柱  
風塵多難獨登臺  
橫汾歌罷樓船杳  
雁落寒汀叫更哀

左挹黃河右太行  
恆山北鎮鬱相望  
三關舊戍連勾注  
九曲洪流失呂梁  
異代茅茨仍土穴  
故宮禾黍愴汾陽  
神州咫尺嫌山在  
便溯清漳下濁漳

郭云高識冠流厚力企古

遣興和郭子可階韻

太行迤邐黑如磐  
倚劍長歌行路難  
絕域黃河天外落  
故鄉明月客中看  
秋風南國人何處  
夜雨西窗燭未闌  
獨立神州堪把臂  
知君邱壑此中蟠

朱聯沅字正青浙江海鹽人現官學部司務

補授之姓

知辰北都令嗣在京師大學高等學業現方肄業文科大學研精文學專門根柢既深鑽仰彌篤允爲諸生之冠詩亦卓爾不羣受學於陳石遺深有悟入石遺亟稱之

### 春日獨登江亭

覽從郭外冷餘春稍喜禪天入眼新  
芳事漫尋前度夢風光偏稱獨游人  
無端涕淚牽遙睇是處鶯花逐暗塵  
賸有西山知此意斜陽半角掩孤顰

### 游二閭

放棹行行雨乍殘臨流濯髮覺衣單  
少年裘屐成孤往斜日簞琶稱獨彈  
此意定隨秋水遠微塵併入暮雲寒  
嘯魚漫斲商榷酒物外偷懽最是難

### 秋晚二首

一臥驚秋晚西風吹面寒天心兼醒醉人事各艱難按劍  
亦何語開尊儻得懽吾師稽叔夜疏嬾與人看

稍覺前塵妄蹉跎學散仙酒悲因地近花夢入天回萬態  
自終古吾生且少年楊朱非達者前路尙停鞭

感事

抱膝看天亦俊才功名氣盡故堪哀元知澣統千金藥坐  
待嚴冰墮指來

和梁眾異近懷元韻

已罷追權怨跡陳近緣學佛覺詩貧情枯漸畏親芳事骨  
瘦差能稱酒人孤月沈幰猶繫夢癡雲窺鏡祇生塵幽尋  
永忘年時意絕悔青衫悞此身

浮世

浮世甯從得散僊風塵摩眼重茫然情癡漫與天同醉夢  
覺生憎月未圓漸識蠹魚非俊物坐聞鶯語惜芳年平生  
未了心頭事誰遣銷湛到酒邊

送夏雲孫歸杭州

醉倚危樓瞰鳳城白雲南去月孤橫春人春酒都無賴易  
水蕭蕭君且行

青帝無言白日長輪君歸臥水雲鄉吾今欲作西湖夢立  
馬吳山看夕陽

重陽夜作

百年人共秋光老九日詩催客興長黃鞵疏棠自倩麗素  
爭濁酒相徜徉朱樓倒影月在水哀雁不鳴天有霜誰與  
良宵伴洪醉天隨子陸漆園莊

寄懷搢卿五兄

海雲薊樹兩蕭森別緒迢迢夢裏尋  
苦憶謝池春草句小屏紅燭獨沈吟

寓書推學不辭勞衍石風流未寂寥  
一語期君珍重看蒼生顏色久蕭條

白雲蒼狗尋常幻燕筑秦箏不可聞  
片石寒陵獨誰語閉門風雪一思君

答東癡

日莫孤行覺路延閒吟破睡稍安便  
愁湛酒海空添劫夢罨花龕不障禪  
芳事故隨年事老春痕底勝月痕圓  
豪崑日有微塵積一歎吾生井底天

黃 濬字秋岳號哲維福建侯官人宣統己酉 奏獎

舉人現官郵傳部小京官

才質穎異學力淵濇詩亦卓然成家與朱孝廉聯沅

梁孝廉鴻志同爲京師文科大學之秀今朱梁二君均供職郎曹未能卒業惟秋岳勤學不倦

十月十八日大雪中放歌用滄趣樓韻

衣棱衾鐵夢不續狂雪壓屋吾已諳劇憐天地不知夜故  
放林表陰雲曇樞衣挾卷出門望官齋氣象殊潭潭六街  
一色變輝甯恍見明月分二參景山亭閣屹尺咫高擁雲  
葉嵌層巖舉頭遍視眩銀海北風冽骨顏皆醃巡簷哦句  
數冰筇瘦日西匿宮鐘餽朔方習雪了不詫穹窒伏處如  
逃鶴遙知江亭盛車馬攜榼何只人兩三衙官命觴御狐  
白窮牖蓄糗無盈擔天心縱說惠農畝忍使凍餒增襁褓  
忽思丙午歲旣宴遣病吾頗聽何戡夜歸瑟縮犯風雪車

聲燈影堪追談。鼙鼓彈指今二十。長牘短髮披氎毼。歌臺  
豪興已消歇。唯有詩味猶深醺。食貧幸竊大官米。九載卜  
宅居宣南。瓊樓玉宇未敢羨。但願侍飲葡萄甘。

鐵扇子歌

并序

姜軍門玉順多忠勇公部將也。驍健絕倫。戰功最  
多。忠勇篤愛之。嘗有愬軍門於公者。公太息曰。吾  
鞭稍所指。姜玉順能爲我下之。是健兒安能繩尺  
拘也。公旣以擊叛回藍大順中礮。薨於盤屋軍門  
益落拓不偶。甲申戰事起。軍門渡臺以策干大帥。  
不能用。居常鬱鬱。每客坐酒闌。輒說忠勇西征戰  
事。泣數行下。然軍門短髮蕭騷。無復當年勝概矣。  
軍門手持摺疊扇。以鐵爲脅。因作歌紀之。

海風夜嘯臺江水赤嵌城頭甲光紫黃驄衰瘠鼓鞳哀慷  
慨悲歌鐵扇子須髯蝟磔氣參雲吐語嵯峨隔座聞橫草  
功名心未死逢人爲話多將軍咸豐初年寇起粵蛇豕縱  
橫恣奔突南髮北捻相爭掎殺氣蕭條接回鶻胡公勝算  
扼武昌力據重鎮防披猖誰欺健將曰多鮑多公騎戰尤  
擅長將軍天縱號神勇百戰威名著關隴材官幕左精且  
英燕頤虎頭皆將種初從太湖收潛山陣雲直壓集賢關  
大呼陷壁一辟萬鐵騎騰蹴輪朱殷其餘諸戰亦少偶生  
縛名王常八九羽書日夕下江淮先聲偃走四眼狗江淮  
孽寇非么麼將軍談笑刀納韡追鋒麀陣盡肉薄血戰猶  
憶挂車河余時銜枚馬前走感激公恩翼左右麾城斬邑  
敢辭勞金卬期當懸後肘中天明月刁斗寒起坐胡牀數



戰瘢南八男兒終不負可憐流俗枉譏姍秦川威築吹成  
血孤軍慘淡兵如雪整屋城邊白日昏橫飛鐵雨頭顱裂  
名城雖墮悲難論裹尸馬革知天恩從戎結髮愛兵士  
三軍雨泣招英魂將軍身歿烽煙息射堂賓客歸南北諸  
將乘時建纛牙當年樊噲誰能識自從棄置常歎嗟撫髀  
歸去聽鼓笳興來獨醉市橋酒日暮學種故侯瓜比聞南  
藩虜氛惡扁舟渡海雄心作上書大府僅報聞瘴煙黯黯  
愁蕭索昨夜朦朧蔽海東鯤身兵火連山紅據鞍盤礴自  
咄咄大旂落日來悲風卻向廣筵淚霑臆摩挲鐵扇無顏  
色祁連高冢望西州九原毅魄應相憶我聞斯語心暗驚  
時危頗牧翻歸耕君不見新亭舉目風景異猶說天河洗  
甲兵

呂學正字養吾湖北武昌人官江蘇候補知府有樊山

集

潤生同年承儼  
之子穎慧工詩

獨居用涂主簿感懷原韻

寓廬鎮日不開門誰道春來氣候溫  
山院雨聲悲破塊故園噩夢最淒魂  
三山朱草添新淚一樹梨花憶舊村  
帘外夕陽黯無色旅人惆悵對誰論

秋風四律錄三

野闊天高猿嘯哀丹楓一色醉樓臺  
三生杜牧原多感前度劉郎今又來  
白下孤舟尙飄泊遼陽笳鼓逐塵埃  
銅駝露澀征鴻泣楊柳無情鬱不開

悲國事也

匏瓜久繫又經秋青眼難逢價莫酬  
羸馬敝車趨蔣阜白雲蒼狗弔遐陬  
天涯淪落誰知己海上浮沈有舊游  
雨雨

風風無賴甚青衫輕曳泣江州

感身世也

一自思歸不得歸愁心終日共雲飛俯臨江水秋方肅南  
望家山笋正肥平地干灘真險阻楚天萬嶺總崔巍一官  
流落金陵道獨酌新亭悔昨非

思故鄉也

馬雋卿中翰自籍赴都道過白門作詩送之

白門忽報故人來長夜追陪笑口開建業河山添舊恨帝  
京桃李荷新栽上書我有長沙策論世誰如內翰才執手  
徬徨無限思秋風送客上燕臺

寄嚴芟雲茂才清河

當年沽酒淮陰市

家君宰山陽時嚴子曾入幕中

楓葉紛紛夾岸紅臺下

稻花成夢裏橋頭刀劍識情中三山寄迹生鄉思八月乘  
槎趁順風贈我郵筒臨檻讀天涯留滯與君同

袁克文字豹岑號抱存河南項城人蔭生現官法部主事有抱存詩鈔

三月三日飲養壽園

新柳摻塵祛臨流待祓除賞心春事乍命酒杏花初還向蓬蒿徑閒開水竹居弄舟憑浪轉覓句接歡餘

家大人示遊園詩命次韻一首

大好安陽負郭園閒庭未埽任花蕃會成眞率招吟侶臺上逍遙憶舊痕四壁圖書萬竿竹千山風雨一家村悠然樂賦淵明句人境差無車馬喧

郊行

逐寒料峭風侵骨堆岸晶瑩雪染天指點長途煙霧裏幽人慘淡駐征鞭

東張仲仁費仲深蘇州次閱黃山韻

風光過眼獨傷秋，寥落河山感舊遊。  
明月煙波鎖洄水，故人魂夢寄吳州。  
掩歡緒向雲中結，遯俗心從天外求。  
萬里蒼蒼一回首，夕陽盡處渺鳬鷗。

鸚鵡行

鸚鵡高飛不再回，振翼拂羽凌雲霧。  
南來曾過吳江水，見棄還向隴山住。  
翠衿綠水天然奇，簾櫳何計綰別離。  
琵琶已非鸚鵡去，夜來空說入夢時。

左白玉字小蓮江蘇陽湖人常熟言大金瓶錄之室也

丞輔之孫女父名晨同治五年旌表

係長蘆批驗所大使割臂于歸後爲有餐霞樓詩軼稿

翁姑病割臂

題黃太孺人芝蘭松竹圖

惟竹有筠松有心風饕雪虐常青青閨閣徽音嗣鍾郝丹  
青妙筆圖儀形妙筆全將凡豔捐不栽桃李樹芝蘭芝蘭  
濯漚墨井水文學家聲縣不已披圖省識舊時容共慕歐  
陽賢母風在昔鸞絃易彈歇貞心堅矢柏舟節忍痛含悲  
幾廿年病瘼時繞藥爐煙課兒畫荻書聲好燈前時誦瀧  
函表竹有筠母德比其真松有心母德比其純芝蘭玉樹  
庭階秀高堂常蔭春暉春

題湯雨生太夫人斷釵吟二首

蓼莪句裏恨偏長  
釵斷眞如斷寸腸  
豈獨芳徽垂不朽  
冰心可與日爭光

茹荼飲蘖歷艱辛  
閩海滇雲恨未伸  
莫道春暉無可報  
花釵九樹奉慈親

李塉堂侍郎督學江蘇卒於位侍妾王氏自縊以殉  
大江南北紀事徵題

丈夫捐軀能有幾  
臨難猶思苟免耳  
天生義烈在蛾眉  
一死從容報知己  
蓉江之水清且長  
文宗玉尺來評量  
添香紅袖侍兩側  
中有執拂琅琊王  
琅琊生小壓羅綺  
班誡曹箴通義理  
美人之面烈士心  
夙秉堅貞世莫比  
自古榮華難永保  
長庚召赴蓬萊島  
人言身去不相隨  
死不相隨心不表  
君不見石家金谷梁氏樓  
花飛玉碎名常留  
正氣從

來天賦與千秋心迹堪相伴一死靡他從此矢倉皇掩袂  
呼天只重如山岳輕鴻毛生同生兮死同死烏啼月落起  
徬徨白練光飛玳瑁梁練光宛轉如飛雪分明皎潔妾心  
腸蝘蝓領縮鴛鴦結磨笄石化菟宏血一笑相逢在夜臺  
人間暫作須臾別朝來舉室盡驚惶燕子樓頭一夜霜霜  
寒纔見松筠操星小偏爭日月光光凝眸子枯如井環佩  
歸來蟾魄冷大吏飛章達紫宸禮宗彤管標紅粉滇南江  
左姓名馨好撰瑯琊節烈銘柳枝桃葉無顏色從此春風  
重女貞

舟中卽景

桂棹搖空自往還扁舟直接彩雲間一枝畫筆從何著秋  
水江潭雲外山



寫悶二首錄一

渺渺余懷寄玉壺  
秋風料峭客心孤  
飛鴻自有凌霜翮  
不羨畫屏金鷓鴣

秋夜

水精簾卷月華明  
八尺龍鬚錦褥更  
秋雨漸將煩暑滌  
新涼又怯夜寒生  
案頭列史焚香誦  
病裏吟詩倚枕成  
自是清商變時節  
每從棄扇獨關情

落花

飄茵落溷總傷情  
開到酴醿了却春  
似玉輕拋寧論價  
如珠投暗不沾塵  
濃陰結翠紅飛雨  
高柳吹綿雪點蘋  
莫爲榮枯增悵惘  
瑤臺好去證前因

嚴 釗字也秋浙江桐鄉人有返梅魂香館詩稿

海蘭馬蘭

香之室蘭香有拜竹庵詩稿  
名振元隱於下吏夫婦工詩

題稚薌七妹孝女坊

松柏何矯矯女貞亦蒼蒼乾坤之正氣所鍾無陰陽我家  
有從妹秉性殊溫良所嗟幼失怙從兄官鬼方無端寇難  
作中夜報城亡阿兄能授命巷戰被賊戕妹隨母與嫂共  
殉池中央水淺不得死賊去奔踉蹌辛苦難具說間闕歸  
故鄉身如待賈玉韞櫝而善藏萱花忽憔悴日暮憂難忘  
禱天請身代涕泣心彷徨遺體本父母割捨分所當至性  
格天心慈躬壽而康雖死亦何憾孝女名其揚愛我若同  
產賃廡經三霜剗股人不知獨我伺其旁君死豈沽名借  
爲家乘光殉 國事不遂代親願竟償兄忠與妹孝兩事

同流芳有兄介朝貴乞 恩騰綠章 聖主奉 兩宮方  
慶孝治昌褒榮及處子入祠還建坊我詩雖不文此事洵  
非常當與曹娥碑千載相頡頏

送春

青帝憑誰管送迎一番風雨一番晴六朝金粉悲陳迹三  
月煙花阻去程春水綠波遊子夢天涯芳草美人情依依  
剩有梁間燕皎潔紅絲映月明

別恨年年強自持忽驚青鬢欲成絲每因遲暮生多感深  
悔蹉跎過後知管領羣芳曾作主徘徊晚景更憐誰行踪  
來去從天上暫向塵寰住一時

曾 懿字伯淵一字期秋四川華陽人袁幼安大令之

室珏生太史勵準之母有古歡室詩詞集屈文士懋

淵夫人蜀之名媛門有通德兄弟姊妹皆以詩鳴情

深語摯真浣花之嗣音也 易觀察順鼎用珏生太

史韻題二律有神仙福分閨中備姊妹才名海內

知及桃蹊中年龍過八湘棲早日鳳成雙之句

題吳侍御鴻恩驄馬導輿圖

驪歌三唱別燕京親奉慈輿按轡行萬里歸程班馬健一

鞭斜日錦衣榮雲飛遠岫風無主樹捲秋濤月有聲回首

帝城凝望處大椿深蔭玉堂明

文章勁節獨高標闕下陳書動九霄諫草葱茸離翰苑慈

雲鰲韞度軒輶函關風雪詩魂壯巫峽波濤歸夢遙故國

山林春正永斑衣戲彩樂陶陶

閨中憶別呈外子都中

錦江春色好花擁玉堂深風雨滿天地離懷感古今三更  
遊子夢萬里老親心苦憶牽衣別啼痕尙在襟

海南芳信早梅柳著新年丹橘初頒賜朱櫻已薦鮮身安  
心不泰愁重酒難填夢到花潭上春風響杜鵑

枕函昨夜淚不見故鄉人啼夢兒驚喚家書雁寄頻蠻音  
山鳥語吳味海魚新三月已揮扇炎蒸不算春

夫壻遊京洛鵬程萬里賒黃門控天馬御苑喜簪花錦織  
迴文豔詩題醉墨斜願君崇令德不敢惜年華

家貧爲客早忍淚別高堂患難同心共詩書夙願償盤餐  
野薺脆瓠醺醺泉香菽水何時供春暉日正長

英霍患蛟外子賑饑詩以奉答

翩翩者鵬振翼雲霄之子于征自彼荒郊朝登山麓夕宿

江皋燦星被野零露盈條陰霾黯晦曜靈不驕洪流浩淼  
平陸騰蛟彼黍旣隕彼禾云凋哀鴻遍野饑哺嗷嗷蕭蕭  
君子誠篤可欽自夏徂秋淹留至今嗟我懷人永嘯長吟  
瞻望靡路離居同心橫琴不彈旨酒停樽游魚潛淵倦鳥  
歸林勉志修業以隆德音

季碩五妹以詩見示題其卷後

人生處世苦局促惟有新詩可做俗搖筆長吟天地寬放  
懷何必爭榮辱吾家季妹詩最豪百篇揮灑才彌速哀豔  
應教謝鮑驚蒼涼直使韓蘇伏長途千里慙風塵牢愁欲  
效窮途哭閭慙因知世路艱翠袖單寒頻倚竹遨遊湖海  
衣化緇陶鑄江山字凝綠松壓嚴霜挺秀姿梅含古雪得  
奇馥清烈如聞越石笳激昂疑聽漸離筑掃除俗豔與凡

音開卷琳琅先豁目憶昔故鄉聚首時推敲共翦西窗燭  
裘葛回環踰十年嗟囊早已盈千束自慚隨宦走皖江塵  
泥羈縻總庸碌披卷真同下里音揮毫難奏陽春曲今君  
征棹赴姑蘇一路溪山詩料足酒酣落筆凌滄浪別緒匆  
匆夢魂逐宛轉相思何處尋臨風遙指君山麓

中秋對月感懷

迷離星斗接遙天玉臂生寒倍惘然捲幔惟聞風鐸響倚  
闌孤負月輪圓桂含清露香難把藕斷絲柔情易牽悄向  
中庭見詩句嫦娥應笑我無眠

汪韻梅字雪芬浙江錢塘人常熟言應千大令家駒之  
室有梅花館詩集

弔毘陵丁女靜蘭 二首

全家白骨葬清池冷客名園蔓草滋苦雨酸風傷獨活黃  
泉碧落寄相思可憐孤雁驚魂際正是慈烏痼疾時暗割  
雪膚香和藥堂前溫清强支持

絕命詞工志已成堅貞純孝兩分明春燈遙夜思鄉淚冷  
月空梁殉母情節著千秋名不死恩旌九陞事何榮寒檠  
讀罷傷心句清氣如蘭一縷生

送浣雲入都用漁洋秋柳韻

陽關一曲黯離魂又送征輶返里門疏柳幾行牽別恨秋  
花數點認唳痕行行殘月曉風際渺渺寒鴉流水村他日



蘭閨重話舊相思滋味細評論

紅葉蕭蕭染晚霜蘆花如雪撲寒塘傷離恨抱交通賦惜  
別詞添道韞箱三載交情成至契幾生因果證空王客中  
送客無聊甚夢繞京華畫錦坊

柔姿弱態不勝衣明月前身是也非獨擅才華天所賦雙  
修福慧世應稀綺琴三弄征鴻淚紈扇一團蝴蝶飛溢水  
聰山同感慨素心人遠賞音違

姊妹情深愛復憐墜歡疑雨又疑煙手分知己輕離別目  
極長途望邈綿美子娛親當永日嗟予遠嫁動經年寄言  
嶺上梅開際好贈橫枝古驛邊

寄外遼西差次

秋水駕輕舸馳驅王事勞早涼新雨後可有贈綈袍

病枕不成寐橫空怕雁唳朦朧纔合眼恍惚到遼西

兩女知仲媳能詩爭相倡和喜示仲媳

威姑詩筆名江左自愧無能步後塵喜爾隨肩互酬唱吟  
壇薪火有傳人

題先妣鄒太夫人味蔗軒遺集

國風采歌謠不因巾幗棄閨閣多賢媛豈僅酒食議吾母  
幼淑慎不爲兒嬉戲繡餘讀詩書四德悉純粹隨宦遊齊  
東孝友兩無愧作殯于先公敬戒主中饋吾祖瘁文衡節  
冷滇閩使家門盛科名同懷奮鵬翅威姑年正高婦職益  
周至勉力奉晨昏典衣供藥餌吾父捷賢書禮闈傷十躋  
臯比隆趙州名動公卿屣桃李溥春風刀尺撝閨思苜蓿  
盤終虛悲生展禽謚嗟予五雁行撫育皆親累熒熒藐諸

四朝詩史甲集卷七

七

汪雪芬之二

孤慘慘呼天淚河干送櫬歸烽火江鄉悸補屋惟牽蘿長  
安居不易婚嫁得粗完兩荆枝又萎世胄竟凋零津門寓  
嫠穉苦節天所褒乃得造物忌茹荼四十年蔗味痛難遂  
平生真性靈景物自言志愁來付短吟信筆記時事卽此  
一卷詩頗爲精神寄如見嘔心血如見貌顛顛身世厯諸  
艱十只道一二余也恐散佚敬謹爲編次萱蔭北堂摧劬  
勞猶可識書成付阿咸濡翰淚痕漬

寄大兒有章

又看中秋月良宵別思紛茗溪嗟遠嫁梁苑阻歸羣薄宦  
猪肝累長郵馬足分軍諮眞祭酒退食更論文

鄧一瑜字慧珏江蘇金匱人錢塘諸可寶之室有情足

居詩集及蕉窗詞

壬辰中秋五十述懷呈璞齋夫子兼示六弟

九首錄六

半百年華幾變遷滄桑彈指憶從前  
流離蚤作辭巢燕寥落渾如咽露蟬  
貧佐文簫聊寫韵才非德曜敢稱賢  
人間福慧成虛語偃仰浮生一惘然

草草勞人不自由已教善病況悲秋  
結茅莫遂名山志拱木難忘故隴愁  
拂拭襟懷徒浩浩平章歲月但悠悠  
百年半逐駒馳去貧賤夫妻漸白頭

少小聞詩憶過庭誰從曙後惜孤星  
舊游寥落空浮碧

章句

不署在浮碧山之麓子遺墨叢殘待殺青

方爲先嚴慈謀刻遺集

漫

許班昭能續史幾曾伏女解傳經窮途弱弟愁相對話到

四朝詩史甲集卷七

八 劉慧珏

傷心不忍聽

浪傳詠絮多新句夢訝生花筆已枯伊昔吟梅戀東閣於

今對月憶西湖孤山有分安吾骨大地何時息此軀余有梅癖

兼愛西湖欲於孤山之麓卜一佳城尙無閒地可塋生曠樹有連枝鳥同命齊眉私願

乞黃姑

半生微尙託琴書有子徒勞說鳳雛尙事嬉游荒簡畢可  
能志量應桑弧門庭詎望施行馬車服還須愧令狐出處  
爾曹能努力老子瓢飲亦堪娛

古稀中壽尋常事來去心驚日孔長自覺形容非故態可  
憐時世又新妝繙書強作治憂計采藥難求駐景方有限  
年華宜自惜虛拋心力爲誰忙

李 珍字剛儒江蘇上元人陳大令之室有碧筠

山館詩草

大令爲浙江海甯右廨主事授教子賢明而多才宣統庚戌年逾

吟詠督課諸孫

### 值粵逆亂和外子韻

金風瑟瑟拂深林無限蒼涼暮景森  
一色水天迷曲渚數重嵐靄淨雲陰  
星霜閱歷征人髯歲月遷延壯士心  
無限傷懷嗟此夕那堪斷續聽殘砧

匆匆斗柄又將斜寶匣空餘劍吐華  
濟世無才辜妙略求仙何計覓靈槎  
當年壯志羞彈鋏是處商音恐暮笳  
聊借一枝偕隱遁江城兩度看黃花

煙靄蒼茫映夕暉江天清澈暮雲微  
伶俜傲骨鶴同瘦迢遞鄉心雁共飛  
明月閑樽惟影伴西窗剪燭已心違  
荒涼

四朝詩史甲集卷七

九

李閨儒

滿目征輸急何日騰驤士馬肥

興亡自古勢如棋回首繁華百感悲  
廊廟應憐征戰苦山林空望太平時  
三年羈旅魂飄蕩萬里烽煙雁阻遲  
安得桃源逢舊侶秋風秋雨倍相思

玉關何日唱刀頭楓葉蘆花幾度秋  
楚塞月明誰弄笛巫山猿嘯客增愁  
翱翔空羨凌霄鶴閒逸難隨度水鷗  
煙樹忽驚遊子感西風蕭瑟帝王州

上將何時建凱功一年惆悵又秋風  
蟲聲幽咽悲殘月楓落淒清怨曉風  
四野傷心殘骨白萬方翹首捷旗紅  
勞人萍梗家何在欲向中山作醉翁

嚴頌萱字玫君浙江桐鄉人

過江蘇上元李氏能書畫善彈琴有雅香吟館詩草

讀先君清嘯樓遺集

詩是吾家事

川少陵句

斯編更不同清芬流百世正氣鬱孤忠

傳誦蠻荒外搜尋劫火中窮邊遺愛在墮淚爲羊公

先君於同

治乙丑殉難貴州石阡府任內朝廷卹典既優士民追悼尤切

憶昔靈椿謝儂方襁褓年永懷恩罔極最小女偏憐豈解

傳經訓猶能認斷絃合成忠孝集花萼十分妍

與稚蕓先姑母詩合

川爲忠孝同懷集

孝哲毅皇后輓詞

升遐 帝駕六龍行遂迫

星軒返玉京獨抱湘君捐玦

恨誰明姜后脫簪情承華未建元良位長信難居願養名

但祝女中

堯

舜壽垂簾仍復御昇平



惠陵杯上已乾無莫問忠貞晉大夫神器祇應兄及

弟徽音那得婦承姑鸞聲縹緲思黃竹鳳采銷沈泣

碧梧翹首愴呼天下母千秋明月一輪孤

滬江旅夜思慈親於吳門口占二律

殘月墮窗明思親夢不成心馳來去路指屈短長更避劫

全家寄時吾鄉客民起承歡兩地爭頌萱與大姊居滬而

此爭迎天涯秋意滿白髮幾絲生

世緣都悟徹只戀北堂慈性僻惟親諒恩偏任女癡窮愁

詩卷訴淨業佛燈知明日家書至潘輿返有期

和也秋姑母詠蓮原韻

潮洞秋水惜分襟幾度淩波緩步尋風定香隨君子意江

深冷透美人心自憐萬竅多何事誰說千年豔到今不向

東風訴幽怨飽餐涼露耐秋深

疊步周積甫舅父自粵東官舍寄示元韻

東山未許謝公眠一曲珠江萬里天遊宦老催雙鬢雪思

鄉夢繞六橋煙笳鳴塞月遙聲遞

謂鄰境越南事

詩詠官梅舊稿

編回首長安諸伴侶忍寒高處笑神仙

我學鳬雛傍母眠不將身世問蒼天無聊漸解書燈味有  
恨都消佛鼎煙晝短繡因摹帖廢秋深籬爲護花編若云  
似舅慚非分但葵心香拜謫仙

甲申仲夏粵督張孝達制軍過滬招少和弟隨入粵  
署讀書因成五排二十二韻聊當話別

蓬矢生初射奇男志在斯能文騰譽早戀母出遊遲菽水  
承歡日桃源避劫時

家鄉近爲客民所擾因遷居滬上

家貧間絃誦年少

負心期一自高軒過千間廣厦支名公眞愛士父執半兼

師先大人曾與制軍昆玉聯譜鞭許龍門執槎從蜃海隨四方新閱歷

兩世舊恩知先大人曾襄制軍封翁春潭觀察戎幕儂願爲遊子身偏作女

兒折磨因自悟吟誦不嫌癡弱息惟親恃同懷忍爾離昔

年雙角總我輩一肩差戲綵爭先後聯吟雜笑嬉鷓鴣方

擇木姊妹恰交枝時蘭姊隨宦申江話別圓燈火臨行愴酒卮秋

風江上棹春草夢中詩馨潔蘭猶若平安竹慰之蘇閨文

織錦弟婦亦在滬上謝舅髻添絲三舅父从宦粵東越秀山程遠吳淞水

驛歧詩才須攬勝文境要探奇變化鯢難測騰驤馬不羈

春暉堂上永努力報萱慈

許禧身字仲諤浙江錢塘人陳筱石尚書夔龍之繼室

有亭秋館詩鈔

尚書序云庚子之變余奉旨留守每有商榷無不洞中機宜事定後偶

有暇晷輒挑燈煮茗廣和爲樂然亦不多作迨撫大梁吾女之喪無可排遣余有詩五十首仲諤亦成哀詩三十六首不忍卒讀嗣後西泠感逝橫橋望遠情所難遣一託諸詩今夏隨任武昌偶檢行篋已得存詩四百餘首是皆芳情之醞釀血淚之謳吟也

戊子冬日口占

膝下依依不解愁卅年荏苒任杭州無端一曲驪歌起拋却閨中舊綺樓

曉日微烘繡閣前丹青一卷獨流連金爐裊裊香煙起嬌婢殷勤捧硯田

搜索枯腸嬾詠吟繡窗閒暇度金針夕陽無語將西下何處寒風起暮砧

病體新瘳倦整鈿輕霏玉屑小堦前愁中怕弄梅花箋一曲清歌半不全

小病纏綿不耐風重幃深處一燈紅羅衾倦倚偏無夢臘鼓頻催隔院東

乙巳冬夢中卽事

十二年來不認親

次女故已十二年  
昨宵與姊同來

夢中隨姊定昏晨青

絲低挽雙鬟結仙髻雲裳恰稱身

夢兩女皆披  
鶴氅梳前髻

廿九日兒生辰在橫橋誦經三日

遠隔仙凡兩地牽光陰流水箭離弦今年霜冷西湖月去歲靈歸兜率天

兒生辰日供燭結花大如桃李

雙結瓊枝紅玉華紗籠錦幔不須遮攜來仙島蒸雲蕊幻

作華堂慰母花瑞氣團團光閃彩輕煙裊裊色生霞長空  
鶴唳香風過今日重停七寶車

仲春草蘭又得並蒂花

淡泊胸懷名士襟結來清腕更同心香生雲閣雙肩鞞韻  
繞蕉窗雨意沈淮浦澹園曾發秀金闕春院又成陰花仙  
何故偏多戲費我推敲獨自吟

和小石主人蘇臺留別韻

欲整歸裝又戀吳滿園落葉漸凋孤倚欄遙玩依花蝶款  
枕愁聽報曉烏兩岸月迎千樹柳片帆風送隔江蒲更欣  
離得爭名地暫作偷閒菊隱圖

小作勾留且住吳

擬租屋暫住蘇郡

故園咫尺未爲孤南歸欣羨

投林鳥北去愁瞻蔽日烏入載宦情縈笠屐廿年鄉夢寄

菰蒲斜暉返照疏林境隱約雲山入畫圖

相邀同玩浙江潮落葉催人暮雨瀟雁入長空鳴遠塞舟  
行淺水渡虹橋依稀青嶂朝聞磬隱約紅閨夜弄簫再譜  
驪歌心自感一腔愁緒繫柔條

莽莽狼烽隱九州風雲臺閣苦旁求願君權作歸巢燕弗  
羨飛鳴出水鷗琴鶴一肩鄉路熟煙螺萬疊客心愁年來

聚散渾無定催動行旌又晚秋

前歲回南送女樞安葬時正仲秋今又至其時

荻花楓葉早經霜再聽鐘聲出景陽野綠獨行窺雁陣輓

紅重踏聽鶯簧一航穩渡朝

金闕萬里長征返故鄉柳

色樓頭增別意夕陽鞭影兩匆忙

嚴杏徵字蘭初浙江桐鄉人海寧馬鶴南別駕敏之室

有品簫樓詩鈔

鳧薌觀察震之從妹

哭少蘊從嫂馬夫人絕句十章並慰鳧薌從兄

歷盡滄桑六十年碧桃初熟便登仙

六月十三日爲君六旬初度而廿六日卽

仙逝傷心尺素空相約已絕今生一面緣

播岳新詞寫悼亡阿兄容易鬢成霜燕臺昨夜秋風動吹

落梧桐旅館涼

鳧薌從兄于役燕北

片石輕舟出鬱林荆釵眞有助廉心

君隨宦粵西歸無餘囊

展屢炊

盡琴猶在可奈人亡響亦沈

鄰前珠玉競蜚聲

諸姪一列膠庠一膺拔萃一登賢書

更喜深閨學術精

諸女

姪入各學校

天意巧償賢母志臨危猶見子成名

先二日選拔揭

曉



招魂賦罷有餘思最感當年哭母時昔吾母周太夫人訴去世君悲痛欲絕  
到白頭親見事半生恩怨更誰知

紅燭當時照洞房小姑幾輩尙扶牀祇憐絕妙羹湯手泉

下君姑那得嘗君于歸時三叔母錢太夫人去世已七年矣

三世朱陳互結婚也曾客裏共壺殮年來漸入桑榆景都  
是含飴喜弄孫

扶風經室久生塵夢裏池塘草不春苦爲外家存弱息義  
姑去後傍何人君外家零落弟遺一女撫養如已出

講學宣文隔絳紗不將象服炫榮華多才夫婿佳兒女便  
作神仙也憶家

哀謠動處海雲封阿母鸞幃竟躡蹤今昔吾家多恨事夜

潮嗚咽到吳松昔三叔母暨吾母皆歿於滬上今君之逝躡其蹤矣

繆寶娟字珊如江蘇常熟人李搏霄觀察振鵬之室有

吟秋閣詩草

繆汝生太守鍾潞邵生通守鍾渭之女兄邵生二子詩姊弟時相唱和

題漢未央瓦硯歌

紫雲一片土花結寒光隱隱凝霜雪流落人間三千年不  
隨碑碣同磨滅古來宮闕盛炎劉未央宮與阿房侔阿房  
一炬成焦土漢家片瓦猶千秋片瓦功能奪真宰蛟龍泣  
罷嘯痕在質堅不爲歲月磨色古豈厯風霜改昌溪吳氏  
寶用之滄桑變幻不可知洪子嗜古有奇癖得從市上光  
陸離盛以寶盒盤蛟螭奇氣掩映珊瑚枝岱翁銘字工刻  
鏤鄧侯古篆形模舊精金可鑠石可灰此物永並鼎鐘壽  
再疊前韻寄呈曉峯侍御

壯懷磊落比秋高鷹隼凌霜健羽毛設教文翁化夷俗行

吟屈子賦湘臯縱談時事頻烹茗快讀佳章勝飲醪漆室  
憂深同魯女撫今懷古首徒搔

塞外懷古

身陷匈奴歲月長節毛落盡鬢如霜歸來漫道朱顏改留  
得丹心報漢皇

轅門日落鼓聲催匹馬曾經百戰來五字河梁千古歎更  
無人問李陵臺

感事

戊戌秋

秋老邊城萬木摧北風吹雁又南回屢聞魏絳和戎去無  
復虞卿說趙來白璧徒傷齎敵國萬金幾見築高臺失雲  
請劍誠何補輔治還須社稷才

蕭道管字道安福建侯官人陳石遺學部功之室有蕭

閒堂遺詩一卷

不寐聯句

涼宵同不寐無計阻生愁  
淡淡玉鉤月盈盈銀漢流  
石挑燈牽絮語掩卷起清謳  
任汝蹉跎去他年始白頭

道

題澄瀾閣下柳

澄瀾高閣畔獨有柳條新  
共此依依立青春二十人

宿雨初止曉坐聯句

止止多明室幽居趣便長  
石柳偏增雨重花矮避風狂  
啜茗便閒讀鉤簾嬾薄粧

道

曉寒君已賦請寫衍波光

石

龍華鎮看桃花

龍華桃花十五里桃花紅白玫瑰紫  
遊人看花兼看人馬

如遊龍車如水冒枝裙袂香春風映肉花光一何綺遊人  
只恐斜陽暮照影爭憐綠波美長安水邊不可見湖西花  
鈿只如此明朝處處賣花聲苦報春光疾如駛

春陰 三首

斜桷初停雨脚懸閑階青徧沈郎錢何人解寫餘寒帖珍  
重春衣卸到綿

一架冬藤倒復扶晚春花塢夕陽無却寒簾外天如墨合  
寫蠻鳩筍竹圖

春泥滑滑徧天涯謝客閒愁手又又便是無憂好門館欄  
干長日數楊花

張寶慧字夢蘭四川宜賓人張鎔彥之女有芋香亭集

文丞相琴歌

絲桐七尺丞相琴不是尋常山水音當時丞相一再鼓波  
濤瀕洞蛟龍吟丞相中年罷官去聲妓滿前紛若霧早知  
鼎沸會有時豈料陸沈及身遇猖狂敵騎徧臨安散盡家  
財事本難勤王費盡孤臣力報國心餘一寸丹此琴亂後  
藏何所六百年來欣尙覩崖山往事琴能言切切悲鳴雜  
風雨

秦良玉錦袍

扶輿間氣鍾釵裙弓刀隊裏女將軍公瑾小喬嫌不武李  
波小妹愧無文播州戰鼓鼙鼙急試手從軍木蘭匹金筑  
頻清七寨塵遼河獨肅三軍律內訌外侮何縱橫感激勤

四朝詩史甲集卷七

十七

王子弟兵燹戟一門人共羨新詩四首帝親擊劉羅小鼠  
紛剽掠敢向蜀中恣威虐一笑頻擧大將旗渠魁親手軍  
前縛太息撫軍邵與陳奇謀不用國無人滄桑已厯人間  
世兵火猶留劫後身錦袍一襲今猶在想像著來頻奏凱  
暗澹長餘戰血紅九蟒宛延晃光彩憑弔山河石柱中當  
時盧史尙英風紛紛笑殺諸降將不及秦家巾幗雄

月

誰把浮雲掃姮娥儼在茲征人望鄉處少婦倚樓時圓缺  
終年易悲歡逐境移裴回不忍去坐久露華滋

丁毓琬字勲如江都興人官仲淵觀察敦源之室有  
靜馥閣詩草

望雪遲雨兒不至

雪花歷亂寂無聲拂曉雲開又放晴料得遠山添畫稿定  
知大野足春耕風塵驛路征衫薄琴劍歸裝馬背輕官閣  
臘梅動詩興圍爐待爾與同評

題繆夫人吟秋閣詩草

騷壇讓主晉秦盟惆悵天涯未識荆仁孝慈真宏女德畫  
詩書更見才情眼前宜廣無雙譜身後猶爭不朽名儻值  
乾嘉全盛日隨園弟子共蜚聲

卽景

藥爐茶竈慣生涯隱几時聞人語譁虛白室兼明妙境半



窗斜月半簾花

雨過

雨過生機暢，憑欄翠入眸。  
菜肥應坼甲，花懶尙垂頭。  
蝶翅飛難起，鳩呼聽不休。  
聲聲殘溜在，銀浦看雲流。

吳芝瑛字紫英安徽桐城人無錫廉惠卿部郎泉之室

華甫京卿汝綸之猶女工  
詩文善書八法冠絕一時

楞嚴書竟敬題二首奉呈夫子並海內外諸長者居士於時南湖新月正流照寫經室窗戶也

寫藏惶悚真心住啟請殷勤道力全無漏願修三妙學空  
華盡縛一狂緣五重煩惱實驚怖百億浮漚決弃捐失笑  
旅亭指明月更從是處見林泉

十方塵象法輪轉八部天龍大眾俱擁護沈冥生覺海思  
維窮露獲明珠翹誠淚雨宣神咒頂禮迷雲霽聖湖發猛  
同舒金色臂楞嚴成就首浮圖

附節錄紫英女士寫成楞嚴五卷自跋中語 南湖新  
居成夫子流連湖上旬日而返爲芝瑛言曰吾昨登北

高峰俯瞰諸天凡想都盡恨其間殿宇高曠四周限隔  
眼界盡蔽物華於是蒼茫四顧發一大願須於其間造  
十三級浮圖由下而上級刻大佛頂首楞嚴經一卷十  
級經盡於十一級作井字室中具几案牀榻茗荈楮墨  
春秋佳日遊人憩焉更上則刻造塔因緣及出財者名  
姓事略極頂乃仿龍門造像撫吾兩人及出財諸長者  
居士父母小影卽塔下闢石屋鍵本經墨蹟其中後世  
將必有寶貴之者汝能爲我寫一通將徧歷海內募資  
成塔蓋聖湖諸勝曠絕無有逾北高峰者而年來晦息  
縈吾心目亦無有過於首楞嚴經也一笑而罷

呂清揚字眉生安徽旌德人有遊東小三

女學兼工詞翰世稱呂氏三姊妹張氏學鶴齡延

女士至奉天省城充女師範學堂總教習勅於訓

多所成就遼東小章即客奉時所作各篇均雅潔

五古尤有初唐氣息思親憂國耿耿不寐詠歌以

見志抱空谷之幽馨雜詩詠蘭云枳棘與梧並成使

被芬芳臭味期同化無慙王者香女士蓋帶以自况

也女國民歌六章為時傳誦北方女學反咸被之

管絃然女士詩筆靜峭力追古人此歌僅以開通女

界振起閨風非其經意之作也

其經意之作也

# 海上

霞明海天晚絳霧何冥冥激濫天際波一碧蕩空明岸靜

絕音響惟聞齧浪聲此時弄扁舟悠然生遠情散我連卷

髮天風吹泠泠淡我胸中慮鷗鷺不相驚海昏怒浪起一

葉東西傾詎甘波濤險良勝大陸平波濤有時靜大陸多

崎嶇容與望中流一笑謝塵音雙槳鼓前進豈識雲霧深

擬古

辛苦頻幽蘭贈君紉秋佩中情自芳潔豈徒託歡愛  
道遠遺芳馨歸來淚如雨豈爲美人憐珍重寸情苦  
憔悴江干道涕淚盈懷抱枳棘滿春風欲采無芳草  
敗芷咽秋煙荒蘭鬱幽渚一自湘靈遙年年怨風雨

贈舒彬儒

鴻儀

先生卽步揖唐原韻

憂國常教涕似瀾靜觀時局判悲歡肯傾白墮權埋醉只  
爲蒼生繫此官紫雁龍沙秋色遠黃花驛路朔風寒知君  
一笑揚鞭去惟有新詩壓錦鞍

送崑秀四妹由天津南歸

憶昔慘痛摧靈椿有母四雛孤無親伯氏將嫁叔季幼余  
雖及笄猶天真吾親多女亦自足慰情勝無娛昏晨負郭

有田二百頃倉廩常豐未爲貧  
熒熒母子影相守亦將樂  
此春復春暖衣足食嫉強族以暴凌  
弱時見瞋覆巢毀卵  
去鄉井相攜痛哭長河濱  
途窮日暮空踟躕朔風誰憐吹  
萬巾慈親有訓勉自立委身女學  
奔風塵負米各走千里  
外生女庶不差鄉鄰而今喜能供  
甘旨不憂食糲衣懸鶉  
長松擎雪轉蒼翠危石懸崖愈嶙峋  
不教老死困閭閻蒼  
蒼始信皇天仁躊躇此日差滿志  
低徊往事猶酸辛燈前  
昨夜接家書爲道高堂白髮新  
函商往復遣子季歸侍庭  
闈老病身自憐出塞三年客執手  
送歸猶未得欲折垂楊  
遠贈君遼東二月無春色應知有  
姊送登程汽車飛去孤  
煙黑今宵有夢渡黃河此心遙去  
隨君側入門未見應先  
呼歡動慈顏喜無極殷勤爲我報  
高堂明歲歸來捧壽觴

輓張筱圃

鶴齡

學使

時奉天學界議欲釀金立紀念碑故二章云然

人嗟梁木壞我爲斯文痛金鐸慘不宣何以詔來眾  
教澤濡何深春風慘桃李會看蠡豐碑峨峨爲公紀  
席珍敢云聘皋比忝茲位詎關鍾期感邦國悲殄瘁  
陽湖返旅櫬不回使君驂詩成楓林黑魂兮哀江南

酬孫師鄭先生

康成久沒世譚經誰復傳乃有儒者徒師古精槩鉛著述  
等身富一室叢簡編歐化自東漸漢學丕變遷茫茫拾墜  
緒國粹賴以延顧孰能肩此嗟哉孫子賢

深閨有一士久作遼天鶴枳棘雖不棲飛羞附鵬鶚世態  
方熙熙余懷殊漠漠薄游遇津沽論道爭糟粕季世麟鳳  
游非祥轉成惡片語持贈君相期保明哲

楊莊字少姬湖南善化人

哲子京卿度之女弟

上海旅舍作

微雨生新涼孟夏如深秋鳴蜩斂夕音熠燿迎風流羣居  
情不孤心迴境自幽宵空起清吹離思方悠悠豈伊川塗  
賈念此躔運道頻年嬰憂瘵憔悴忝嘉猷翩然冀遐征投  
袂涉長流眞契始爾萌外物迫相尤洪川無蘋藻何以別  
沈浮高岑盡芳馨何以別薰蕕微生信有區人理諒難侔  
旣警素絲泣鮮復歧路憂吾生自有涯慷慨惜年徂慕茲  
狙公術慨彼漆室愁先民有遺規道在復何求

渡海作

平生嬰憂患意趣常蕭寥偶有乘桴志遂與江漢遼泛茲  
滄溟闊頓覺天宇高  
清霄靜娟娟洪流駭滔滔偃仰馭長



風浩蕩神襟超信懷宗生願詎有安期招徘徊眷殊庭悅  
恨悲逝濤憑虛俯瀛寰顧盼思鬱陶進德智既薄幽居夙  
匪要仰高常更卑冀長仍自消撫已諒無極慨世復增忉  
述適安可振雰霧孰能昭鷹隼自翼翼鸞鳳徒脩脩倚嘯  
竟奚補恤緯誠空謠理感信無怡慨然寄長臆

華金婉字秀芬湖南長沙人曾重伯太史廣鈞之副室

有秀芬吟稿

陳子言布衣詩云此數詩卽太史所作

庚子落葉詞

原十二首今錄七

甄官一夕淪秦壘疏勒千年出漢泉鳳尾檀槽陪玉輦龍  
香寶珞殉金鈿文鸞去日紅爲淚輕燕仙時紫化煙十月  
帝城飛木葉更於何處聽哀蟬

赤闌迴合翠淪澌帝子精誠化鳥歸重壁招魂傷穆滿漸  
臺持節召貞妃清明寒食年年憶城郭人民事事非寶瑟  
流哀彈別鳳寒魚衰雁盡驚飛

銀牀玉露冷金鋪碧化長虹轉鹿驢姑惡聲聲啼苦竹子  
規夜夜叫蒼梧被家叵耐雲昭訓殉國爭憐李寶符料得  
珮環歸月下滿身星斗泣紅蕖

王母傳籌擁桂旗闔門宣敕肯教遲漢家法度天難問敵  
國文明佛不知十宅少人簪白奈六宮同日策青驪昆明  
池上黏天草只託微波訴菴蔬

簾外曉風吹碧桃未央前殿咽秦簫石華廣袖誰人攬沈  
水奇香定未燒荷露有情同粉淚菱波無賴學纖腰雲袍  
枉繡留仙褶碧海青天任寂寥

姊弟雙飛入望僊鳳幃元白賜恩偏賞花昔昔陪銅輦闕  
草朝朝費玉錢秦苑綠蕪悲夕照梁園春雪憶華年身名  
祇合埋青史何水何山認墓田

嫋嫋靈風起綠萍幽憐斷續掩春星白楊徑斷聞山鳥紅  
藕行疏度冷螢關塞夢魂悲歲月水天愁思接丹青鑾輿  
縱返填橋鵲咫尺黃姑隔畫屏

成

果新法名字寶樹廣東番禺人有小浮山齋詩俗姓陳氏

主飛來長壽二寺席精寫梅花自重其畫不輕投贈嘗有句云畫不詩禪徒畫匠神非詩畫不流暢必也詩兼書畫禪宗風今日誰提明蓋自讚也

擬王摩詰尋隱者不遇

不必知幽處扶筇入碧峰林間纔見寺雲外忽聞鐘野犬有時吠幽人不可逢何當生羽翰天際逐騎龍

匡門謁三大忠祠

已無寸土失江南大厦難支諒已諳靡伯自懷興夏志仲連甯忍帝秦慙腥風碧海蛟龍泣浩氣黃冠鼎鑊甘惆悵靈祠薦蘋藻潮聲猶似戰聲酣

題湯雨生參戎畫梅

杜陵評書誠高論筆所未到氣已吞湯君寫梅證此妙毫

端躍出惟花魂

日南范阮二槎使過訪喜而賦贈

早訝鈴聲爲報傳清風知到玉堂仙  
喜來海國瀛洲客共證中華玉版禪  
鴻爪印留三島雪詩名喧徧十洲天  
萬邦書慶同文日又結山僧翰墨緣

當年離六賦游仙

謂開山祖大汕長老離六堂是其集名

早有清名海外傳

一自先人承法施

大汕祖遊日南國王厚施助修本寺

至今遺渥尙心鐫梯

就罕親皇華使風度如親白樂天香火夙緣倘重續莫因

島遠咨鴻篇

天賦

何處潮源漲橫空瀉不林蕩殘千古夢洗出九天秋銀浪  
此懸掛人間不泛流乾坤旋轉理將問漢張侯

敬 安字寄禪湖南湘潭人有八指頭陀詩集王壬秋爲作序

云寄禪和尚本姓黃以慧業故不由識字自然能文

祝髮示弟 癸酉補作

人間火宅不可住我生不辰淚如雨母死我年方七歲我  
弟當時猶哺乳撫棺尋母哭失聲我父以言相慰撫道母  
已逝猶有父有父自然爲汝怙那堪一旦父亦逝惟弟與  
我共荒宇悠悠悲恨久難伸搔首問天天不語竊思有弟  
繼宗支我學浮屠弟其許豈爲無家乃出家歎息人生如  
寄旅此情告弟弟勿悲我行我法弟繩武

題天台十甲子老僧坐禪處

萬木森寒入翠微飄然鶴髮久忘機溪聲畢竟無今古山  
色何曾有是非澗草自迷遊客屐巖花時落坐禪衣問師

何代天台住手種青松已十圍

贈陳伯嚴

陳侯亦洒落對酒每高歌好客黃金盡論交白髮多雲深  
三楚樹夢繞九江波乘興且行樂浮生能幾何

穆廟諱日讀吳侍御可讀遺疏

二首

鼎湖龍日去歲莫獨愁時已失中興主長留四海悲西風  
惠陵晚落日薊門遲欲共忠魂語含悽祇淚垂

國步艱危際孤臣涕淚中前星虛帝座七廟起悲風丹  
檻攀無及蒼梧怨不窮萬方同一哭誰復殉遺弓

花藥寺

花藥阿蘭若重來二十年紺園空宿草碧殿鎖寒烟零落  
嗟今日艱難憶昔賢瀟湘無限意惆悵夕陽邊

贈易與凡

拔劍高歌對酒卮  
酒酣爲說戍邊時  
夢隨關月還家遠  
馬踐河冰出塞遲  
青冢至今餘漢碣  
黃沙終古陷秦師  
憐君萬里封侯願  
贏得西風兩鬢絲

鄭州河決歌

嗚呼聖人千載不復生  
黃河之水何時清  
濁浪排空倒山岳  
須臾淪沒七十城  
蛟龍吐霧蔽天黑  
不聞哭聲聞水聲  
天子宵衣起長歎  
詔起師臣出防捍  
帑金萬鎰填洪流  
黃河之工猶未半  
精衛含愁河伯怒  
桃花春汛益汗漫  
明廷下詔罪有司  
有司椎胸向天悲  
吁嗟乎時事艱難乃如此  
余獨何心惜一死  
捨身願入黃流中  
抗濤速使河成功

題王尊蓀觀察臺警夜渡圖二首



神州論險要臺嶠信孤懸海濶魚龍夜心傷戰伐年曾聞  
木罌渡竟遇水雷前虎穴身能入英風尙凜然

小醜甯能滅王師豈在多初傳橫海捷仍許郅支和太息  
援邊詔空揮返日戈披圖話陳蹟淒惻漢山河

正月二十六日由衡陽至長沙四首

錄三

孤舟仍遠涉落日悵離羣寒嶼明微雪春波聚細紋乾坤  
信虛棹身世薄浮雲自笑平生事旁人未遣聞

高枕滄江夜凝情默語時往來徒自苦天地欲誰私細雨  
孤帆溼寒鐙春夢遲百年猶旦莫擾擾復何之

野寺鐘鳴寂江皋水氣沉曉星寒欲墮旭日暖初臨大覺  
誰能證虛空不住心欲知清淨義試聽棹歌音

裴文禩字殷年號珠江越南國人

珠江為越南河內仁府金榜縣人官禮

部侍郎光緒丁丑充貢部正使來遊上國歸時道出

鄂洲由楊蓬海太守恩壽伴送唱和之詩各有五十

餘首名曰雉舟酬唱集此編附錄越南裴文禩阮

述及朝鮮金澤榮諸家詩於卷末以為藩屬之紀念

鳴呼越南已早為法亡朝鮮又新為日滅藩封既削

唇齒皆寒兒人之憂曷有極耶時為宣統二年八月

朔日蓋日韓合併問題甫於前月之杪宣布也

名為合併實則吞噬亡國滅種殷鑒不遠噫嘻

### 赤壁懷古

東風何處便周郎平楚寒煙一莽蒼吳蜀空餘形勝地孫

曹誰辨戰爭場蘇髯一賦傳偏誤諸葛孤臺說更荒過客

南來懷古意悠悠宇宙付滄桑

### 武昌感懷

黃鶴樓邊夕照斜鳳凰山上白雲遮鳳飛鶴去已千古李

筆崔題傳二家漢水波濤驚度雁晴川楊柳不勝鴉春風

隔樹吹何處鐵笛無聲起暮笳

呈孫琴西方伯

衣言

黃鶴仙人下碧霄鳳凰秀氣鬱岩堯海天共識蘇霜鬢湖

地長歌召雨苗白雪郢中高唱滿

公賜詩文集

清風春座俗塵

消離亭一夜梅花笛江漢游迴夢想遙

鄂渚煙花繫小輪李崔詩客夢中頻琴西騷雅稱夫子湖  
北風流作主人翰墨笑談千古事襟懷瀟灑一江春漢陽  
草樹晴雲暮冠劍重來此問津

和楊太守渡江之作

九迴曲折歷川源鄂渚通潮萬里奔終古長江浮日夜一  
山大別峙乾坤闕河晚棹清風度心事中流白水論不見  
祖生誰擊楫春波浩蕩漲荒原

金澤榮字滄江朝鮮國人有滄江詩集袁祖芳緣天香雪移詩話云李

可亭示余高麗遺臣金滄江詩一册並言金以本國三品通政大夫棄如委蛻來南通州依張季直殿撰以居身世蒼涼黍仙哀感備見於詩其感悼懷人諸作可與彼邦近數十年小史參讀又云滄江詩伊鬱悲涼亡國詩人頗與遺山為近又有和日米米伊詠殘螢詩其氣概足以凌轢東人蛙枯猶怒蟲死不僵孤絃白鳴可哀也已

和日米米溪氏詠殘螢詩

日月不為大殘螢不為小請除分別心與我游天表

落葉

錦葉凋霜別思盈  
蕭蕭寒雨打簾旌  
無端滴到秋心處  
共作回風滿院聲

靈均魂氣極青楓  
商婦琵琶拉雜中  
并作新愁來萬里  
南天木落大江空

落梅

霜梢日日信頻探  
愛惜零紅嚼未甘  
風雪打人殘酒醒一  
枝哀笛過江南

感事懷人八首

半夜狂風海上來  
元冬霹靂漢城摧  
朝衣鬼泣嵇公血  
犀甲天慳范蠡才  
壚底死灰心共冷  
天涯芳草首難回  
蘭成識字知何用  
空賦江南一段哀

垂楊垂柳不勝垂  
恨水東邊喚渡時  
樓閣參差朝霧重  
江山平遠夕陽遲  
至今父老懷箕子  
無限英雄說乙支  
弔古牡丹峰上去  
天風忽送管絃悲

鎖鑰重關鐵嶺層  
鬱蔥佳氣近咸興  
老成籌略金宗瑞  
荒遠封疆穆克登  
海岸樓臺朝結蜃  
獵圍風雪晚呼鷹  
寄言

關市扶桑客聖主如今任股肱

七十諸侯控將臺平明煙火達城開青峰直向萊州落畫  
角寒搖洛水回名酒正銷羈旅恨悲風還憶古人才列邦  
通市紛紛事誰禁輪船截海來

金陵西去馬蹄輕到處看山白眼明蔥秀關前泉似玉洞  
仙祠畔樹如城度關漸覺歌謠壯出峽新驚地勢傾犁雨  
樵風三百里黃州燈火夜江聲

提督東征慷慨歌秦庭七日事如何甲包糧食朝踰海火  
照江山夜破倭京觀土花埋劍戟荒祠春雨蔭藤蘿車公  
天露版韓公韓筆十萬貔貅盡擲戈

殷禮東來始變夷東川虎踞自男兒何知禹貢堯封外略  
似三王五霸時壇壝但捫疇範古江山長惜史才卑千秋

梁董登樓賦淚灑芳洲杜若枝

掛席名山記昔游長吟西北有高樓丈夫一舉如黃鶴江  
水中流問白鷗悄悄歸帆背天姥亭亭明月落揚州祇今  
翦翮樊籠裏過眼繁華萬事休